

**EIGHTH LEGISLATIVE ASSEMBLY OF MIZORAM
(ELEVENTH SESSION)**

LIST OF BUSINESS

FOR FOURTH SITTING ON FRIDAY, THE 10th FEBRUARY, 2023
(Time 10:30 AM to 1:00 PM and 2:00 PM to 4:00 PM)

QUESTIONS

1. **Questions** entered in separate list to be asked and oral answers given.

PRIVATE MEMBERS' BUSINESS

2. * **Resolutions**

LALHMAHRUAIA ZOTE
Commissioner & Secretary

* Please see Bulletin Part-II No. 268, dated the 7th February 2023 for relative precedence of Private Members' Resolutions to be moved.

SPEAKER : “*Tu sual pawh sualin thungrul suh u. Mi zawng zawng ngaiha thil mawi ngaihtuah lawk rawh u*”. -Rom 12:17

QUESTIONS & ANSWERS:

Zawhna & Chhanna-ah kan kal ang a, Starred Question No. 41 - A zawttute intawm 2 kan nei a, Pu Ramthanmawia leh Pu Zodintluanga Ralte. A ziak hmasa ang hian, Member zahawm tak Pu Ramthanmawia zawt turin kan sawm e.

PU RAMTHANMAWIA : Pu Speaker, ka lawm e. Ka zawhna chu -

- a) Tun sorkarah Store Keeper leh PE engzatnge lak anih tawh?
- b) Lak belh tumna a awm em?

SPEAKER : Chhang turin, a changtu Minister zahawm tak Pu K. Lalrinliana ka sawm e.

PU K. LALRINLIANA, MINISTER: Pu Speaker, ka lawm e. Ka chhanna chu –

- a) 2019-2020 ah Store Keeper pakua (9) lak a ni. 2022-2023 hian PE pahnih lak a ni.
- b) Awm e; buaipui mek a ni.

SPEAKER : *Zawhbelhna* - Dr. ZR Thiamsanga.

DR. ZR. THIAM SANGA : Pu Speaker, ka lawm e. Ka zawhbelhna chu –

- i) Fortified rice hi engnge nia, mipuia engtia sem nge a nih?
- ii) Hill State Transport Subsidy Bill tang a la awm em? Engzatnge nawr chhuah anih tawh? Fair-price shop retailer-te kalphung hi hei aia changtlung zawka kalpui tumna a awm em?
- iii) Mizoram hi gas-ah hian eng vanga hniang hnar ta thut nge kan nih?
- iv) Supply Deptt. hian refugee-te chhawmdawl na eng chen nge a kalpui ve” tih te a ni e.

SPEAKER : *Zawhbelhna* - Pu C. Lalsawivunga.

PU C. LALSAWIVUNGA: Pu Speaker, ka lawm e.

Zawhna zawh ka duh hi kan ramin kan mamawh em em a ni a, a changtu minister pawh hian a ngaipawimawh em em a, theih tawp a chhuahna kal chho zel kha a ni a. Chu chu -

“IOCL leh NEF Railways ten oil dah khawl na tur buatsaihna *detailed feasibility study* an neih kha eng tikah nge hna hi tan a nih theih ang,” tih leh, Vairengte Oil Depot hi tunah khuan oil phurh load thlak nan leh indent siamna atan hman a ni a. Khu khu Brig. T. Sailo khan UT ministry-a a lo siam, kan ramin harsatna a tawh pawha kan hman

tangkai em em a ni a. Oil phur ten oil load thlak nan leh indent tih nan chauha hman a la ni hi, “hei aia tha zawk leh changtlung zawk hian oil depot atan chei that emaw, thuan that emaw a theih em? A theih chuan, hma lak theih a ni ang em” tih kan Minister zahawm tak ka zawh belhna a ni e.

SPEAKER : *Zawhbelhna* - Zawhna neitu Member zahawm tak Pu Ramthanmawia ka sawm e.

PU RAMTHANMAWIA : Pu Speaker, ka lawm e. Ka zawhbelhna chu –

- i) “Tun sorkar chung hian kudam engzatnge sak thar a nih tawh” tih leh, “a thar sak tumna a awm em”;
- 2) “Food Commission Chairman leh member-te hi tute nge annih min hrilh thei em” tih a ni e.

PU K. LALRINLIANA, MINISTER : Pu Speaker, ka lawm e.

Member zahawm tak Pu Thiamsanga zawhbelhna ka chhanna chu –
Pakhatna - Fortified rice hi buhfai tha, vitamin awm a ni a, tha tichak tur chi iron, folic acid leh vitamin B12 chawhpawlha buhfai siam chu a ni. Mipuite hrisel zawk nan leh mi harsa leh rethei zawkte pawhin an dawn theih nana tih a ni. Hei hi Public Distribution System hnuaiyah Mamit District hi ‘aspirational district’ anih angin sem hmasak tura tih niin, June, 2022 atanga sem tan tawh kha a ni a, tun kum April thla atang hian Mizoram pumah sem tan tum leh mek a ni. Hei hi central sorkar ruahmanna tha tak a ni a, ei chhe lutuk lova kan awm theihna tura ruahmanna a ni.

Pahnihna - Tin, Hill State Transport Subsidy chungchang zawhna kha, Pu Speaker, kan sorkar hma 2013 vel atang tawha pekloh hi vaibelchhe 54,27,37,471/- a awm a. Chu chu kan sorkar tih khan kan han chhut a, Chief Minister pawhin theihtawp min chhuahpui a. Chutah chuan a rang thei ang bera min pe turin ruahmanna siamin kan dil a, central sorkar-ah pawh thlen a ni. Tunah hian cheng vaibelchhe 54,27,37,471/- atang khan cheng 25,53,69,563/- bill reject a awm a, Kan hmuh tawh zawng hi cheng 25,53,69,563/- a ni. A balance hi reilo teeth hmuh leh tumin kan inbuatsaih a, cheng 11,09,52,327/- release leh tawh nia hriat a ni.

Pathumna - Tin, Fair Price Shop hi retailer ten changtlung zawka an tih theihna tur atan leh mipuite’n awlsam zawka fair-price shop an pan theihna tur atana central sorkar ruahmanna, India ram pumpua siam tura tih a ni. Chumiah chuan retailer-te margin money tur te, tin, chumi piah lam hmun laili zawkah fair-price shop permanent a awm theihna tur atan ruahmanna siam tur a ni.

Hei, Village Council House te kan han sa ta neuh neuh a, LAD lam pangin; chungte nen pawh chuan ruahmanna siamin, thenkhatah chuan khang fair-price shop tur

te kha VC house hnuai lama pindan min kian tawh te pawh an awm a. Chutiang chuan hmun 75-ah ruahmanna kan siam chhin a, tunah hian kan kalpui chho tan dawn a. Buhfai mai nilo gas pawh a te chi kg 5 ang chi te an zawrh theihna tur leh thil dang-dang an zawrh theih dan tur ruahman sak anni. Fair-Price Shop hi tihchangtluna, mipui ten thil dang-dang, buhfai chauh nilo man man zawka an lei theihna tur atan ruahmanna kalpui mek a ni.

Palina - ‘Gas hi engtia hnianghnar ta thut nge kan nih’ tih zawhna kha - Kan sorkar tantirh kum 2019 pawh khan harsatna kan tawh nasa khawp mai a, kan department hian nasa takin a ngaihtuah a, tunhmaa an lo kalpui dan kha, (Member zahawm tak Pu Zodintluanga’n a rawn sawi ang khan) thenkhat ngaihdanah chuan ‘distributor-te leh company te inkar hi a ni deuh mai a lawm’ an ti a, thui tak a nihna chen a awm a. Amaherawh chu, ‘kha chen kan kal tawh a, tunah chuan tihdan dang kan ngaihtuah a ngai a ni’ kan ti a. October 2019 khan kan Chief Minister remtihna-in Petroleum Union Minister Dharmendra Pradhan anih lai khan kan zuk dawr a, amah ngei kan zuk hmu a. Chutah chuan kan harsatna kan hrilh a, state dangin an awlsam bik nate kan hrilh bawk a; chutah chuan assurance min pe a, instragram-ah a rawn tilang nghe-nghe a, ‘Mizoram sorkarin an rawn dilna hi tih hlawhtlin sak ni rawh se; pek ka tiam tawh a ni’ tiin a rawn sawi a.

Gas cylinder hi truck trip khat 310 te a ni thin a, chuta kan dilnaah chuan trip 15 nitin average-in kan dawng thin lai kha a ni a. Keiniin nitin trip 20 kan dawn chuan kan kham ang tiin kan dil a. Khami ni khan Union Minister khan, ‘State Minister-te a lo kal bawk a, nitin average-in trip 23 in dawng ziah tawh ang’ tiin min tiam a ni; chu chu a ni a, kan ziaawm chhan chu. Tunah pawh kan han chhut hian nitin trip 23 - 24 kan dawng ta ziah a, hei hi gas-a kan awlsam chhan chu a ni a, kan lawm khawp mai.

Kan State hian Covid-19 hrileng vang te, leimin vang te, Assam nena ramri buaina avanga te leh thil chi hrang hrang vanga harsatna kan tawh tur te hre lawkin kan sorkar tirhah kan Chief Minister Pathian-in remhriatna a pe a, tun hun hi kan thlen theih phah a, kan lawm tak zet a ni.

Tin, refugee chungchang hi kan record-ah chuan supply buhfai quintal 950 district hrang hranga refugee te mamawh an rawn thlen chu kan pe a. Tin, record loh hi a awm bawk ang a, district hrang hranga DC ten ruahmanna felfai tak a awm hma khan eng emaw zat kan pek hi a chhut hleih theih tawh lova. Chu chu Burma lam atanga kan unaute raltlan sorkarin kan chhawmdawl dan chu a ni a, ‘kan tanpui ve a ni’ tih ka sawi duh a.

Tin, Member zahawm tak Pu C. Lalsawivunga zawhna - Rail-fed oil depot chungchang leh Vairengte oil depot chungchang kha, Vairengte oil depot hi kan hriat thiam theih tur chuan, nikhatah trip 4 trip 5 bak a pe chhuak lova. Tunah hian challan

divert nan kan hmang ang chauh a ni mai a. A tam tham tho avangin leh hmantlak anih tak tak tawh loh avangin Rail-Fed Oil Depot hi kan neih a ngai si a, 'rel-inrawn phur se,' tiin kum 2019-ah Union Minister ka zuk hmuh tum pawhin ka zuk thlen a. Ani pawhin min ngaih pawimawh pui khawp mai a, 'a hmun tur te in thlan fel chuanrawn hawng ila,' a ti a, a sawi dan tak chuan, 'Krismas laiin hawn ka chak a ni' a ti nghe nghe a. 'A chhan chu Kristian ten Krismas in hman dan hmuh ka chak a, Kristian State inni a' a ti a, mahse, a hmun tur thlanah duh angin kan chak thei lova. Zawl tha an duh a, an duhdan chuan full rack wagon hnuk lut thei ram an duh a, km khata thui meter 60 chuanga zau an mamawh a, Bairabi leh Hortoki inkar rel kalna bul hnai te kan en a. Bairabi crossing atanga police station inkar pawh vawi tamtak kan en a, kan Chief Minister leh IOCL hotute nen pawh kan en a, tha kan ti viau a. Amaherawh chu, railway engineer lampang atangin anrawn en ve leh a, an duhthusam a ni thei lova, rel kawng atanga kan ram ruahman kha duhthu a sam lo an ti a.

Chumi piah lama an chhuanlamah chuan Dharmanagar-ah Rail-Fed Oil Depot a awm bawk a, Silchar bul Ramnagar-ah a awm bawk a; a hnai lutuk deuh a, 'in ram laili ni thei se,' an ti bawk a. Tichuan kan zawng kan zawng a, a tawpah chuan Sihhmuilam kan inkawh hmuh thei ta a, anni pawhin hei hi an duhthusam a ni a, Railway lama Engineer-te leh IOCL lam pawhin anrawn endik tawh a. Kan Chief Minister ho hian vawi hnih kan committee tawh bawk a, ka ho pawhin vawi tamtak kan committee-a, a hmunah pawh kan en bawk a. Sihhmuilam Cricket Stadium, terminal building piah lawkah khuan awm thei turah kan ngai a. Thu tlukna pawh kan siamfel tawh a. Khutah khuan full rack a lut thei dawn lova, half-rack a ni dawn a ni. Full-rack hi wagon-42 a ni a, half-rack ah chuan wagon-21 a ni dawn a ni. Chutah chuan wagon arawn lut ang a, a lu (Rail-head) a kual chhuak leh ang a, truck-in a load lehna te nen, leng turin an ngai a. A ram hi direct purchase-a lei mai dan te pawh kan ngihtuah a. Revenue Department-ah tunah hian a thang mek a, a rang thei ang bera lei turin kan Chief Minister pawh hian ruahmanna min siampui a, kan tihfel ve leh lei thei turah kan inngai a ni. Chu chu ka chhan theih dan ni se.

Member zahawm tak Pu Ramthanmawia zawhna, 'Kudam sak thar tum a ni em' tih kha - Tunah hian a thar 23 sakna tur min pe a, AA tihfel tawh a ni a, kan kalpui mek a ni. Tin, Kudam sakthar hi kan hre tawh thoin ka ring a, *Grant-in-aid* atang khan 10 sakna kan hmu a, NABARD atangin 21 kan hmu bawk a, tunah hian kan sa zo vek tawh a ni. Nakum a Kudam 12 sakna tur pawh hi NABARD lam atangin min pek theih an tum bawk a ni.

Pu Speaker, Food Commission member chungchang kha - Food Commission Chairman chu Pu HL Rochungnunga a ni a, member te - Pi Remliani, Pu C. Zasanga, Pu Vanlalrawna te leh Member Secretary chu Pi Vanlalchhuangi, Joint Secretary, Food & Civil Supply Department a ni e. Pu Speaker, ka lawm e.

SPEAKER : Starred Question No. 42 - zawt turin Member zahawm tak Pu C. Ngunlianchnunga ka sawm e.

PU C. NGUNLIANCHUNGA: Pu Speaker, zawhna ka zawh hmain – Hei, kan hma a awm hi, vawiin chu *reply* a lang tlat lo mai a, a hnawk ang reng bawk si a. ‘Nidangah chuan a lang thin a’ tih lai kha ka han report lawk a nih chu.

Pu Speaker, ka zawhna, Starred No. 42 – “Central sorkar-in ration buhfai thla khata kg 5 a thlawna a pek te hi kan state sorkar hian ration pek ve a tum em” tih a ni e.

SPEAKER : Chhang turin a changtu Minister zahawm tak Pu K. Lalrinliana kan sawm e.

PU K. LALRINLIANA, MINISTER: Pu Speaker, ka lawm e.

Ka chhanna chu – “Central sorkarin ration buhfai thla khata kg 5 a thlawna pek te hi PHH a ni a, AAY-ah family pakhat tan kg 35 pek a ni a, January - December thleng pek tura tih a ni. Hei hi tunah hian kan pe tan mek a ni.”

SPEAKER : *Zawhbelhna* - Dr. K. Pachhunga.

DR. K. PACHHUNGA : Pu Speaker, ka lawm e. Ka zawhbelhna chu - Lunglei District Godown hi Luangmual veng kawtchhuahah a awm a, Godown a lian tha a. Tin, a kawt hi a chiauh nasa lutuk a, khawtlang mipuite bakah driver leh a thawktute tan pawh a buaithlak a, a chhe rei tawh ang reng a. ‘Hei hi siam tumna a awm em; min siamsak thei em’ tih kha ka zawhbelhna a ni e.

SPEAKER : *Zawhbelhna* - Dr. Vanlalhlana.

DR. VANLALTHLANA : Pu Speaker, ka lawm e. Ka zawhblehna -

i) Mizoram tharchhuah Buhfai lei leh zel tumna a awm em? Lei leh tumna a awm chuan, quintal 1 engzaha lei nge ni ang?

Hei hi ka han sawi hlek duh a. Hetianga lei tumna a awma a rate zat te kan hriat chuan, mipui lam atang te pawhin tharchhuah tumna te pawh a awm thei ang tih rilru te pawh a awm a. Hei hi kan tum leh dawn anih chuan a rate pawh hriattir nghal thei ila tih kha ka han tarlang tel duh a.

ii) Nikum November, 2022-ah khan Secretary, Food Civil Supplies & Consumers Affairs in “Aizawl Municipal Area leh District Headquarters ah Ni 1.12.2022 atangin *home-delivery* hi tih vek tawh tur a ni” tiin thuchhuah a siam a, LPG home-delivery a nih chu. Chutah chuan December thla kha chhuanlam eng eng emaw siamin Agent ten an ti hleithe lova, ‘January lampangah tih leh tur ani e’ an ti a, Marketing Discipline

Guidelines, 2022-ah chuan home delivery veka tih tawh tur a ni a, tichuan, delivery pawh hi *phuahchawp* mai a ni tih kan hre awm e. Hei hi “engtia kalpui tum zel nge anih” tih kha kan Minister ka zawt duh a ni e. Ka lawm e.

SPEAKER : *Zawhbelhna* - Pu C. Ngunlianchunga.

PU C. NGUNLIANCHUNGA: Pu Speaker, Minister zahawm tak chhanna-ah khan, PHH kg 5 central sorkarin a pek kha, pek belh tumna a awm hran lo niin a lang a, kg 5 thlakhatah mi pakhatin a khamloh em a vangin, tunah hian Mizoram hmun hrang hrang atangin he zawhna pawh hi zawt tura tih ka ni a, kan mipuite an mangang hle a ni. “Central-State sorkar hian a bak kg 3 emaw thlakhatah mi pakhat tan pek belh leh hram dan a awm thei ang em” tih ka zawhbelh a.

Tin, *pahnihna*-ah chuan, House-ah hian ka sawi tawh thin a, a mimal ang pawhin kan Supply Minister hi ka request tawh thin a, mahse vawiin thlengin a la hlawhtling thei lova. MLA te, Ex-MLA te, MDC te, Ex-MDC ten tunhma chuan ration quota an nei thin a, mahse tunah hi chuan a tawp ta tlat mai a. Hei hi pek leh hram theih dan a awm em? Kan dinhmun te a inang lova, Ex-MLA leh Ex-MDC thenkhatte chu income engmah nei lem lo anni a, an khawngaihthlak tak tak a. Sorkar atangin thlakhatah quintal 2, a man tlawm zawk 1500/- a an lo lei ve hian an tan a chenfakawm em em mai a. Hei, tun sorkarah hian central atangin a thlawnin kg 5 lai PHH te pawn an han dawng a, State sorkar hian a chawibelhna tur a awm chuang lova, Godown Fair Price khan a lei ve mai dawn a, a permission chauh a kha a ni a. Hei hi “tihsak hram dan a awm thei ang em” tih kha kan zawh belh a ni e. Ka lawm e.

SPEAKER : Chhang turin Minister zahawm tak Pu K. Lalrinliana.

PU K. LALRINLIANA, MINISTER: Pu Speaker, ka lawm e. Zawhna neitu Pu C. Ngunlianchunga zawhna kha ka han chhang hmasa ang a.

“Special Quota, Ex-MLA te, Ex-MDC te tunhmaa pek thin kha pek leh theih a ni ang em” tih kha - Sorkar hmasaa tihtawp a ni a, kan tihtawp a ni miah lova.

PU C. NGUNLIANCHUNGA: Pu Speaker, vawiin-ah hian kan thawhpui, kan thiante rethei tak tak, harsa tak tak an awm a ni. Tin, MLA thenkhat chu (helai Aizawl town MLA te chuan min hriatpui lova) Mikhual 30 - 40 nei thin; Opposition MLA Pu Nihar te, Pu Rokhaw te phei chu khawngaihthlak tak anni. Ex-MDC te hian thlakhatah 20,000/- chauh pension an la ve a, an fate sorkar hnathawk an awm lova, sorkar hmasaah pawh hei hi chu ka sawi nasa a, Cabinet ah pawh ka against nasa a; hei hi chu tihsak hram a tha ka ti.

PU K. LALRINLIANA, MINISTER: Pu Speaker, rawn sawitu pawh hi an tam a, han tih leh pawh kan duh khawp mai a. Mahse sum leh pai Covid avanga harsatna kan tawh te leh thil dang dang avang hian kan han inchhut a, a la harsa hrih a ni. Term tharah kan rawn ngaihtuah ang.

Tin, *free-ration* tuna central sorkarin PHH tana kg 5/person a rawn tih zawhna awm kha, a dik khawp mai a. December 2022 thlatawp lamah central sorkarin ti tura state tin te min tih avang khan, January atan a han inpuahchahin kan han ti nghal mai thei lova. January thla khan central sorkar duh ang chiahin kan sem a, amaherawhchu, kham a tling lova, order pawh kan tichhuak vek tawh a. February atang hian PHH bik khan ration an kham loh avangin 3 kgs/person belh thina kha man neiin kan belh leh dawn a ni; a hma pawhin man nei tho a ni. Chu chu ‘kan ti dawn e’ tih kha ka chhanna a ni.

Tin, Dr. Vanlalhlana zawhna, “Buhfai Mizoram tharchuah lei tumna a la awm zel em” tih kha - A la awm reng a, kan lei duh reng a ni. Kan lei theihna OMP rate hi tunah hian 27.50/- a ni. A remchang bawk a, ka han sawi zau deuhhlekk ang a. Pu Speaker, kan OMP rate 27.50/- hi a buaithlak tawh khawp mai a, tunah hian Indiaa ramah buhfai man a to tlat mai a, kan mangang a, kan agency ho pawhin ‘a rate hi kan tlin tawh lo e’ tiin tihsan an rawn ngiat a, chu chu tunah hian kan buaipui mek a. OMP rate kan neih ang zelin a bi chu kan thliah theiin ka ring. Zoram buhfai thar hi a awm phawt chuan lei kan duh reng a ni. Kan sorkar tirh atangin kan CM-in ‘kan lei ang’ a tih khan kan la kalpui ngar ngar a. Kan hmuh chhun chu Pu Speaker, hmama ka sawi quintal 23 chiah kha Bilkhawthlir-ah lei tur kan la hmu a ni; a pawh khawp mai. Kan la hmu zel turah ngai ila.

Cooking gas home-delivery chungchang kha, hei hi dan awmsa tih ngei ngei tur a ni a. Tunah hian AMC area veng 29 tih tur a ni a, *pilot project* kan tih veng 4 te kha chu tha takin kan kalpui chho a, ‘home delivery hi ti leh lo mai ang’ ti ila an duh miah loving; home delivery that zia hi an hmu a ni. Tin, mipuia pawh hian a tam thei ang ber sawi ka duh a, remchang ka han la lawk ang a.

Home delivery hi gas kan awlsamna tur atan ringawta ngaih tur a ni lova, a pawimawhna em emna chu, kangmei laka kan himna tur atan a ni. Vanduaithlak takin nimin piah khan kangmei chhuak a, khangah khan, ‘gas bur engzatnge an neih’ tih hi zawhna a ni. Gas bur neih zat a puah kim hma chuan kan thelh hlau tlat thin a, a hlauhawm bawk reng a. Tin, thenawmte tan pawh a ralmuang lo a ni. Chuvang chuan, gas a harsat thin avangin gas bur 10 nei te, bur 5 nei te kan awm thluah a, kan in dahkhawl a. Vanduaithlak takin kangmei chhuak ta se, chuti hlauh chu kan dinhmun a ni.

Chu mai bakah home delivery kan tih hian delivery boy-te training pek vek anni a. Gas cylinder kha kawtkaihan an rawn hung ang a, spring balance hmangin a tlin leh tlin loh kha an buk tur a ni; chu chu kan pawm chuan an dah chauh ang. Tin, regulator an fit vek ang a, a leak leh leak-loh an en vek ang a, regulator leh gas stove inkara pipeline te ‘a him tawk em’; ‘a hlui tawh em’ tih te an check vek tur a ni. Chu chu kangmei laka kan himna tur a ni. Tin, thing leh mau kan tuah thin tihlema ramngaw kan neih nan a pawimawh em em a ni. Chungte chu sawi ngai lovin kan hre vek awm e. Chuvangin, home delivery hi ngaih pawimawh anih avangin mipuiah hian kan la infah tawk lova, kan la hrethiam tawk lova. Pilot project kan tih hlawhtlin hnuah, a dang AMC area leh district headquarter-te tih belh ila kan ti a, chutah pawh chuan a then chuan, ‘krismas lai a ni a, min hrethiam teh u’ an rawn ti a. Nichina MLA zahawm tak Pu Thlantea sawi ang khan, YMA member thenkhatte leh Local Council te pawhin Aizawl-ah te pawh inthuruala signature te pein, ‘min lo la hrethiam teh u,’ tia min rawn dil te an awm avangin, delivery point leh home delivery hi a la kalkawp hrih a ni. Chu chu tuna kan dinhmun a ni.

Tin, Dr. K. Pachhunga, Member zahawm tak zawhna, “Luangmual Supply Go-down Lunglei kawt diak thin hi siamthat tumna a awm em” tih ka chhana chu – “Tumna a awm a, minor works atangin kan neih ang-ang hian i chei teh ang, a hranpain sum neih a har si tiin, thal chung ngei hian tih kan tum e,” tih kha ka chhana ni teh se. Ka lawm e.

SPEAKER : Starred Question No. 43 - zawt turin Member zahawm tak Dr. Vanlaltanpuia.

DR. VANLALTANPUIA : Pu Speaker, ka lawm e. Starred Question No. 43, Food, Civil Supplies & Consumer Affairs Department changtu Minister hnena ka zawhna chu -

- a) Myanmar raltlante tan buhfai leh gas supply pek a ni em?
- b) Raltlante chhawmdawl na sorkarin engtin nge a kalpui?

SPEAKER : Chhang turin a changtu Minister zahawm tak Pu K. Lalrinliana ka sawm e.

PU K. LALRINLIANA, MINISTER: Pu Speaker, ka lawm e. Zawhna chhana chu -

- a) Myanmar raltlante tan buhfai pek a ni a, gas erawh chu a hranpaa pek a ni lo.
- b) FCS & CA Department hian Myanmar atanga raltlan (refugee) te Mizoram-a an rawn luh tirh chhawmdawl an ngaih hun lai khan, an eitur buhfai, district hrang hranga concerned DC leh DCSO te ruahmannain qtl. 950.06 sem chhuak a ni.

SPEAKER : *Zawhbawlhna* - Zawhna neitu Dr. Vanlaltanpuia.

DR. VANLALTANPUIA : Pu Speaker, ka lawm e.

Unstarred Question No. 5, Member zahawm tak Pu Vanlalhlana zawhna Ni 7.1.2023 a chhanna rawn chhuakah khan, Govt. record ah hian refugee mi 31508 an awm thu report a ni a, mahse Supply Deptt. lam record hi 15981 a ni a. Assistance pek tawh, tuna Minister zahawm takin a chhan ang khan qtl. 950.06 a ni a, a inmil lo tam riau mai a, a let aia tam sorkar record kha a ni tawh a. Hemi hnu hian Bangladesh lam atanga lo lut refugee an lo awm leh tawh bawk a. “Hei hi engtingge sorkar hian en zel a tum” tih leh, “mipuite tan pawh supply harsatna tam tak a awm avangin, heti zat refugee-te hi ngaihtuah theih anni em” tih ka zawt a. Tin, “Govt. record kha ava inang lo em em ve” tih kha ni bawk se la. Tin, “monsoon lo thleng tur atan buhfai stock a tam tawk em” tih ka han zawt tel bawk a ni e.

SPEAKER : *Zawhbelhna* - Member zahawm tak Pu Lawmawma Tochhawng leh, a zawhah Pu K. Laldawngliana.

PU LAWMAWMA TOCHHAWNG: Pu Speaker, ka lawm e. Ka zawh belhna chu-
“Buhfai kan ngah tawk em; engzatnge stock tunah kan neih” tih kha, tunah khan a rawn zawt tel tho a, ka han zawt ve leh a ni e.

SPEAKER : *Zawhbelhna* - Member zahawm tak Pu K. Laldawngliana.

PU K. LALDAWNGLIANA: Pu Speaker, ka lawm e.

Ka zawhbelhna chu - Gas kan hnianghnar deuh a, kan sawi ta vak lova. Mualkhang LPG bottling plant tihtawp tak khu sorkarin tihnun lehna turin lei-fel/tih-fel a ni tawh a, “engtik hunah nge hmalak/bultan anih ang” tih leh, “Mizoram sorkarin buhfai engzatnge mipui mamawh a lei belh; a lei belh zel thei dawn em; lei belh lo ta sela, mipuiin engangin nge kan tawrh dawn” tih kha ka zawt duh a.

Nichinah khan an sawi tho nain tunah hian oil-ah harsatna kan nei lova, ramri a buai erawh chuan ni hnih/khat bak stock theih a ni si lova. Sairang-Sihhmui-ah a ram lei fel tawh a ni a, hei hi “a hma lama hmalak theih a ni em” tih kha ka han zawt belh a ni e. Ka lawm e.

SPEAKER : Awle, chhang turin Pu K. Lalrinliana, Minister ilo sawm ang.

PU K. LALRINLIANA, MINISTER: Pu Speaker, ka lawm e.

Dr. Vanlaltanpuia zawhna pakhat zawk, “sorkar record leh supply lam record refugee chungchangah hian a inang lo hi engnge a chhan” tih kha – Supply Department record hi report kan hmuh atanga record nei kan ni a, chuang chuan sorkar record nen hi chuan a inmil thei lova; sorkar record, Home lampang atanga tih chhuah kha kha a dik zawk turah kan ngai a ni.

Tin, “La ngaihtuah theih zel ani ang em” tih kha – “Sorkarin ruahmanna fel tak a ngaihtuah a, DC te leh DCSO te nen a tul ang-ang, khang harsatna tawkte tanpui dan tur kha chu ruahmanna fel tak a siam a, chu chu kalpui zel tum a ni e” tih kha ka chhanna ni se.

Tin, zawhna pakhat zawk monsoon-stock chung chang kha - tunah hian kan kalpui mek a, a theih ang-angin kum tin kan kalpui thin a. Tunhma khan godown 55-ah monsoon stock tih thin a ni a, kawng laih thar (widening) a tam em em a. Nikum khan godown 79 laiah monsoon stock kha kan han kalpui a, tunah hian kawng thar (widening) zawh tawh te bakah kan kawng dinhmun te pawh a lo ziaawm deuh tawh a. Chuvingin, “nikum aain kuminah hian monsoon stock titem deuh tawh ila” kan ti a.

Kan han inruahman dan chuan qtl. 1,90,000 bawr vel kuminah hian stock ila kan ti a, tuna kan stock neih sa hi chutiang bawr vel bawk chu a ni a. Keimahni kudam-ah chuan thla hnih ei tunah kan nei pha lova, amaherawhchu, FCI-in kan ta tur an kawl mek te nen hi chuan thla thum ei te chu nei zan turah kan inngai a ni. A chhan chu, stock hlui ei zawhloh te pawh kan la nei a, chung a hlui ho ei zawh hmasaka stock thar dah leh a ngaih avangin, chutiang chuan kan inruahman a ni e. Khatah khan Member zahawm tak - Dr. Vanlaltanpuia leh Pu Lawmawma zawhna kha ka han chhang kawp a ni.

MLA zahawm tak Pu Dawngtea zawhna, Mualkhang bottling plant chung chang kha – Mualkhang Bottling Plant hi kan sorkar tirh te khan, “tih tawp a ngai” anrawn ti a. Khu laiah khuan truck trip 5 te, trip 6 te an pechhuak thei tawk tawk a ni mai a, kan kham khawp lo em em mai a. Nichina sawi ang khan, trip 23 tuna average-a kan dawn laiin min chawm zo lo a ni.

Chutih lai chuan an vessel dahkhawmna lai khu a chhah zawngin a tlin tawh lova. A chhung lamah a tuiek a, a lo khaw ve zel a, a pawp te a hlauhawm a. Engineer ten an endik khan, ‘thlak a ngai; tihtawp rih a ngai’ an ti a. Chutiang anih law law chuan, ‘min tihlen sak rawh u,’ kan ti a, ‘kan tihlen sak dawn che u; mahse ram min leisak a ngai ang’ an ti a. Kan Chief Minister-in ram lei min phalsak a, ram remchang deuh mai chu kan lei fel tawh a, hectre 2 laia zau OCL hnenah kan hlan tawh a. Kan inhlan atanga thla thum chungin kan tan ang an ti a, an la tan lo deuh hlek a; reilo teah an tan chhoh mai kan ring a ni.

‘Buhfai lei belh a ni dawn em’ tih kha, nichina ka sawi ang khan monsoon stock OMP kan lei belh ngei ngei a ngai a, a chhan chu, National Food Security Act hnuaiia APL quota la ho ‘non-NFSA’ kan tih, card var ho tan hian kan lei lo thei lova, lei turin kan inpuahchah mek zel a ni. ‘Stock sa’ tih kha chu, nichina Pu Dawngtea zawhna ka chhanna kha min pawm sak mai se. Ka lawm e.

SPEAKER : Starred Question No. 44 - Zawt turin Member zahawm tak Pu Vanlalhlana ka sawm e.

PU VANLALHLANA : Starred Question No. 44 - School Education Department changtu Minister chhan atana ka zawhna chu -
“Sorkar School-a kalte uniform inang vek hak tir tumna a awm em” tih a ni e.

SPEAKER : Chhang turin a changtu Minister zahawm tak Pu Lalchhandama Ralte i lo sawm ang u.

PU LALCHHANDAMA RALTE, MINISTER: Pu Speaker, Member zahawm tak Pu Vanlalhlana zawhna ka chhanna chu –
“Awm e; Academic Session thar 2023-2024 atang hian uniform thar hak tir tumna ni e” tih a ni.

SPEAKER : *Zawhbelhna* - Zawhna neitu Pu Vanlalhlana.

PU VANLALHLANA : Pu Speaker, ka zawhbelhna chu – “Engnge ni school uniform inang vek hak hi a tulna chhan; engnge a hlawkna tur; hei hian kan education quality hi a siam tha ang em; state dangah te hmang ve an awm reng em; he ngaihdan hi engtia lo piang chhuak nge ni” tih te a ni a.

Tunhma deuh khan school-timing tih danglam a ni a, a chhan han zirchian chuan, ‘traffic jam tih reh nan’ tih a ni a; tunah a ngaiin kan kal leh ta a. He idea lo pian chhuahna chhan ka han zawh belh teh ang.

SPEAKER : *Zawhbelhna* - Dr. Vanlalhlana.

DR. VANLALTHLANA : Pu Speaker, ka lawm e.

Pakhatna-ah chuan, kan hre theuh awm e; MICE school building Tuikual ami khu a sak a chhe hle a, ‘DPR anga sak a ni lo’ tih te a awm a. Persons With Disability (PWD) tan ramp siam pawh a ni lova; Zirna-Inah chuan hetiang hi awm vek tawh tur a ni, a tharah chuan. Ka zawhna chu – “Tuna an sak dan khu endik a ni tawh em; sakthat tir emaw, siambelh tir emaw, siamthat tir emaw tumna a awm em” tih a ni a.

Pahnihna-ah chuan, NABARD RIDF hnuaiia kan school building sak te a tlangpuiin beisei a pha lova. Leithum ami te pawh estimate-ah chuan ‘cheng nuai 8’ tih a ni a, kan insawi thiamna (han ti ila) ah khan GST te sawi a ni. Mahse, DPR-ah GST engmah telh a ni lova. NABARD chungchanga ka zawhna pakhatatah chuan, ‘tunge DPR hi siam’ tih a ni a. DPR kha restricted tender te in kan han pe a, a chhangtute khan an hre reng awm si a, ‘engatinge GST awm lo chung chung a khatianga an chhan’ tih a ni leh a.

Pathumna-ah chuan, DPR awm reng chungin DPC-in hnathawh tur a hranin a rawn ziaik leh a, DPR-a mi ni miah lo hna a rawn sawi a. Amaherawhchu, running bill an laknaah DPR angin pek an ni leh si a. Measurement book-ah te chuan a awm thlap DPR angin, an hnathawh erawh chu a dang a. Leithum-ah te pawh glazed tile phah tur a ni a, mahse a awm reng reng lo. A bang te pawh rawng hnawih that a ni lova, a hnunga thing rawng pawh a la hmuh theih a ni. Chutiang chuan hnathawh a ni a. “He thilah hian minister hian endiktu committee din a tum em; he thila thil diklo chiang lutuk mai hi engtinge minister hian hma lak a tum” tih hi ka zawhna a ni e.

SPEAKER : *Zawhbelhna* - Pu Lalrinsanga Ralte.

PU LALRINSANGA RALTE: Pu Speaker, ka lawm e.

Mizoram sorkar leh Education Minister zahawm tak te hmalakna a ropui hlein ka hria a. Education department leh a system-ah pawh kalphung thar tha tak tak kan hmu chho thei hi ka lawm a. Tun term-ah phei chuan private school bawh viau thin kha ‘sorkar school-ah naupang an pung viau’ tih te kan han hria a. School tam tak thawmthat ngai, chhe tak tak tawh te thawmthain zirtirtu indaihlohna nasa tak awm thin kha SEDP teacher te kan Minister tanlakna zarah kan han nei a. A bik takin thingtlang lamah chuan ‘kan lawm hle a ni’ tih kha ka han sawi duh a.

Ka zawhna *pakhatna* - “Sorkar school-ah hian naupang engzat nge kal mek” tih leh “Private school-ah hian naupang engzat nge kal mek” tih a ni a.

Tin, *pahnihna* chu - “common school uniform hi tute thlan nge; thlan fel anih tawh chuan, eng rawng nge” tihte pawh hriat a chakawm a. Tin, “Common uniform hman tur anih chuan, naupangte hnenah sorkarin a thlawnin a pe dawn nge, mahnia in lei tur” tih a ni bawk e.

SPEAKER : Awle; chhang turin a changtu Minister zahawm tak Pu Lalchhandama Ralte I lo sawm ang u.

PU LALCHHANDAMA RALTE, MINISTER: Pu Speaker, Member zahawm tak takte zawhna chhanna chu hetiang hian a indawtin ka chhang ang a. A thente hi chu

han chhan-kawp mai theiha inkawp deuh te a awm avangin ka chhang kawp nghal bawk ang a.

Zawhna neitu Pu Vanlalhlana zawhna, ‘Engenge a tulna chhan; state dang ten an ti ve em; he idea hi engtia lo chhuak nge’ tih chhanna chu –

Common uniform neih tul kan tihna pakhat chu - School uniform hi sikul naupangte zingah intluktlanna a awm theihna tur atan te, PS te, MS te, HS te leh HSS zirlaite awlsam zawka hriat-hran theih nan te, an discipline vawn-that nan te leh awlsam zawk leh man man zawka uniform lei anih theihna turin tul kan ti a. Tin, kum laklawha zirna hmun sawn ngai nu leh pa eizawna avang te leh thil dang avanga insawn ngaite tan uniform hranpa lei ngailo tur hi a tha hlein kan hria a.

Chulovah chuan, India ram hmun dangah pawh han hawi zau ta ila. Sainik School te, Kendriya Vidhyalaya All India te pawhin uniform inang deuh vek an lo nei a. Sorkar hnathawk insawn ngaite pawh hian an fate uniform kha an chhawm zel thei a. Mizoram kohhran school tam tak, entirnan: Presbyterian English Medium School pawhin Zoram pumah uniform inang vekin an ha a, han insawn nikhuaah pawh an kalna apiangah an uniform an chhawm nghal thei a. Tunhma chuan school hrang hrangin mahni duh dan ang school uniform an hak avangin, han insawn te, In luah insawn ngaih nikhuaah te pawh an fate uniform manah insenso a ngai nasa thin a. Chutiang chuan heng harsatna te hi ‘sut-kian theih beisei a ni’ tih ngaihdan a lo kal a ni.

Tin, ‘School uniform eng rawng nge ni dawn’ tih leh, ‘inang vek a ni dawn em’ tih kha – Inang vek dawn lo e. hetiang hian: -

- PS level - Kekawr tlawn leh puanfen (dumpawl); kamis var (ban bul), pheikhawk dum;
- MS level - Kekawr tlawn leh puanfen (light grey), kamis var (ban bul);
- HS level - Kekawr tlawn leh puanfen (dum), kamis var (ban tlawn);
- HSS level - High School level nen uniform an thlan hi a inang a ni.

Heng baka tul dang - school bag te, tee-shirt te, badge te leh neck-tie te bikah khan, anmahni school theuh thuneihnaah; school danglam hret duh an neih pawhin, khalai te, a minor lai kha chu kan han phalsak a ni.

Tin, “hemi chungchang hi engtia lo chhuak nge”, tih kha, kan sorkar hnuaiah hian SEDP Board pawimawh tak pakhat Human Resources Development Board kan nei a, chumi board meeting-ah chuan India ram hmun dang te kal dan te, kan ram economy te han en hian, “sorkar school kal laite hian uniform thuhmun an neih hi a tha lawm maw ni le,” tiin, chu board-ah chuan mithiam hrang-hrang hmun hrang-hranga mi lak-hawm te an rawn tel a, chung ho chuan rawtna an nei a, “engpawh ni se, sorkarah i thlen teh ang” an ti a, sorkarah thlenin ngaihtuah a ni ta a ni.

He thu kan ngaihtuah lai hian sorkar hian department-a hotute bakah, a concern department chhunga zirtirtu association hrang hrang – Primary, Middle, High School leh Higher Secondary School zirtirtu association aiawh zawng zawngte kan sawm vek a, kan rel-khawm a, “hei hi ram puma kalpui a tha lo em ni,” tiin nikum 2022 kum bul lamah khan uluk takin kan han ngaihtuah ho a, tha kan ti hle a. “Kum khat advance-in puang ila, uniform inbuatsaihna atan te, stock sa nei leh neilo te an in tihfelna atan nakum 2023 - 2024 session atanga tan turin i ti ang” kan han ti a. Kan zavai, zirtirtu pawl hrang hrang nena kan rel khawm a ni. Tin, a rawng hrim hrim pawh kha, sorkarin ‘hei hi ha rawh se,’ kan ti reng reng lova. Kan hriat angin service association lian tak tak, tha tak tak zirtirtu pawl kan nei a, anmahni pawl theuhah Primary Zirtirtu Association chuan, primary hak tur kha ram puma an whatsapp group-ah leh an committee ah an rawn thlang a, Middle-in an rawn thlang a, anmahni duh ang vek kha an rawn thlang a, chu an thlan chu sorkarin kan pawmpui a. Official order pawh kan Secretary in Notification 24.6.2022 ah a tichhuak a, a rawng leh engkim thlan fel anih hnuah he order hi kan chhuah theih ta a ni.

Tin, Member zahawm tak thenkhatte zawhna ‘uniform hi a thlawna sem tur nge; engzat nge ha tur tih leh sorkar school leh private school naupang dinhmun min rawn zawhna te kha, nichina ka sawi ang khan, Mizoram sorkar enkawl primary school ah hian naupang 58,886 kan nei a, chung naupangho chuan uniform inang vek an ha dawn a. Middle School naupang 44,607 ten uniform inangin an nei bawh ang a, High School leh Higher Secondary School naupangte chuan uniform inang an thlan avangin anni hi 25,434 an awm a, uniform ha tur an ni dawn a ni.

Tin, ‘sorkar school naupang engzat nge awm’ tih zawhna kha, tunhma khan private leh kohhran enkawl school ten a tam zawk min lak sak tawh nia kan hriat laiin, tun dinhmun, UDISE hnunung bera kan statistic-ah chuan, sorkar school-a kal hi 1,28,927 anni a, private leh kohhran enkawl school-a kal naupang hi an vaiin 1,26,314 anni. Sorkar school-a kal lai hi 2,613-in an tam zawk a. School naupang tuna record kan neih hrim hrim hi 2,55,341 anni.

Tin, Member zahawm tak Dr. Vanlalhlana zawhna MICE School building sak chungchang kha, ni e, nimin lamah pawh khan party thenkhat te pawhin an lo zuk tlawh a, chanchinbuah te pawh an rawn tarlang a. Thahnemngaihna avanga kan endik pawh hi a dik a, *a bilha tho fuh lo* te pawh hi a awm a, tlang deuhin ka sawi ang a. 2016-2017 chho-a ministry hmasain NEDP sum atanga sak tura a lo dah tawh kha a ni a, NEDP sumin 2016-2017 chhoah te an lo ti a. Sorkarna kan han chan khan, a then chu lo pek tawh te kha an awm a. He building ah hian hnathawktu chi thum (3) an awm a - pakhatna chu sorkar thar kan kal hnua tender chhuaha kan pek a ni a, sorkar hmasain an lo pek tawh, a part thenkhatah thawktu an awm bawh a, tin, SMC kaltlanga Samagra hnuia sak a lo awm bawh a. Chungte kalkhawm anih avang chuan tlemin han buarchuar lai deuh te a awm a.

Tin, a kal chho zel a, thahnemngaihna a lo awm a, thawktute leh kal tawh te kan dem palh ang tih chu ka hlau khawp mai a, rilru in tihnat ka hlau a. Hun kal chhoah a drawing te, a building structure drawing leh a kalphung han en hian ‘heti zawk hian ti se aw,’ tih tur hi a tam khawp mai a, tun hnuah hian. Nimin lawka chanchinbu lo chhuakah te pawh khan, ‘a chung zawlah railing engmah a awm lova,’ han tih te kha a awm a, kha kha estimate leh drawing-ah a awm lo sa hrim hrim a. Tin, a corridor-a railing drawing pawh contractor-te kha an siam dawn a, a lo te lutuk a, an complaint a, mahse, drawing ang chiah kha a lo ni si a. Kan Director ten an zuk en a, an siamthat tir a, a contractor pawhin, ‘E, a tha a lawm, thahnem ngaiin, hei hi chu ka chawibelh pawhin’ tiin, a lian zawkin a siam a. A entrance hrim hrim pawh khu a dik tawh lova, building lo kal zel turah khutiang building lian, entrance pakhat deuh chiah awm, emergency exit emaw, thil dang pawh kha a awm mumal lo a ni. Mahse, kan zuk kal a, ruahmanna thar te pawh kan siam a, hun lo kal leh zelah sum leh pai dangte hmuh theih anih chuan awmze nei zawk leh changtlung zawkin sak belh ta ila a tha ang a tih te kan nei a.

Tin, zawhnaa tel ni chiah lo, tukinah pawh Chanchinbu-ah te a lo chhuak a. ‘Lab. building a bo then’ tih te a awm a, chung zawng zawng, engkim mai a drawing te nen enmil chuan Lab. awm awm tak a ni a, mahse a lo awm lova, ‘Room No. 1, 2, 3..’ tih kha a ni ringawt a. Tin, ‘toilet te pawh room/floor tinah awm tur a ni’ tih lai kha, drawing ah khan floor tinah khan a lo indah si lo a ni. Chuvangin, a drawing hi duhthusam a ni lova, kan duh leh beisei ang te a kim hrih lova, enzui chhoh zel a ni. Tun dinhmunah a satute team 3 annih avangin, duhthusamin a la fuh tawh lo mai a ni. Hei pawh hi kan lo enzui mek zel e.

SPEAKER : Ngawi rawh aw. *Zawhna & Chhanna* hun a tawp a, chhang zo law law se a tha kan ti em? (*Memberte’n tha an ti a..*) Awle, chhang zo rawh le.

PU LALCHHANDAMA RALTE, MINISTER: Tin, NABARD atanga school sak hrang hrangte pawh kha he House-ah pawh vawi tam tak kan sawi tawh a. Duhthusam lo zawng zawng pawh kha ‘sak that/siamthat anih loh chuan bill pawh kan pe lovang’ kan tih ang khan Engineer ten a hmunah an en vek a, ‘a tha e, pek tlak a ni e,’ tia an certified hnuah a bill kan pe zel a ni tih kha he House a kan sawi dan leh kan bawhzui dan a ni.

PU LALDUHOMA : Pu Speaker, NABARD sum a bain kan puk a, school sak-that nan leh repair nan kan hmang a, a zatve pawh sak nan hian a kal lo tih tlang hriat a ni a. Endik mumal a awm lova, a satute tam tak hian DPR pawh an hmu lo hrim hrim; hralh chhawn a ni... Chu chu tunah khan bill pek tawh zawngah khan ‘DPR nen a inmil em’ tih kha endikin cho em?

(...interruption...)

PU LALCHHANDAMA RALTE, MINISTER: A lawmawm thin e. Education hi kan vei tlang a, min phurpui a, kan lawm khawp mai a. Kan MLA zawng zawngte chungah pawh lawmthu ka sawi a. House-ah kan han sawichhuak a, kan thahnemngaihna te, keini pawhin an sawi hi kan lo chhinchhiah a. ‘A fel lo lai deuh’ tia session hmasaa Group leader thenkhatin an sawi te pawh kha, ‘hei hi endik nghal tur a ni’ kan ti a. thlak ngai kan tih te pawh ‘thlak tur’ kan ti a, ‘bill pawh pek rih loh tur’ kan ti zel a, a theih chen chenah a tha thei ang bera ti turin kan ti a.

Tin, thil felhlel lai deuh awm fo chu, ‘tender amount ang zat hi sakna tur a nilo’ tih hi kan hriat a tul a. Tender amount cheng nuai 10 ni ta ang se, tunah pheichuan GST-ah 18% a kal a ngai a, labour cess a kal a ngai a, a monitoring a ngai a, a tak takah chuan 23% vel a hi a kal chhuak vek tawh a. Contractor profit tur te nen han ngaihtuah hian ‘a chanve bak a ni lo’ han tih fo hi mipui hruai kawitumna a ni tih hi ka sawi duh a. Mipuite hnenah thudik sawi hi a hun tawh; ‘contract cheng nuai 70 man engatinge nuai 50 in a sak’ te an rawn ti a. GST cut tur te an hrechiang lutuk; thudik thuantling sawi duh lovin, i vei lama mite hian helai hi chu lemchanna leh zirtir neilo thusawi nan hmang lo hram se ka duh hle mai. Pu Speaker, ka lawm e.

PRIVATE MEMBER’S RESOLUTION

SPEAKER : Awle, tunah chuan *Private Member Business* kan ti ve thung dawn a ni.

Hei, kan Dan 27-na, 1-na ina a tarlan angin, vawiin (Zirtawpni) hi *Private Member’s Resolution* neih tur a ni a. Hemi atan hian Ni 7.2.2023 (Thawhlehi) chhundar 12:00 khan Commissioner & Secretary Office-ah ballot a ni a. Chuta tang chuan Resolution 7 pawhchhuah a ni a. A indawt dan chu Bulletin-ah khan kan rawn sawi tawh a, Ni 7 khan kan rawn hriattir tawh che u a ni.

Tunah Resolution No. 1 kan la ang a, “*Mizoram Sorkar kal meka Sports Infrastructure din kawngah hmasawna nasa tak kan nei hi lawmawm kan ti*” tih a ni a. Tunah Resolution neitu Pu Zothantluanga, Member zahawm tak *move* turin ka sawm e.

PU ZOTHANTLUANGA : Pu Speaker, ka lawm e.

I phalna leh he House zahawm tak remtihhain, ka Resolution “*Mizoram Sorkar kal meka Sports Infrastructure din kawngah hmasawna nasa tak kan nei hi lawmawm kan ti*” tih hi he House-ah hian sawi hoa, pass min phal sak turin ka ngen a che. (**Speaker:** Han move nghal la.)

Pu Speaker tuna MNF sorkar Pu Zoramthanga kaihhrui hian a lo din tirh atanga reilo teah khan Sports policy a duang a, chutah chuan ‘he sorkar hian Sports ah nasa takin hma lak ni rawh se,’ tih kha kan thupui a nih avangin, nasa takin hma an la a.

Tichuan No. 1 ah chuan policy siam a ni a. Mizoram-ina kan mamawh em em, kan la neih ngailoh “Mizoram Sports Policy 2019” pass a ni a. Kan Chief Minister zahawm tak leh Sports Minister zahawm tak Pu Robert Romawia te thahnemngaihna leh hmalakna avangin hetiang hian bul tan a ni a, Sports a hmasawna tam tak lo thleng hi a bul tanna chu Sports Policy hi a ni.

Tichuan, sorkar-in Sports Policy kan han neih takah hian sorkar hna Group D, Group C leh B a ngheta lakah Sports person te'n 5% quota sorkar hnathawk lak apiangin an neih tur thu hetah hian DP & AR in Ni 14 November, 2019 ah order a chhuah a. Tichuan, Sports person-te mai ni lovin, sorkar hnathawk awm mek Sports-a titha te tana promotion a bika siam te a lo ni nghe nghe a.

Tin, a pahnihna-ah chuan, Sports hi ‘Industry’ nihna pek a ni a, tichuan industry policy ah Sports pawh dah a lo ni te leh, Tourism Department te pawh ‘Industry’ a dah a lo nih khan hmasawna tam tak kalpui theih a lo ni ta a. Tichuan, Sports infrastructure awmna hmun apiangah bank te, sumdawngte leh private company te pawhin inzawrhna atan te an han hmang thei ta a, hmun danga company te pawhin lo luh phah nan hmang chho a. Tin, Mizoram Sports Council pawh Technical Authority-ah dah a nihna pawh hi Sports lama hmasawna atana pawimawh tak a ni a. Race track diklo te, sports facilities a size diklo te enfiah leh tih-that theihna te pawh a lo awm ta a, chu chuan nasa takin sports lamah hma min sawntir a ni.

Tichuan, Sports person te cash-incentives siam sak anni a, kan infiam mi Sports lama hlawhtlinna neite, zonal, national leh international level-a ti-thate hnenah cash award pek thin a ni ta a ni. Kum 2018 leh 2019 chhung khan Jeremy Lalrinnunga, Weight Lifter, Youth Olympics-ah Gold Medal a lak avangin Mizoram sorkarin a lawmpui nan leh amah tihphur zel nan te, he mi kawnga chak zawka hma a lak zel theihna tur leh hlawhtlinna nasa zawk a hmuh theih nan ₹15,00,000/- a pe a; Lalremsiami, hockey player chuan Asian Games leh Youth Olympics-ah Silver Medal a lak avangin ₹10,00,000/- pek a ni baw a. Kum 2022-ah Commonwealth Games neih a ni a, hetah hian Jeremy Lalrinnunga chuan Gold lain, Lalremsiami hi India Hockey Team-ah a telin Bronze Medal a la baw a ni. Chumi lawmpuina leh hriatpuina bakah sports lama thalai lo kal zel turte pawhin hlawhtling tura an beih nan tiin, Jeremy Lalrinnunga hi ₹25,00,000 pek a ni a, Remsiami hi ₹7,50,000 pek a ni.

Tin, an hlawhtlinna hriatpuina leh lawmpuina atan Lalremsiami hi Kolasib-ah In-hmun pek a ni a. Jeremy Lalrinnunga hi Commonwealth Games-ah Mizo zingah Gold hmu hmasa ber a ni a, Mizo-te *idol* a ni a. Kan sorkara hotute leh kan Chief Minister kaihhruai chuan ngun taka an ngaihtuah hnuin, Jeremy Lalrinnunga pawh hi Ainawn Veng-a sorkar ramah chenna tur In-hmun a pe baw a ni. Hun lo la kal zelah pawh Jeremy Lalrinnunga te leh Laremsiami te hian future tha tak an la nei niin a hriat

a. Kan Governor chuan Jeremy-a pawh hi DSP, Police lamah lak anih theihna turin kan Chief Minister zahawm tak hnenah ngenpuina leh rawtna a thlen nghe nghe a ni.

Sports infrastructure neiin kan thalaite hi sports lamah awmze neia kan kal tir hian, national leh international level thleng pawhin hlawhtlinna kan nei thei a ni. Tunah hian Mizoram chhungah sports infrastructure tam tak din mek a ni a, hengte hian kan thalaite ruihhlo lamah an kal lohna tur leh a ti mekte pawhin nun kawng tha an zawh theihna tur pawhin a pawimawh hle niin ka hria. Grass-root level atanga infiamna khawvela an kal chhoh theihna tur atan te, kan thalaite taksa fit zawkna atan te leh inelna hrang hranga hlawhtlinna an rawn hawn theih nan thil pawimawh tak niin ka hre bawh a ni.

Mizoram State Sports Council, Management of Assets Regulation, 2022 siam a lo nih atang khan sports lama hmalakna pawh mumal takin a kal chho zel a. Sports Council, 2002 in provision a lo siam ang khan, Mizoram-ah pawh State Sports Council-in assets a neih - khelmual te, indoor stadium te, sports complex te leh a dang te pawh enkawlina mumal tak neih a lo ni ta a ni. Mizoram State Sports Council, Management of Assets Regulation, 2022 Dan siam anih khan, kalphung thar mumal tak a lo awm ta a. He regulation hi Mizoram State Sports Council Act, 2002 a pass anih hnu a Dan siam hmasak ber a ni nghe nghe a ni. Tin, Mizoram State Sports Council District Committee Regulation, 2022 siam a lo ni a. He Dan siam anih hian district level-ah recognised Sports Association mumal zawk a a awm theih nan leh District Administration te nen thawhhona remchang a insiam chho bawh a ni.

Mizoram sorkar chuan sports ruhrel tha tak kan neih theihna turin nasa takin hma a la a. Kum 2019 atanga tun thlengin sports infrastructure atan Central leh State sorkar atang te leh CSR atanga sum kan hmuh zawng zawng chu ₹571.77 crore a ni a, chumi hmang chuan hna kan thawk mek zel a ni. Heng sum hmang hian synthetic turf football ground (phul lem) hmun 28-ah siam mek a ni a, hmun 10 chu phah zawh tawh niin, hmun 18 hi *ongoing-work* a ni. Hengte pawh hi hun rei lo teah hawn theihin a awm chho dawn a ni.

Tin, Mamit, Lunglei leh Lawngtlai District te tan District Sports Complex siam mek a ni a, heng Sports Complex siamna atan hian Central sorkar atangin PMKVK scheme hnuai a Mamit tan ₹4,496.48 lakh, Lawngtlai tan ₹5,019.43 lakh leh Lunglei tan ₹4,919.31 lakh te ruahman mek a ni. District Sports Complex bik atana ruahmanna leh hnathawhna kal meka ruahmanna hi avaiin ₹14,435.22 lakhs lai a, hei hian a ken tel te chu facilities hrang hrang - synthetic football turf, pavillion, synthetic athletic track, multi-sports indoor leh indoor shooting range etc. te a ni. Hengah hian sum tam tak sorkarin a ruahman a, vawiinah hian a thawk mek a ni tih kan hria a ni.

Tin, Residential Sports School khaw 5-ah din a ni a, chungte chu - Mamit, West Phaileng, Kawrthah, Lawngtlai leh Lunglei te niin, hemi atan hian Pu Speaker, ₹16,751.70 lakhs lai ruahman a ni a. Mamit leh West Phaileng tan ₹3,286.34 lakhs ve ve leh, Kawrthah, Lunglei, leh Lawngtlai tan ₹3,000 lakhs chuang vek hman a ni. Residential Sports School khaw 5 a hmalaknain a ken tel turte chu - academic building, boys leh girls' hostel, multi-purpose hall, table tennis, boxing, badminton, weight lifting tih theihnate hei hian a keng tel vek a ni. Tin, synthetic football turf, RCC water reservoir, Principal quarter, teacher staff quarter unit 8 laite a keng tel bawk a, basketball court leh volleyball court a keng tel bawk a ni. 'Chak taka thawh mek a ni' tih kan hriat atan ka sawi duh a.

Tin, Mizoram pumpuia Sports Deptt. hnuaiah basketball court 28 lai tunah hian siam mek a ni a, hmun tam takah zawh tawh niin, thalaiten infiam nan a an hman mek lain, hmun eng emaw zatah chuan la siam mek a ni. Tin, Pu Speaker, volleyball court pawh hmun 28-ah siam mek a ni bawk tih min lo hriat sak ka duh bawk a ni.

Tin, Multi-Purpose Community Centre Mizoram hmun hrang hrangah sak mek a ni a, tunah hian hmun 4-ah sak zawh tep a ni. Heng Community Centre-te hi a tlangpuiin pakhat sakna tur atan hian ₹236 lakhs vel zel ruahman a ni. Tin, Girls Hostel - Mamit, Kawrthah, Lunglei, Lawngtlai leh West Phaileng-ah te sak mek a ni bawk a. Hei hi a pawimawh em emna chhan chu, mirethei zawkte, a bikin mi chhumchhiate-ina man tlawm leh him taka an awm theihna tur leh an kal theihna tur atana ruahman a ni a. Heng hmun 5-ah te hian ₹282.80 lakhs hmanga sak mek a ni.

Hengte bakah hian sports infrastructure hmun hrang hrangah siam mek a ni a. Sports Deptt. bakah department hrang-hrangte kan Chief Minister zahawm tak Pu Zoramthanga kaihhruaina hnuaiah hian thawhhona a tha em em a. Sports Deptt. mai a ni lova, department dang dang – UD & PA leh RD Deptt. atangte pawh hian material components hmangin sport infrastructure hi siam mek a ni. Kan minister hrang hrangte nen tunlaia kan thalai ten sports-a hma an sawn theihna tur atan leh, ruihhlo laka kan ngaihtuahna kal pen tira, chu kan taksa ti fit tura kan insiamna kawngah hian kan sorkar-in a ngaih pawimawh em em hi, sorkar angin lungruual takin kan thawk theuh a ni tih ka sawi duh a.

Tin, Sports Minister, Pu Robert Romawia a fakawm em em a, kan fak a, vawiinah hian. Chung ruahmanna siamtu anihna lo hriat puia lo phurpuitu Chief Minister zahawm tak kan nei leh, kan minister hrang hrangte pawhin an tuipei bakah sum indaih lohnaah pawh MLA fund hmangtein sports discipline hrang hrang an siam a. Tin, MLA-te pawh hian he sorkar-ah hian sports an ngai pawimawh a, kan thalaite khawvel hi siam tur chuan sports hmanga thalaite kan kaihhruai a ngai a ni tih hriain, kan MLA fund atang te pawhin kan theih ang angin kan siam ve bawk a ni tih ka sawi duh a.

Central sorkar emaw, state sorkar emaw sum mai nilo CSR atang te pawhin vawiinah hian kan ramah kan Chief Minister kaihhruaina hnuaia sports-a hma kan laknaah hian sum hmuh zel a ni a. MSSC leh REC motor race track-te pawh Lengpui-ah cheng nuai ₹750 hmangin siam mek niin, India hmarchhakah pheih chuan motor sports race-track awm hmasa ber niin a lang a. Hetah pawh hian CSR atangin cheng nuai ₹750 lai kan hmu a, chu chu a la tawh lova, kan Chief Minister-in SASCI atangin a dahbelh a. Tichuan, motor sports race-track ropui tak kan nei chho dawn a ni. Kan thalaite hetiang neilo chung hian an motor khalth thiamna leh intlansiak zirtirhna neilo chung pawhin India ram inelnaah te an han tel thin te hi an khawngiahthlak in an lainatawm a, a churang chuan kawng chi hrang hranga thalaite hmasawna tur atana hetiang ruahmanna kan sorkar-in a siam hi ka thalaite tan a hlu hle dawn a ni tih kan hriat hian a lawmawm hlein ka hria. Motor Sports-ah pawh kan thalaite hming hi he motors sports race-track kan zawh hunah hi chuan ‘kan la lang chho zel ang’ tih te pawh a beisei awm a ni. India hmarchhaka a hmasa ber tur a hetiang ruahmanna, a state te ber leh a naupang berin kan han nei hmasa hi a ropui em em a ni.

Tin, Tata Trust Grassroot Football Academy din a ni a, hengah hian Tata Trust hian cheng nuai ₹50 a rawn pe tawh a, kan sorkar-in Grassroot Football Academy-a kalpui mek a ni.

Kan sawi tawh ang khan department hrang hrangte kan sorkara kan hotute thawhhona a tha a, lungrual takin kan thawkho zel a ni tih a lang a. Pu Speaker, ‘Sports Training Centre for Adventure Sports’ tih hi State sorkarin a siam leh bawh a, Vaipuanpho, Mamit District-ah tunah hian kalpui mek a ni a. Ministry of Tribal Affairs atangin cheng nuai 80 hmuh tawh a ni a, chumi hmang chuan hma lak mek a ni bawh.

Mizoram Rivers Drafting Rules, 2021 leh *Mizoram Aero-Sports Rules, 2021* te kan lo nei ta a, hei hian sports lamah kan thalaite tan hmasawna nasa tak a rawn thlen dawn niin ka hria a, kan sorkar hian rem hre takin kan thalaite tan hma a la zel a ni. Tin, adventure sports lama hmasawn theih nan Mizoram sorkar chuan a bul tanna atan Adventure Sports Festival a huaihawt dawn a, chumi atan chuan cheng nuai 40 sanction fel a ni tawh a. He Adventure Sports Festival kan siam hunah chuan, State dang atang pawhin mikhual rawn chhimtu tur kan nei zel dawn a ni.

Tin, ‘Fit Mizoram Programme’ pawh kan sorkara Sports Department-in a lo kalpui tawh a, ‘*Mipui hriselte’n ram hrisel an siam a ni*’ tih hriain he ‘Fit Mizoram Programme’ pawh hi buatsaih a lo ni tawh a. 2019 March thla atang khan kalpui a ni a, Mizoramah pawh *Fit Mizoram Run* buatsaih a ni a, college leh zirlai naupang hrang hrangte, hmun hrang hrang atangin AR Lammualah intawh khawmin an rawn tlan a, khang program te kha kan nei tawh a ni.

Tin, Pu Speaker, ‘Outdoor and Indoor Gym’ tih te pawh hi a pawimawh em em a, thalaite an tuihal a, infiamna kan duh ang zawng zawng kan nei thei lova, chuang chuan Outdoor Gym pakhat MINECO-ah siam a ni a, R. Dengthuama Stadium bulah pakhat siam a ni baw a, mipuiin an hmang tangkai em em a ni. Sum leh pai seng lova, hriselna atan gym kan han nei theih te leh, Indoor Gym pawh hi kan Chief Minister bial Zemabaw leh Dawrpui-ah te buatsaih a ni baw a, gym lamah pawh hma kan sawn zel a ni.

Pu Speaker, pawimawh leh em em pakhat chu, State kan nih hnua kum 2019-ah khan Mizoram State Games kan la neih ngai miah loh kan han nei te kha a hluin a ropui em em a ni. Khatah khan MLA bial ang zawnga inelin State Games kha kalpui a ni a, MLA bial zawng zawng kan chhuak vek a, bial tin atangin kan inel a, sports discipline te pawh kan hmang thain ka hria a. Mizo infiamna chi hrang hrangte telin, kan thalai mi 7,000 chuang zet State Games-ah khan an participate a ni. Khatah khan a pumpuiah kan Chief Minister zahawm tak Pu Zoramthanga bial kha gold medal lain pakhatna an ni a, ka bial Aizawl West-I kha pahnihna kan ni ve a, gold medal tam tak te kan han la ve baw a. Vawiin thleng hian kan thalaite’n khatiang hun neih leh kha an chak em em a ni. Covid avanga kan han che thei lo te, kum 2 zet mai harsatna kan tawh chungka kan han ti thei ta lo te hi a hrehawm kan ti a, kan thalaite’n tih leh an chak a. Khang huna lawmman la te khan an kal zelna tur atana lawmman lak zel beiseiin an fitness-te an lo siamtha a, hmalak zel te a chakawm tak zet zet a ni.

Khelo India, State leh District *Centre of Excellence* tih te pawh hi kan nei baw a. Pu Speaker, vawiinah hian sports infrastructure-ah hian tam tak he sorkar hian a thawk a ni. Sports Department mai ni lovin, UD & PA hnuai atang pawhin sports infrastructure siamna tam tak kan nei a. Entirman, Sports Stadium - Serkawn, Lunglei-ah te, Serchhip-ah te, Kolasib-ah te, basketball court - Mission Vengthlang-ah te leh Mualvawm Playground, Khawzawl-ah nuai tam tak tak senga sak mek a ni baw a. Tin, ‘Construction of artificial grass volleyball court, with fencing and lighting facilities at Khawzawl’ tih te, ‘Construction of multipurpose hall, including badminton and TT hall at MINECO’ tih te, ‘Improving of playground and laying of Astro-turf at Meisatla playground, Siaha’ tih te, ‘Construction of outdoor volleyball court using Astro-turf at Khawzawl’ tih te leh, UD & PA atang ringawt pawh hian nasa takin hma lak a ni a. ‘Construction of gallery for playground at Mamit’ cheng nuai 300 man zet te, ‘Providing and laying of Astro-turf at Thosai field, Siaha’ te, ‘Extension of Chawnpui Sports Centre’ cheng nuai 300 man te, ‘Outdoor Youth Recreation Gym’ cheng nuai 100 man te, ‘Construction of Playground at Edenthar’ cheng nuai 700 man te, ‘Construction of Indoor Stadium at Zuangtui’ cheng nuai 1400 man te, Construction of playground at Hlimen’ chengnuai 690 te. Tin, ka bial Tuivamit-ah *Smart City* sum hmangin tunah hian cheng nuai 700 dawn man ‘Artificial grass turf Football Ground’ min siam sak mek a, thawh mek a ni a. Kan thalaite’n thawh zawh thuai-thuaia hman tangkai an chak em em tawh a ni.

Tin, ‘Futsal ground at Mitlamual, Zemabawk’ te, ‘Multipurpose Ground High field Zarkawt’ cheng nuai 1500 man te, ‘Playground at Chite’ te, ‘Playground at Durtlang’ te, ‘Sports Multipurpose Hall’ tih te hmun 24 laiah hian kan Dy. Chief Minister chanpual UD & PA atang te, State fund atang te, NEC atang te leh Smart City atang te pawhin hma lak mek a ni bawk a ni.

Kan sorkarin hetiang a nasa taka hma a la hi a ropui kan ti a, a *hawn* te, foundation-lay te hi ti vek dawn ila chuan tih tur kan ngah ve hle mai dawn a ni. Sorkar hmasaah pawh ‘engmah an ti lo e, an thawk lo e’ kan tihna a ni lova, hmun eng emaw zatah lammual phullem te an lo phah a, Rajiv Gandhi Stadium, Mualpui-ah te, Kolasib-ah te, Champhai-ah te leh hmun hrang hrangah an ti a. Amaherawhchu, hun a lo kal a, kan ground te a lo chhia a. Thuamluaia Ground, Lunglei pawh kha artificial turf phah tawh ni mahse, a lo chhiain inkhelhna tlak a ni tawh lova. Kan sorkarin ‘a hmun a pawimawh a, a tangkai bawk si a’ tiin synthetic turf tha tak mai a phah tha leh a, chhim lam mipuite pawh an lawm hle a ni.

Tin, tunah hian henga hmalaknate, thawh zawh tawhte leh thawh lai tam tak a awmlai hian, central-in project a siam EAP tharah chuan Sports Deptt. tan cheng vaibelchhe 1,250 leh Tourism Deptt. tan pawh cheng vaibelchhe 1,000 lai yearmark a nei mek a ni. Hengte pawh hi rang taka hman a chakawm em em a ni. Amaherawhchu, central kalmangah tun vut-vutah a lo chhuak thei lo anih pawhin hetiang thalaite khawvel siamtu, Sports Minister thatak mai ngaihtuahna fing leh a tula pianga thawk char char peih minister kan nei a, kan project lo awm tura sum leh pai awm sa vek cheng vaibelchhe 2,250 vel zet ruahmanna te, district kan la cover loh te cover na atan leh sports discipline hrang hrang tihbelhna nei leh tur chuan tuna kan Chief Minister kaihhruai sorkar bawk hi a lo awm leh chuan, kan thalaite’n hmasawmna tam tak an neih leh phah dawn a ni tih hria se. Zoram thalaite pawhin hma lakpuia, tute’n nge hmasawmna tak tak, thalaite hmakhua buatsaih tu chu, ‘he sorkar hi a ni lawm ni; sports-a chuan kalphung thar lo thlentu chu’ tih kha thalaite pawhin an hriat a pawimawh takzetin ka hria a ni.

Pu Speaker, sawi tur tam tak la awm mahsela, a mal te-te, a point zawng-zawng sawi seng lo mah ila, a theih chin chin House-ah hian ka rawn introduce a. Min sawipua, min pass sak turin ka rawn ngen a ni e. Ka lawm e.

SPEAKER : Awle, *Resolution* neituin a rawn move ta a, kan sawiho ang a. Minute engzatnge kan inpek leh ang le? Awle, minute sawm ti ang aw.

Tunge sawi hmasa ang le? Member zahawm tak Pu Zodintluanga Ralte ka sawm e.

PU ZODINTLUANGA RALTE: Pu Speaker, ka lawm e.

Vawiinah Pu Zothantluanga resolution kan buk dawn a ni a. Resolution hi sorkar lam atang hian sorkar fakna te, hmasawna te an ti thin a. Vawiina kan ram roelna khawla hun tamtak leh pawisa senga kan resolve turah hi chuan a hlawkna tur awm ang chi te ni thei se ka duh deuh thin a. *Entirnan*: Lengpui Airport cheithatna tura sum tam tak dah, India rama ‘airport cute ber’ ni tur a sakna chhe lutuk te, a chim rum rum mai te, khualzinte hman tur trolley awm mumal lo te hi vawiinah hian he House hian vei zawk ta ila tih te ka rilruah chuan a awm a. Tin, hmar lamah Aitlang-a kut hnathawktute’n a an huan kalna tura permit a ngai te hi he House zahawm tak hian resolution puluta vei awm takah ka lo ngai zawk a. Amaherawhchu, khatiang zawng khan an kal thin si lova.

Pu Speaker, hei Sports Minister tha tak mai kan nei a. Kan Sports Minister hi MNF sorkar ni lo sela chuan tun ai hian a la ropuiin ka ring a. A chhan chu, Congress party sorkarah khan a hmingin Sports Deptt. lam ka lo enkawl ve thin a, State sum kan plan budget atangin kum tin cheng vaibelchhe tel hnathawhna tur min pe thin a ni. Hei, kum 4 kum 5 minister a ni ve a, State sorkar atanga a sum hmuh hi a beitham em em mai a. Nimin piah mai khan kan Sports Minister hi kan bial lamah te ‘sports tournament a awm dawn si a’ tiin ball ka dil ve a. Director-in ‘hetiang kan nei lo’ a ti mauh mai a; kan sorkar hi chu a lova pachhe awm mang e aw ka ti a. A hma kha chuan House-a member zawng zawngte hi kan insem thin kha a ni a. Amaherawhchu, tunah chuan ball te pawh pek theih a ni ta lova. Chuti chung chuan ka rawn fak duhna chu, State sorkar-in a support lo chungin, ama chakna vang hrim hrimin District Council Affairs atanga mirethei leh harsa zawk, State dang chuan education-ah te, health infrastructure atan te an hman vek lain, sports tana a thahnemngaihna avangin 90% chuang PMJVK hnuaih a pawt-lut thei hi a fakawm ka ti a ni.

Tin, ka sawi ang khan State sorkar hian a support lo tlat mai hi a pawl ka ti a. ‘Aizawl Smart City’ kan ti a, kan sorkar hi a vannei a. A buaipui lai kha chuan 50:50 share tur a ni a, tunah chuan 90:10 te a lo ni ta a. Hei hian a ken tel chu, Aizawl khawpui chhungah infrastructure tha tak tak, thirhruoi tam lutuk te leh thildang cheimawina tur a kalpui kha a ni a. Mahse kan Sports Minister hian sum tam tak, nichina kan mover-in a rawn sawi - field te, khelmual chhawng te siamna atan a han pawt peng thei hi a ropui khawp mai a. Tin, department leh infiam mite tan a thawk tha tak tak a ni tih kha ka rawn sawi duh bawk a ni.

Hei, han en ula, nimin lamah zawhna kan hmu a, sports infrastrucuture atana thawhna hi a tam khawp a, PMJVK hnuai ah hian. Mahse hemi list ka han hmuh hian Pu Speaker, *Hnam Run* lam ho hi a ngaihtuah lo deuh hi ka ti ve khawp a. A hnathawktu tura thlan ‘junior consultancy’ tih vel te hi a kat nuk mai a. *Hnam Run* lam ni awma ka ngaih ‘Vanlalthuma Ralte, Dinthar-I, Class-III Contractor’ tih hi a tel ve nawlh mai a. *Hnam Run* lam tan chuan a lawmawm vak awm lo mang e aw ka ti deuh a. Amaherawhchu, an hna tha takin thawk sela a lawmawm awm mang e ka ti a.

Pu Speaker, kan mover khan a duh tuiin a duh detail bawk a. Sports Policy, ‘5% direct recruitment’ te kan ti a, kum 2019 chhung hian sorkar hnathawk - Group B, C, D- te zingah hian engzat nge direct-a lut, engzatnge Sports Department quota-a lut awm tih hi hriat a chakawm a, nakin hun remchangah he House zahawm takah hian min hrih thei se ka ti a. Covid vang te pawh a ni ang a, kan sorkar hi a thu leh hla lamah chuan a tha khawp a, ‘Sports Industry’ nihna kan han pe a, rules te kan siamtha a, ‘incentive cash award’ tih te hi hman atanga kal chho tawh kha a ni a. Chutiang regulation hrang-hrangte han siam thar a ni chung hian kum li chhung hian kan thalai infiam mite hi ‘an tlahniam em aw’ tih hi ngaihtuahna a lo awm a. A hma te kha chuan Santosh Trophy football-ah ‘Mizoram an champion’ kan ti a. Tuna kan Sports Minister zahawm tak pawh hi Congress sorkar-ah kha chuan Aizawl Football Club tha tak mai dinin India ramah pawh an champion thei a ni. Mahse tun sorkarah hi chuan champion lam a lang ta tlat lo mai a. Hei hi engnge a chhan? A infrastructure lam, a contract lamah hian kan tui ta lutuk nge ni, infiam mite hi an lar ta lo tlat mai.

Hmanni khan North East Olympic football-ah te chuan kan han champion leh tho a, North East level mai a la ni a; a hma kha chuan India ramah champion-nihna kan ngah a ni. Aizawl Football Club te pawh Mizoram ngei-ah an khel theih nan tiin Rajiv Gandhi Stadium te kan han nei a, Rajiv Gandhi Stadium te kha nei ta lo ila chuan Aizawl Football Club tan kha chuan home-ground kan nei dawn lo a ni. mahse khang te kha sorkar hmasa in a lo tih a ni a. Lunglei, Zotlang, Kolasib, Serchhip leh Champhai-ah stadium puitling tak tak, kan ramin a mil tawh athletic track awm theihna te kan siam a, hmun thenkhatah te chuan a ramin a zawh loh vanga athletic track te pawh duhthusam ang leh, a scheme leh association ten an duh ang chiah ni lova siam te pawh a awm a ni. Kan ram hi tlang ram a ni a, zawl angin duh ang anga hmalak a theih loh avangin.

Pu Speaker, ‘kan sorkar ti hmingthatu’ ti teh ang, vawiin niah hei, Jeremy te, Lalremsiami te an han enkawl chho zel hi lawmawm ka ti a. Sorkar hmasaa ‘Catch them Young’ policy atanga rawn in chherchhuak, vawiin niah Mizoram ti hmingthatu, India ram ti hmingthatu-ah te an rawn tel chho thei te hi a lawmawm ka ti a.

A tawp berah chuan, hetiang resolution meuh kan sorkar ruling lamin sports lama kan hmasawna resolution a rawn pulut ka lawmpui rualin, (hei, kan House Leader a awm a, kar leh maiah budget kan pharh dawn a,) heti khawp mai a ram tan tia rem leh rem lova department hrang hrang atanga sports hmasawna tur atana hma a la thin hi, kan budget-ah hian duhsak ve hram teh se; pawisa hi pe tam ve teh se; ball te pawh he House-ah hian sem ve teh se. Chutiang anih loh chuan PMVK District Council Affairs chan tur, education-ah te, health-ah te hman tura tih pawt-khawmin leh, mi rethei zawk, harsa zawkte hman tur Sports-ah pawt luta, khawpui zawk – Champhai, Lunglei, Lawngtlai-ah te hman a ngai hi a khawngaihthlak lutuk a ni. ‘Kan House Leader hian lo duat deuh the se’ ka rawn ti a nih chu. Ka lawm e.

SPEAKER : Awle, member zahawm tak Pu Zodintluanga Ralte kha a sawi zawh velah chhuah kan phal dawn a ni, tun tum chu. A thian tha a thi a, chhuah a rawn dil a, kan phalsak e.

Tunge sawi leh ang? Member zahawm tak Dr. L. Thangmawia ka sawm e.

PU L. THANGMAWIA : Pu Speaker, hei vawiin niah Aizawl West-I bialtu MLA zahawm tak Pu Zothantluanga'n "*Mizoram sorkar kal meka Sports infrastructure dinna kawngah hmasawna nasa tak kan nei hi a lawmawm kan ti,*" tih resolution a rawn move hi a lawmawm hlein ka hria a.

Mizote hi Sports ngaina kan ni a, kan tet lai te chuan khelhmual awm lovah sarang awm-awm kan fun khawm a, buara hruin kan han tawn a, lungah te kan han inchhuih thi nawk nawk a, tihian veng leh vengte kan inel thin a. Tunah erawh chuan sorkar-in theih ang-angin hma a la chho a, *thalaite-au-aw* a nihna pawh a rei tawh a, tunah chuan volleyball te phei chu ken nei deuh vek tawhin ka hria a, khaw hrang hrangah hian. Tin, football te pawh zawl deuh awm ikah chuan sorkar kal tate leh MLA te pawhin theih tawp an lo chhuah tawh thin a, amaherawh chu tun ang em-ema sports infrastructure-ah 'revival' kan ti dawn nge, 'renaissance' kan ti zawk dawn, a awm a hi chu a vawikhatna niin ka hria a. Tunah Pu Zoramthanga kaihhruai MNF sorkar-ah chuan Sports Department chauh ni lovin department hrang hrangin SASCI thlengin sports infrastructure hi kan tih rawn a ni; MLA fund-a kan tih te phei chu a lang mang lo zawk a.

Tuna thu sawi zo chiah, kan Sports Minister kal chhuak ta pawh kha han fak ve zawk ka duh a. Lammual grass min rawn phalsak tirh laia Mizoram mipui leh thalaite kan lawm zia, opposition te thleng pawhin kan lo lawm a, churang chuan, I-League te kan khelh theih phah a, Aizawl Football Club te pawh hi India ramah kan chak theih phah a. Tunah phei chuan hetiang deuh hi a ni a, Sports Minister thar kan nei a, sorkar thar a rawn awm a...

(*Hon. Dy. Speaker-in Chair a la a..*)

"*Saula'n a sanga sang a that; Davida'n a singa sing a that*" tih ang mai khan, phullem phah phei chu news a tihchhuah pawh kan zak lek lek tawh a ni.

Amaherawhchu, North East a thil thar 'race track' kan han nei tur erawh hi chu a lawmawm khawp mai a, ka lo awhna a rei tawh a. Ka hlauh ber thin chu kan zin hawa intlansiakna tur nei lovin bike chak lutuk mai pali an han inzui hi chu, motor kan din tir tawp zel a ni. A tih pawh an intipalh nge nge thin bawk a, a chang chuan. Tunah erawh chuan Mizo thalaite tuina leh khawvel level-ah pawh kan lan theihna tur niin ka hria a. Khu mi zawh a nih hun chuan duh tawkin an accelerate thei tawh dawn a ni. A hmun te

pawh hi va la tlawh ka duh a, remchangah, kan hotu ten rem an tih chuan kan la zuk tlawh ang a, hna han kal det sela. Khawlai chep, kawng kawm awm bawk si ah rem leh rem lova an bike chak thei ang ber pawha tlantir ngam loh chung a an kalna thina kha motor hrang hrang tlan theih tura tih a nih ka ring a.

Tin, tuna kan Sports Minister zahawm tak Pu Robert Romawia Royte hmalakna langsar hi han tarlan ve ka duh a.

Sorkar hmasa khan Saitual leh Hnahthial-ah phullem phahin bul a lo tan a, amaherawhchu Ni 7 May, 2018 khan Pu Ram Muivah, NEC Secretary khan 1st Installment pek chhuah pawh hmang lo tur leh, a project titawp turin order a rawn chhuah a. Tichuan, theih tawp chhuahin sorkar thar hlimah khan ‘*mawng-vawm-ba*’ angin kan bei ngar-ngar a, Ni 21.10.2019-ah khan NEC Letter No. HRD SPORT/137/2017, Ni 21.10.2019-ah heng Saitual leh Hnahthial tihzawhna turin NEC-in, theih tawp sorkar-in a chhuah hnuin a rawn phalsak leh ta a.

Tin, thil lungchiat thlak deuh chu – Champhai-ah khan ‘race track ni lovin, intlansiakna track zawk a ni ang’ an ti a, amaherawhchu an teh sual deuh anih ka ring a, a sei lam kha a tawi ta hret a, kan hmang thei ta lova. Hengte pawh hi kan Minister hian “in siam that theih chuan... hetiang hi kan la nei tam lova, Mizoram-ah hian” tih kha a ni a. Eng emaw pawisa remchang a awm thei anih chuan a daih law-law tiha, intlansiak nana hman theih law-law turin, athletic lam tuite tan a that ka ring a.

Tin, hei tun hnaiah SASCI a rawn chhuak thar a, ka bialah pawh khian SASCI hnuaihan kan Chief Minister-in min remtihsak hlauh mai a, Kawlkulh-ah futsal ground kan siam dawn a ni. Tunah hian Central pawhin a rawn pawm fel tawh a, Sports Department pawhin a tul angin min pui turah kan han beisei a. Futsal ground hi grass te phahin zanah pawh khel theih turin light te tih-en kan han tum a. Tin, vanneih thlak takin Puiloh-a in camp mek DDL company hian a thlawnin Kawlkulh Field No. 2 tur min han laisak mek a, min laih zawh sak theih chuan fund remchang awm atangin khing te pawh khi kan rilruah chuan phullem phah te kha a awm tel a. Field pakhat chauh neih hi chuan phullem phah hi ka support lutuk lova kei chuan, tih ka sawi thin a. Field pahnih an neihna tur a ni dawn tawh a, Kawlkulh pawhin, khi khi kuma kan laih zawh hman chuan sum te pawh SASCI atangin nge, Sports atangin nge, (tuna EAP pawh nakinah ka la sawi ang a) khangah te pawh khan rilru min lo neih sak thei se.

Tin, chu bakah Ngopa-ah futsal ground kan han ti bawk ang a. Tennis hi Ngopa kan lar vena anih avangin Tennis Court pawh Aizawl ami ang quality hian tih hram kan han ti a, SASCI atang bawkin NE Khawdungsei te nen. Tin, chhak tlangdung lam Teikhang te pawh hian hmun kan nei tha em em a, infrastructure turin ruahmanna kan ti chho ang a. Chu chu ka han sawina chhan chu, hei vanneihthlak tak maiin tunhnaiah kan Chief Minister, Finance changtu leh Sports Minister ten theihtawp an chhuahna

zarah Ministry of Finance, Department of Economic Affairs (FD & ADB Division) chuan Mizoram sorkar-in rawtna a siam a hlawmin (a mal-mal chuan tih a la ni lovin ka hria a), US Dollar 6.25 million zet mai chu a thuphungin a rawn approve ta a. Tuna hetiang a rawn nih theihna chhan leh thildang tam tak hi, sports infrastructure-a hmalak buan-buan a ni lo a ni, tun sorkarah hian. A hmasa berah chuan infrastructure rem taka a kal hmam Mizoram Sports Policy, 2019 kha duanfel a ni phawt a ni. A ziak lam ti mai ila, 'a tisa leh thlarau lam' ti ang deuhin 'a tisa' chauh nilo lai pawh kha hmalak zar a ni a. Tichuan, sport kha industry-ah puan a ni ta bawk a, khang lo pawh tam tak a awm a. Khami pahnih bika kha tuna EAP-a principle approval min pek theihna chhan te zinga pawimawh tak a ni a. A crore zawng chuan crore 2,250/- hi tuna principle approval min rawn pek atang hian (kan resolution move tu sawi ang khan) Sports bik atan hian crore 1,250/- a ni a. Chuvanga nichin a ka rawn lam duat-duat pawh kha rawn lam ka ni a, hetah hian.

MLA te'n kan bial theuh leh ka bial bikah te pawh infrastructure la ngaih belh tura pawh kha a detail-a thawh tur an tih hunah kan hotute'n min lo hriatsak se a lawmawm ngawtin ka ring a. Tin, hei hi a that em-emna tur chu, a sum pumpui atanga 72% hi a thlawn liau-liau tur a ni dawn a ni. Crore 2,250 atanga 72% chu in chhut thiam mai in ka ring a, (a chanve chuang daih) hmun 4-a thena hmun 3 tep a ni. Tin, Central Ministry 5 leh NITI Aayog ten he EAP project hi tha an ti tlang vek a, dan angin zia kin comment an pek vek hnuah hei, a copy te pawh hi Pu Dy. Speaker, ka rawn keng a, an recommend-na te. Chuvang chuan, he a thuphunga an pawm hi a tak rama rawn thleng turah ka ngai a, a nghahhleh awm tawh hle a ni. Tichuan, heng zawng zawng hi theihtawpa kan tih chhoh leh theih nan thalaite pawhin sport-a kan tuihalna te, kan mamawh tam tak titu he sorkar hi min la duhsak chhunzawm a, an hriat ngei pawh kan ring a.

Tin, sports incentive pawh hi MNF sorkar hmasa, vawiina kan leader thoin a kaihhruai lai, hming pawh han sawi ta ila, Pu ZH Ropuia, Sports Minister anih laia duanchhuah kha a niin ka hria a. Tichuan, kan sorkar loh chhung zawng khan sir-khatah a lo let a, kan han sorkar leh chiah khan incentive te tipungin tunah hian kan han ti chho leh ta a ni.

Vawiinah hian infrastructure lovah pawh hian lawmthu sawina tham sport lamah hian a awm a. Mahse, infrastructure ringawt pawh, tuna a list ka neih hi chhiarchhuak dawn ila tuna kan thawh zawh tawh, thawh mek leh thawh leh tur, tuna SASCI-a awm tawh tih mai theih tur, department-in a chin fel ve leha thawh mai theih tur ti ta ila, minute 20-ah hian kan chhiar zo lovin ka ring a. Amaherawhchu, heng zawng-zawnga ka han sawi duh chu, *Mizo thalaite tan* a ni a. Tin, sports leh zirna hi khawvelin a ngaihsan, a ngaih nep theihloh a ni a. Hengah hian kan thalaite pawh ka ngen duha chu, awmze nei zawkin tournament te pawh intihlimna atan leh tawng pawng tih ang ni lovin Mizoram level, India ram level, khawvel level-ah ni thei se. Tin, combat game-ah

te phei chuan mahni tiat pui, mahni kg puiah hi chuan hlauh kan nei vak lovin ka hria a, Mizo thalaite hian. Hengah hian sorkarin a tul min han tih sak a, khawvel level-a langpha thei turin rilru kan dah a, insum theihna te leh thildang nen tihchhoh erawh chu kan bat ve niin kan hria a.

Engpawh ni se, tuna scheme hrang hrang UD & PA te, Smart City te, tin, RD te, MLA fund te leh SASCI thlengin sports atana kan han chuk rawn luai luai thei lai leh, infrastructure a zuana a rawn zuang chho tura hi; North East a state dangin an la neih loh race track te kan nei tur han en hian, vawiina resolution hi thlawp-awm khawpin ka hria a Pu Dy. Speaker, member dangte pawh thlawp theuh turin ka sawm a ni. Ka lawm e.

DEPUTY SPEAKER : Prof. F. Lalnunmawia, Member zahawm tak ka sawm e.

DR. F. LALNUNMAWIA : Pu Dy. Speaker, ka lawm e. Member zahawm tak Pu Zothantluanga *Private Member's Resolution* hi tawi te han sawi ve ka duh a.

Sports lama hmasawna Mizoram-in heti zat mai kan hmuha lawmthu sawina a rawn put luh hi sawi a chakawmin, a phurawm hlein ka hria a. Mizoram hmun hrang hrangah tun sorkar chhunga hmasawna tam tak sports lamah kan hmu a. Pu Dy. Speaker, i hriat angin inthlan hmain SEDP leh manifesto-ah te kan lo telh tawh a, “Sports lamah nasa taka hmalak a ni ang a, infrastructure te pawh nasa taka din a ni ang” tiin. Chu kan intiamna ang ngei chuan kan CM kaihhruaina hnuaiah kan Sports Minister-in nasa takin hma a la a, a hlawhtlinna kan hmu chho hi a lawmawm tak zetin ka hria a ni. Tin, Mizoram hmun hrang hrang atangin lawmthu kan dawng nasa hlein ka hria a. Hmanniah Kawrthah leh Tuidam-ah kan Chief Minister zahawm tak hova phullem phah hawna hmun hnihah ka zu tel ve a, pakhat Kawrthah-ah, pakhat Tuidam-ah a ni a. Kan Mizo *Hnam-Pa* Pu Laldenga hriatreng nan, Pu Laldenga Football Ground hawna ropui taka neih a ni a. Khami tuma mipui leh thalaite hlim zia te kha ka mitthlaah hian a la cham a ni. Mipui an lawm em em a, khawtlang mipui leh thalaite khati khawpa hlim hmel han hmuh kha a lawmawm hlein ka hria a ni. Ruai nen, sial nen ropui takin khang hawna hun kha hman a ni a, a bialtu MLA zahawm tak pawh a tel ve a, a ni pawh kha a lawm hlein ka hria. Hman kum session hmasa lamah kha chuan a phur vak lo deuh emaw tih tur kha a ni a, tuna a hawna han neih meuh chuan a lawm ve hlein ka hria. Mipui kha kan lawm tlang em em a, khangte kha mitthlaah a cham a.

Pu Dy. Speaker, kan sorkar chhungah hian phullem (synthetic turf) phah zawh tawh hi 10 a awm a. Tin, phah tura hmalak mek leh hnathawh mek 18 a awm bawk a. Chu chu zawh anih hunah chuan hmun 28 zetah phul lem mual kan nei tur hi a ropui hlein ka hria a, hei hi Mizoram tan thil chhinchhiaah tlak leh thil ropui tak a ni. Mizoram thalai hmun hrang hranga mi, an hawiher hmuhin a hlimawm hle a ni. Thenkhat ten a

lawmawm lo zawng deuh te'n han sawi bawh mah se, thalaite phur zia a takin ka hmu a. Pu Dy. Speaker, kan bial Hmuifang-ah pawh tun hnaiah kan Sports Minister thahnemngaihna avangin 'Mualzavata Operation' tia kan Sports Minister zahawm takin a phuah hmangin playground min laih sak a, an thawk mup mup mai a, khawtlang an lawm tak zet a ni. Chutih rual chuan, Chawilung leh Lungsei field tha tunhma atanga la nei ngai lo khuaa MLA fund leh thildang nen tangkawpin kan han lai chho ve tan a, an lawm em em mai a. Sawng khaw thuma kan hmalakna ringawtah pawh tunhnaiah Zone Football Association atangin sorkar a lawmthu sawina te pawh kan dawng a ni. Hengte hi a ropuiin a lawmawm ka ti a.

Tin, heng football ground eng emaw zah zingah hian Muallungthu-ah *Khelo India* Scheme atangin football ground siam zawh tawh a ni a, a bul maiah hockey ground siam zawh tep a ni bawh a. Chungte chu hawn thuai te pawh kan beisei ve a, thalai leh a bial mipui ten an nghakhlel em em a ni.

Tin, chutiang bawkin Hlimen-ah Smart City Project atangin football ground siam hna thawh mek a ni bawh a ni. Hengte hi zawh anih hunah chuan a bial mipuite leh Aizawl khawpui atang pawhin tangkai takin kan hmang turah kan ngai a, kan nghakhlel em em a ni.

Tin, Pu Deputy Speaker, infrastucture mai bakah, ka hriat danin, mizo tlangval 100 chuang zet hian India ram hmun hrang hranga football club leh sports academy-ah training an la mek a, hengte hi a ropui ka ti a. Mizo thalai tam takin football hi eizawna atan an hmang tawh a, hmang leh tura inbuatsaih pawh tam tak an awm a ni. Tin, kan tunlai khawvelah lehkha zir leh sorkar hna pangngai a harsa tawh em em a, kan hria a. IV-Grade tak ngial pawh lehkha thiam tak tak ten an inchuh a. Chutiang karah chuan sports hi ei zawna tha tak a nih zia te kan hmu chho zel a. Mizoram sorkarin sports hi *industry*-ah a han puang ta bawh a, chumi zulzui chuan sorkarin hma a la a. Tun atanga rei lo teah mizo thalai tam takin sports hi eizawna atan an hmang chho zel ang tih kan ring a. Football mai bakah boxing te, judo te, weight-lifting leh hockey-ah te pawh thalai talent nei tha tak tak kan nei a, chungte tan chuan sorkarin tunah hian ruahmannate siamin theihtawp a chhuah mek a, 'an tan kawh a eng mek a ni' tih vawiinah hian kan hmu a, lawmawm tak zetin ka hria a ni.

Tin, *Khelo India*-ah hian 'Centre of Excellence' tih kha Aizawl-ah din tum a ni bawh a. Chungah te chuan mizo thalai boxing tui mite, judo leh weight-lifting lam a tui mite tan sorkarin training te a buatsaih chho ang a. Chung hmang chuan thalai tam takin sports lamah hma sawnin eizawna an hmu ngei ang tih kan ringin kan beisei a ni.

Tin, Pu Dy. Speaker, hei, Residential Sports School hi Mizoram hmun hrang hrang 5 ah din tura hma lak a ni bawh a, a ropui hlein ka hria a. Hostel anga a hmuna

chen chilha, sports discipline hrang hranga tui miten training-na hmun an nei tur hi a phurawmin ka hria a. Hei hian Zoram thalaiteah phurna nasa tak a pek ka beisei a ni.

Tin, Pu Dy. Speaker, heng central scheme hmanga sports infrastructure siam anih rual hian kan state sorkarah hian chhiah GST thahnem tak chhun-luh a hi a lawmawm hranpa ve hlein ka hria a. Football playground siamna phul lem phah leh playground hrang hrang siamnaah hian chhiah tam tak sorkarah hian a lut ve a ni. Hri leng kara sum leh paia harsatna kan state-in a han tawhah pawh heng chhiah GST sorkara chhun luh te hi kan tangkaipui hle niin a lang a, a lawmawm hle a ni.

Tin, ka han tar lan leh duh chu, Lengpui-ah, North East-a racing track hmasa ber tur siam mek a ni a, hei hi a phurawm hlein ka hria a. Member zahawm takte'n an sawi ang khan, Mizoram-ah kan thalaite'n bike intlansiak te an tui a, hetiang hi hmun hrang hrangah hmuh tur te a awm a ni. A hmunhna neih thatloh avangin kawngpui (highway) ah te intlansiak mai te an ching a. Abik takin kan bial lam pawh kawngpui a tha a, Aizawl chhim lam kawt chhuah a ni a, weekdays ah te, weekends ah te bike intlansiak hi hmuh tur a awm deuh reng a ni. Chu chu mipui vantlang tan pawh a hlauhawmna chin a awm thin a. Chungte tuihalna puhru tur chuan kan sorkarin bike racing track Lengpui-a a buatsaih mek leh North East-a a hmasa ber kan han nei tur hi a lawmawm hle a ni.

Tin, heng bakah hian Pu Dy. Speaker, tuna kan sorkar chhung hian mizo thalai tam takin sports discipline hrang hrangah medal - gold, silver leh bronze la an thahnem em em a ni. Covid lai khan tlemin an tlahniam deuh na a, covid a lo reh chho a, nikum 2022 chhung mai pawh khan mizo thalai discipline hrang hranga medal la mi 200 chuang lai an awm a ni. Engpawhnise, heng sports lama infrastructure hmasawmna tam tak kan neih hian kan thalaite phurna nasa tak a pe ang a, tun atang a hun lo kal turah thalai tam takin national level ah mai ni lo, international level-ah te medal tam zawk an lak ka beisei a ni.

Chuvang chuan, he resolution hi thlawp a phurawm a. Zoram mipuite pawhin min phurpui ve ka ring a. He House hian hlim takin 'he resolution hi i thlawp ang u,' tih ka rawn rawt ve a ni e. Ka lawm e.

DEPUTY SPEAKER : Member zahawm tak Pu Nihar Kanti Chakma ka sawm e.

PU NIHAR KANTI CHAKMA: Pu Dy. Speaker, ka lawm e.

Hei, vawiina Member zahawm tak Pu Zothantluanga Resolution, "Mizoram sorkar kal mek a sports infrastructure din kawngah hmasawmna nasa kan nei hi

lawmawm kan ti” tih a ni a. He resolution pawttu hi keimah ka ni a, ka rawn sawi lang ve a ni.

Hei, sorkar hmasaah te an thawk tha a, tun sorkar mekah te pawh sports lamah hian an thawk tha a, a lawmawm ka ti a. Nichinah Member zahawm takin a rawn sawifiah tawh a, hei, Mizoram pumpui ngaihtuah chuan sports lamah hian hma kan sawn nasa em em a. Pu Dy. Speaker, he House zahawm taka ka rawn sawi duh chu PMGSY Scheme chungchang hi. Hmannia kan Governor speech hi i phalnain tawi te ka rawn chhiar chhuak ang e. “The Ministry of Minority Affairs, Govt. of India has approved 18,858.49 lakhs under the PMSGY scheme for the implementation of projects in minority concentrated areas in the state” tih kha a sawi chiang a ni.

Heta ka sawi duh chu, Pu Dy. Speaker, a lawmawm rualin a bial ang zawngin, ka bial 35-West Tuipui context ang zawng chuan ka lawm lova. A chhan chu tun sorkarah hian Sports Deptt. hian PMGSY scheme hnuaiah hian Mizoram pumpuiaah 84 lai an thawk a, a lawmawm ka ti a. Mover-in chiang takin a sawi tawh a, Construction of Residential Sports Scheme hrang hrang - Mamit te, Kawrthah te, West Tuipui leh hmun hrang hrangah ‘an thawk tha’ tih a ni a. Amaherawh chu West Tuipui bialah pakhat pawh thawh a nilo hi pawl ka ti hle mai. ‘Tlabung hi Mizoram a ni lo em ni’ tih hial tein rilru a awm thei a ni. Tlabung hi *minority concentrated area* a ni a, mahse, Sports lamah hian hma lakna pakhat pawh hmuh tur a awmlo hi a mak ka ti a. Keini pawhin Sports lama hian hmasawn kan duh ve tho a, talent tha tak tak nei te pawh kan awm ve bawk a. Amaherawh chu basketball ground pakhat pawh ka bialah hian min ngaihtuah sak lova. Chuti lain hmun hrang hrangah community service centre te basketball ground te in dah a, a lawmawm tho a, Mizoram pumpui ngaihtuah chuan a lawmawm hle a ni. Mahse, West Tuipui bial ang chuan ka lawm lova. Heti zat hnathawhah hian ka bialah pakhat pawh a lang ve lo a ni.

Pu Dy. Speaker, kan hriat theuh angin Tlabung phei hi chu Mizoram-a khaw upa ber a ni a, nikum khan a kum 150-na pawh kan lawm ve a. Kum 150 lawm tawh hnu pawha sports infrastructure pakhat pawh kan sorkar hian a dah lo hi chu hriatthiam har ka ti a ni. Chuvangin, he resolution hi ‘ka support thei ang em’ ka ti a ni. A mover pawhin a move a, a tha khawp mai; mahse, mahni bial berah malsawmna hmuh tur a awm si loh chuan Bialtu ka nihna angin kei chuan lawmna tur ka hmu ve lo a ni. Engvangin nge hetiang hian thil a thlen thin, engnge a chhan sawifiah a ngai a ni. Sorkarin kum 4 a hmang zo tawh a, kumin hi a tawpna a ni a.

Chubakah Sports-ah budgetary allocation hi a tlem lutuk bawk a ni. Hon. Minister hian vawikhat chu min fiam a ni ang, ka lo hre lova. ‘Lo leng ve la, ka lo *khilai* ang che,’ a ti a. Vawikhat chu ka va leng a, mahse khami thu kha a theihngihl tawh a nih ka ring a, min *khilai* ta miah lo. Vawiinah hian a remchang bawk a, ka han sawichhuak anih chu. Helaiah hian thu tamtak sawitur ka nei lova, a lawmawmna pakhat

chu Hon. Governor pawhin a rawn sawichhuak a. Jeremy Lalrintluanga te, Lalremsiami te hlawhtlinna a rawn sawichhuak a, a lawmawm ka ti a, Sports lamah chuan hma kan sawn hle a ni.

Awle, Pu Dy. Speaker chu zawng chu ka sawitheih ni se. Ka lawm e.

DEPUTY SPEAKER : Minute ruk vel chauh hun a la awm a. Awle, Member zahawm tak Pu Lalsawivunga ka sawm e.

PU C. LALSAWIVUNGA: Pu Dy. Speaker, ka lawm e. Kan hun a tawi deuh tawh a, min hrethiam turah ngai ila; chawlh hun a ni a.

Vawiina Resolution hi “Mizoram Sorkar kal meka Sports Infrastructure din kawng a hmasawna nasa tak kan nei hi lawmawm kan ti” tih a ni a. Hetah hian sawi duh neuh neuh erawh chu ka nei ve nual a ni.

A hmasa bera ka sawi duh chu, Governor Speech-a kan sports person mi hmingtha pahnih lo langte kha lawmpui thain ka hria a. Kan ramn hmasawna a chuangkai niah ka ngai a, a lawmawm hlein ka hria. Mizoram sorkarin Sports Policy hi Ni 15.11.2019 khan a pawm a, Ni 4.6.2020 khan *industry*-ah puangin technical authority atan Junior Engineer te pawh a dah a, a hmang nghal a, Mizoram PWD pawhin Executive Engineer pakhat a dah bawk a. Chumite enkawlna hnuaiah chuan cheng nuai 1,000 chuang hna thawkin an khawih mek a ni a.

Incentive Cash Award Scheme hi Ni 22.8.2022 khan Council of Ministers thukhawm khan a approved bawk a. Hengte hi a lawmawm hlein ka hria a, hmasawna kalchho kan hmu-ah ka ngai a, lawm thu ka sawi a.

A dang leha ka sawi duh chu, District Council and Minority Affairs chuan ‘North East Consultancy Services’ kan tih te nen hian Deed of Agreement Ni 17.6.2022-ah siamin, heng ‘PMJVK’ kan tih hnuaiah hian an thawk vek dawn niin ka ngai mai a, ka hrethiam chiah lova. Heng PMJVK hnuaia pawisa tamtak lo luanglut, Sports atana hnuhluh hi hemi ‘Deed of Agreement’ hian a ken a ni em aw, tih hi ka ngaihtuahnaah a awm a. Deed of Agreement in a ken anih chuan, ‘induhsakna uchuak,’ a tih theih a ni. Chulai chu Pu Dy. Speaker, ka sawilang duh a ni.

Tin, Ni 22.9.2022-ah kan Sports Minister zahawm tak hian Union Minister hnenah Concurrent List-a dah tura ngenna pawh a lo thlen tawh bawk a ni. Tichuan, Assembly paper hrang hrang ka en a, ka inbuatsaih a. Assembly paper hrang hranga ka hmuh danah chuan, *Khelo India Scheme* leh NEC Scheme a tang hian cheng nuai 2743.11 hmuh a ni a, tin, State fund a tangin cheng nuai 200,899.41 hmuh a ni a, PMJVK Scheme atang hian cheng nuai 42,203.67 hmuh a ni bawk a. Tin, Article 275

(1), Ministry of Tribal Affairs atang hian cheng nuai 176.84 hmuh ani leh a. Tin, UD & PA Department, Govt. of Mizoram atang hian cheng nuai 3174.66 hmuh a ni leh a, Aizawl Smart City atang hian cheng nuai 9801.120 hmuh a ni bawk a. Tichuan, a vaia belhkhawm hi cheng nuai 6,998.89 niin a lang a. Hei hi kan budget pawnlam atanga pawisa hmuh a ni a. PMJVK hnuai hna 84 thawh mek a ni a, hetah hian hna 2 kum 4 chhung hian zawh niin a lang a. A bak chu 90% te, 50% te, 20% te a ni a, a tam ber zawk phei hi chu 1% vel emaw chauh thawh niin a lang a ni.

A bik-in Lunglei ah te phei chuan Construction of Futsal Ground, heng - Venghlun, Lunglei te, Ramthar Veng te, Lunglei Futsal Ground te, Salem Veng te, Lunglei Hockey ground a turf phah te, Electric Veng Football Field te, Lunglei-a laying of artificial turf te, Community Service, Lunglei te, Lunglawn te, District Sport Complex, Lunglei te phei hi chu 1% emaw chauh hnathawh niin a lang a ni. Kum 4 chhung hian, pawisa awm reng si engatinge hna kan thawh loh? Tunah kum 5 a ni dawn tawh a, hetah hian hna 2 chiah thawh zawh a la ni hi, engnge a chhan? **(Dy. Speaker:** Kan hun a zo a, chawhma hun chu. I sawi laklawh viau mai thei a, i titawp thei dawn tawh em? Nge, kan sawi chhunzawm zawk dawn? Awle, zo rawh se aw) Ka lawm e, kan sawi zo ang e, rei lutuk lo turah ngai ila. ‘Hna a va muang ve’ tih ka sawi duh a ni.

Tin, chutih rual chuan, MS Junior Consultancy Service, Tlangnuam hian hna 57 a thawk a, tin, Creative Min, Chandmari hian hna lian pui-pui 5 a thawk bawk a, Décor India, Guwahati hian hna lian pui-pui 6 a thawk a, tin Edufice infra-service, New Delhi hian hna lian pui-pui a thawk bawk a ni.

Helai kan sawi duh chu, ‘Mizo zingah hetiang ang hna thawk ve thei hi an la awm loh vang nge’ tih hi ka rilru-ah a awm a. Nge ni, ‘helai ah hian inremsiamna te hi a awm em ni’ tih kha kawng hnihin keimahah chuan zawhna ka nei a ni. Tin, heng hna chi hrang hrang thawktute hi ‘NECS’ kan tih te nena inthlunzawm vek niin ka hre nghe nghe a ni. *Hnam Run*-ah party worker ten hna an mamawh ngawih ngawih a, District Headquarters-ah, Sub-Headquarters-ah, Unit-ah, Group-ah party mi leh sa te pawhin hna an mamawh ngawih ngawih a, chutih laiin mi tlem te te hnenah hetiang hna pek a ni bik hi ‘*induhsakna-hleihluak* lutuk a ni thei em’ tih kha vawiin niah hian ka rilruah a awm a, chung chu ka sawi lang lo thei lo a ni. **(Dy. Speaker:** I zo thei dawn tawh em? A rei lutuk ang e aw.)

E khai, a va tlem ve! Pu Dy. Speaker, hmawr ka bawk mai ang e, chuti anih chuan. Min lo hrethiam ula.

A hmawr bawknua ka sawi duh chu hei hi a ni - Heti zat budget pawn lamah pawisa a vaibelchhe tel, nuaih singruk chuang kan hai luh lai hian, kan thalaite zingah hna engzatnge pek awm? Kan thalaite engzatnge hna hmu tawh awm? Tin, tunah hian thalai tih tur leh thawh tur neilo tam tak an awm a, chung mite tan chuan employment

hi a generate meuh em? Tin, heng 'infrastructure' kan tih vawiin nia kan thusawi atang hian Mizoram economy hi hei hian eng angin nge a chawikan dawn? Heta tang hian kan sorkar hian pawisa engzatnge kumtin thawhchhuah a neih ve anga, a hmuh ve dawn? Leiba in siamna hmanrua a ni thei ang em?

Kuthnathawktute mangangin an awm a, an thawhrah seng turin tihngaihna a awm lova, sorkar in Covid-19 a chhuanlam reng mai bawk si a, chutianga mangang taka kuthnathawktu, mirethei leh miharsate an awm laia, Sports lama heti zat pawisa kan neih hi 'chung mite tan chuan a hman theih loh em ni' tih hi vawiin niah hian ka sawi lo thei lova. Chuvang chuan, 'a lawmawm' kan tihruah hian, a lawmawmna khan engnge kan ram tan thil tha puakchhuah leh siam chhuah tak tak a neih? (**Dy. Speaker:** Awle, duhtawk tawh rawh le) A tak tak zel hi a ngaiin ka hria. Chu chu Pu Dy. Speaker ka han sawi duh a ni.

Hun a chep a, ka inbuatsaihna pawh ka sawi hman ta lova, kan la sawi ho leh ang chu. Debate puite pawh hi la neih hial thain ka hria. Kan sorkar kal dan hi an in en let hi chu a ngai a nia. In enlet rawh u.

DEPUTY SPEAKER : Tunah chuan kan chawl ang a, chawhnu dar 2:00 ah thutkhawm kan chhunzawm leh dawn nia.

(..*Recess.*..)

02:00 PM

DEPUTY SPEAKER : Kan tan leh ang a. Kan CM zahawm tak hi JICA meeting-ah a kal a, tlai lamahte chuan min rawn join hman maithei tih ka han hriattir che u. Tin, kan minister thenkhatte pawh hmun dangah pawimawhah an han kal zawk a ni tih ka han hriattir hmasa che u a ni.

Tunge sawi ang le? Dr. K. Pachhunga, Member zahawm tak ka sawm e.

DR. K. PACHHUNGA : Pu Dy. Speaker, ka lawm e. Hei, ka bula thu i ni bawk a ka lawmpui che a, a tul chuan hun te pawh min pekbelh ka beisei a.

Vawiina kan resolution hi a ngaihnaawm a, a tha a. Sorkarin a bikin sports department-ah hlawhtlinna tam tak kan han nei te hi a lawmawm a. MNF sorkar hlawhtlinna chauh a ni lova, Mizoram mipuite hlawhtlinna a ni a. Sports policy-te kan han nei a, central dawrin kan han kal ve zeuh zeuha, "policy enge in neih" tih hi an zawhna hmasa a ni a. Chuvang chuan, sports policy neih hi a tangkai a, awmzia a nei a ni tih hi kan hriat a ngai a.

Tin, Group-B hnuailam sorkar hna lakah sports persons te ‘5% reservation siamsak anni ang’ tih te, chutiang chuan sports department leh sports discipline hrang hrangte hi eizawnaa chikhat ‘industry’-ah kan han puang te hi a tha a. Mi thenkhatin han sawisel mahse, ni e, *industry* kan hriat dan hi, khawl vir chur chur angin kan rilruah a awm a. Engpawh hi eizawnaah kan siam theih chuan industry a puan te hi a changkang a, a tha a. Mi tamtakin eizawnaa atan football an hmang a, Mizoram state te reuh te, kilkhawr taka awm hi India leh hmun dangte pawhin min hriatna leh min ngaihsanna chu kan footballer tha tak takte vang a ni a, kan lawmpui takzet a ni.

Tin, kan Sports Minister leh kan Chief Minister hi an smart a, an efficient a, theihtawpin tan an la a, a ngaihna pawh an hria a ni. Chuvang chuan, Sports Development infrastructure ah te sum tam tak an haichhuak a. Mi tam tak ram leh hnam tan leh khawtlang tana thil tha ti kan han hmuh hian lawm lo kan awm a, sawisela eng emaw tia lo kheuh ve reng, social media-ah tu-tute emaw fuihpawrh ching ram hruaitu kan awm te hi a lungchhiat thlak ka ti a, a ramhlui zia a ni. Dik tak chuan, India ramah department hrang hrang leh scheme hrang hrang a awm a, union budget-ah an chanpual an dah theuh a. Sports development atana sum dah na-na engatinge ‘Agriculture ah... chuti khati’ ti tein mi rilru kan hruai sual a. A dik tak chuan Agriculture-ah pawh sum a awm e, kan dil chhuak ve bawk a. Tin, Sports atana pawisa dah, Entirnan: *Khelo India* hi term hmasaah pawh a awm a, pawisa tam tak a awm a, mahse vawiina kan Sports Minister leh kan hon. Chief Minister tena *Khelo India* atanga pawisa an haichhuah leh sorkar hmasa te han khai khin chuan, ‘a thawktu, a hmanrua a zirin a danglam hle a ni’ tih kan hria a.

Tin, ‘phullem’ kan tih te pawh vawiinah chuan *ar pan chuk tui lovin* kaa sawi a. Dik tak chuan, ka bial mipuite chuan kan duh a, min lo pe deuh vek se ka duh a, a sawisel bial ho hi pe lo ngam ila. Pu Dy. Speaker, sports development-a kan hmasawnnate han sawisela artificial turf duhlo te hi chu pe lo ngam law law ila a tha ang. ‘Kan bial hi chuan kan duh lutuk a ni’ tih kha kan sawi duh a.

Tin, sorkar hmasaah khan Lunglei Govt. College-ah ka thawk a. Kan College chhakah ‘Thuamluaia Field’ a awm a, kan sports minister hmasa Pu Zodintluanga hova artificial turf an rawn phah te chu kan lawm a ni. Tichuan, nau awih hlaah te hmang hialin, “Ka naute hi a tlangval hunah chuan artificial turf ah a inkhel ang” te an ti a ni. Vawiinah chuan duh taka hman nia an insawi theihna kha, an thutna a lo danglam avangin an han sawichhe leh te hi ram hruaitu puitling zia a ni lo a ni. Hei hi chu kan sim te pawh a ngai a ni.

Tin, dik tak chuan ‘tunge contract thawk ang’ tih te pawh, engkimin Dan leh Dun, criteria a nei a, a qualified lo te tunlaih hna a pek theih loh, a hna tha te kan duh si a. Chutiingin tu tute emaw fuihpawrh nan heng kan thil tha tih artificial turf kan phah emaw, football stadium emaw, futsal emaw kan sawi chhe vak hi, a dik lo. Dik tak

chuan, bial kan fang a, khaw hrang hrangah khawtlang hruaitute VC leh NGO te an lokal a, an dil tam ber chu feh kawng te, leilet kawng te a ni lovin community hall te, TT Hall te, basketball court te, volleyball court te, football leh field te a ni tawh zawk a. Ram hruaitu chuan mipui duh leh mamawh kan pek a ngai bawk si a.

Tin, an eizawna ngelnghet pawh kan buaipui a ngai a, a buaipuitu tur Agriculture Department te, Vety te, Horticulture ten hma nasa takin an la a. Chuvang chuan, kan thil sawi duh dan leh mipuia kan thil vawrh duh dan te hi a puitling lo deuhin ka hria a, kan fimkhur a ngai a ni. Tute pawh sorkar se, mipui mamawh pek hi kan duty a ni a, kan pe seng lova, theihtawp kan chhuah tlang a. A bikin ka bial han sawi ta ila; ka bial Lunglei khawpui chhung Lunglawn hi vote tamna ber a ni a, Sports infrastructure tha kan nei lova, vawiinah chuan kan Sports Minister hovin hockey field in bul kan tan a, ‘1% lek.. chuti, khati’ an han ti a. an lo sawisel hmanhmawh a. Anihna takah chuan technical problem a awm ve a, ram neitu thenkhat ten an lo phal lova, an lo dang a, theihtawp kan chhuah a. Thil tha mipui kan pek dawn hian mi thenkhat mi mak tak tak an awm a, ‘hlawkna tel tuma lo dang tang tangte pawh an awm thin’ tih pawh kan hriat ve a ngai a.

Tichuan, Lunglawn-ah basketball court-te pawh min pe dawn a, Theiriat-ah Volleyball Court-te, Lunglawn-ah Community Service Centre-te min pe a, kan lawm tak zet a. A theih pheih chuan hall lian Theiriat-ah kan duh a, Luangmual-ah pawh kan duh, ka bial thingtlang khawtinah hall kan duh a, TT hall tepawh kan duh a. Chuvang chuan, PMJVK atanga sports infrastructure atana pawisa haichhuah hi ram tan a tha a. Tunhma pawhin a awm reng a, a hming a dang deuh a ni mai a. A changtu minister leh sorkar a zirin an kap theiin, an kap theilo a ni ber a. Pasaltha ramchhuakin mipuite mamawh sazuk a rawn kap a. A kap ve lo, ti peih lo leh ti ve thei lo tena theihtawp a sawichhiat te sim ila, kan ram mipuite kan inzirtirna hi a fuh lova, mipuite an khawngaihthlak a ni. A tha hi chu, ‘a tha’ kan ti mai tur a ni a. Nimahsela, kan insawiselnah turah chuan, “In thawk tha lo deuh e, chulai khalai chu, a pawisa nen a inmil lo deuh e” han in tih te chu a awm a ni. Chuti lova mi sazuk kap, a kap ve lote’n a kap theite a chhe thei ang bera kan inchhuah thin hi chu ram hruaitu leh party te pawhin ‘i sim teh ang u’ tih hi he House kaltlangin kan sawi duh a ni.

Tin, kan bialah te leh zoram hmun tinah Girls Hostel kan sa a, thingtlang zirlai naupang mi ina harsa ti taka awmte tan hostel kan han pe te hi a tha a, Aizawl mi hausate chuan an mamawh lo ang a, thingtlang mirethei ten kan mamawh a. Chuvang chuan, he scheme kan minister leh CM-in tangkai taka a han hmang te hi a lawmawm em em a ni.

Tin, CSR atangin Tata Trust ten grassroot football naupang tete kan han zirtirte hi a tha a, football hi eizawna tlak a nih zia kan hria a. Kan fate sports-ah enge maw bera an tuiloh chuan, kan hriat angin drugs leh sualna kawng tam tak a awm a. Chuvang chuan, Zoram mipuite hi kan sorkar pawh hian ram tan hma lam panin, a tha lamin min

hruai zel se la, sports intihlimna hian hriselna min pe a, mihring nun chhe lutuk tur a veng a. Chuvang chuan, Pu Dy. Speaker, theih chu nise kan minister leh CM hian rawn hawn tam zel sela, kan bialah hall hrang hrang te, field chhe tak tak te, kan thalai ten volleyball leh basketball, futsal an awt lutuk te pek ve kan duh a. Vawiin pawh hian ka MLA fund-in Luangmual-ah futsal ka buatsaih sak a, kan hahpui ve em em a ni. Eng veng pawh hian football field te, artificial turf te kan duh a, a la chhuak thei minister, *sa kap thei* hi fak phur sauh sauh te pawh a phu a ni. Chuti lain, mipui mamawh hawn thei apiangte a chhe thei ang bera lo vuak thluk kan tum hi chu Zoram politician leh party te hian sim ila thain ka hria a. Sports project leh sports hmasawna hi zoram mipui leh ka bial mitin hian tha kan ti a, a aia tam rawn hawn leh sela, hnathawktu pawhin thawk tha bawk sela. Chutiang chuan mizo thalaite hian infiamna hrang hrangah Olympic leh Commonwealth Games-ah te pawh kan nei tan a, thil lawmawm tak a ni. Hnam anga min chawi chhuaktu leh khawvela min tilartute chu, Jeremy leh Lalremsiami te an ni a, helaia kan inchirh theh luai luai hi tumahin an ngaisang hran lo a ni. Chuvangin, mipui leh thalaite pawhin thil tha titu hi fakna chang i hria ang u. Ti ve thei lo itsik tu leh chhe thei ang bera lepe thin ni lo ila, thil diklo sawi thin te hi, hnawl ngam ila, Zoram hi hmalam pan zel sela, thil tha ram tan i ti zel ang u. Ka lawm e.

DEPUTY SPEAKER : Member zahawm tak Pu VL Zaithanzama i lo sawm ang u.

PU V.L. ZAITHANZAMA: Pu Dy. Speaker, ka lawm e.

Vawiinah Aizawl West-I MLA zahawm tak resolution “*Mizoram Sorkar kal meka sports infrastructure din kawngah hmasawna nasa tak kan nei hi a lawmawm kan ti*” tih kan han sawi khawm leh thei hi, amah, a resolution puluttu ka lawmpui viau a. Hei hi vawihnih an pawt fuh tawh a, ‘an pawt fuh thei viau mai’ tih kha lawmpuina atan ka han sawi nghal a ni.

Vawiin hian Pu Dy. Speaker, thlirna tlang dang atangin ‘kan lawm lo a ni’ tih lam hawiin ka rawn sawi dawn a ni. Sum tam tak sengin sports lamah hma kan la a, mahse kan lawm a kim lo a ni. Jeremy Lalrinnunga leh Lalremsiami te hre reng chungin vawiina kan resolution hi ka han sawi dawn a ni. Sum tam tak kan sen ral laiin sports-ah hma kan sawn lo hian lawm a tikim lo a ni.

Northeast Olympic Games a hnu hnung ber kha mitthla-ah a lo lang a. A hma chuan ‘Northeast Sports Festival’ tih a ni thin a, hmarchhak state te kan in unaun atan buatsaih a ni a. Tunah Sikkim an lo tel takah state pariatin Northeast Games hi kan lo nei chho ta a. Kan record ka han en hian kan sorkarin sports lama sum a sen tam ngaihtuahin a chhe em em mai a. Kum 2012-ah te kha chuan Mizoram-in kan thleng a, *champion* kan ni a, 2013-ah *pathumna* kan ni a, 2014-ah *parukna*, 2016-ah *pathumna*,

2018-ah *palina*; chumi awmzia chu Manipur te, Assam te nen kan inel a, a titha pawl kan nih loh pawhin *pathumna*, *palina* te kan ni tlangpui a ni.

Kum 2022 kan neih hnuhnun berah khan *parukna*, a mawngphah kan ni tep a ni. Hei hian sum tam tak seng chung a kan sportperson-te hmasawna a thlen si loh hian ngaih a ti tha lo a ni. ‘Mihring promote lo hian sum lamah kan buai ta emaw ni’ tih min ngaihtuah tir a ni. Medal te hi kan la tlem leh lutuk a, a zahthlak ngawih ngawih a. Manipur-in gold medal 88 an lak laiin keiniin 16 kan la a. Hetiang dinhmunah hian Mizoram hi kan ding ta mek a ni. Sum tam tak sengin sports-ah hma lak a ni a, Northeast-a kan dinhmun en hian India ram pum huapa kan dinhmun that loh dan tur chu kan hre mai awm e. ‘Nagaland-in medal 78 a lak laiin Mizoram-in 106 lai kan la a lawm’ tiin sawi mar tum an awm mai thei e. Amaherawhchu, silver medal za aiin gold medal pakhat a hlu zawk a, bronze te pawh kan han la ve bawk na a, gold medal la pha hi kan tlem ta hle mai a, pawl ka ti takzet a ni. Medal tamna - athletics, swimming leh combat games lamah tan kan lak a ngai tak zet a. Tunah hian kan *len-thlak* a rual lova, sports discipline 33 zet zawm zingah hian ‘a nei tawh sate pek belha, a nei lote chhuhsak’ an sawi ang mai hian tuna ka han sawi combat sport lamah hian tan kan la lo hle a, training te a pawimawh tehlu nen training hall nei mumal pawh kan awm lova. Mi sawi duh loh han sawi ila, ‘football te, volleyball te kan buai hle a, khang kha ‘tih loh tur’ ka ti tihna ni lovin, a la nei lo lam te hi i hawi ve ang u. Hetiang taka *len-thlak* rual lova hmalak hian ‘kan hmasawna a tithuanawp a ni’ tih hi uar takin ka han sawi duh a ni.

Pu Dy. Speaker, wawin hian i dinglama thute hian lawmna tur an hmuh tam viau rualin, kei hian lawmna tur ka hmu meuh lo a ni. Sports a ni emaw, eng thilah pawh hma kan lak dawn chuan kan target tur chu ‘mihring’ a ni. Tunah hian kan sportperson te promote si lova field tha tak nei ringawt hian ‘awmzia a nei dawn lo emaw ni chu’ tih ngaihdan min neih tir a ni. Chuvang chuan, ‘mihring buaipui lovin pawisa kan buaipui tan a ni lo maw’ tih zawhna te keimahah hian a rawn lang a ni.

Ka ngaih pawimawh em em chu, mihring promote tur chuan kan sum hmannaah hian promotional fund lam hi kan tihpun a ngai a ni. Sports discipline hrang hrang ten promotional fund an kham khawp lo em em a, a pung hlei thei lova, a tlahniam zel a. Kumin hi chuan additional te awmin pung angin a lang na a, kum a tawp tep tawh a, sports discipline hrang hrangte kuta pawisa a la lut lo; an hmang zo hman dawn lo pawh a ni mai thei e. Tin, promotional fund hi a tlem tehlu nen a hun takah sports discipline te kut hi a thleng ngai lova, national level intihsiakna awm turah an naute an tirh dawn pawhin pawisa puk chawp tein an tirh a ngai thin a ni. Chu chu kan dinhmun a ni. Chuvangin, ‘Sorkar tharah chuan promotional fund te hi chu a pung tawh ang’ tih hi ka sawi nghal duh a ni.

Pu Dy. Speaker, vawiinah hian ngaihtuahna tam tak ka seng a, kan len-thlak hi rual rawh se, a nih loh chuan thenkhat lunglawm lain thenkhat kan lunglawm loh dawn a ni. Sports discipline hrang hrang 33 te zinga ‘lawm’ titham an awm lo. Chuvang chuan, National Games hnunung berah pawh khan kan result han en ila, a mawngphah lamah kan awm a, North-East ah pawh a mawngphah lamah kan awm a ni. Chuvang chuan, dinhmun tha lo takah kan awm chuan, han khaichhuak tur khan infrastructure lam hlamchhiah chuang si lovin kha lamah khan na lo deuhin hma la ila. A leh lamah infiam mite promote turin incentive cash award te tipungin, ‘a mihring promote i tum ang u,’ tih hi uar takin ka sawi duh a ni. Ka rilrua a landan tak pheih chuan, tuna kan mamawh em em promotional fund te duh anga kan neih loh lain, fate riltam chaw pe lova, ‘tikhan lo awm rawh u, pheikhawk ka va lei lawk ang e’, ti ang deuh kha kan ni. ‘Tuna kan mamawh hi min pe rawh se,’ tih hi ka ngen duh a ni.

Pu Dy. Speaker, ka hun hman zawh kher pawh ka tum lova, ka sawi zo khatin ka hria. Theihtawpin kan Sport Minister hi tang zel sela, amaherawhchu, ‘mihring promote zawngin tan rawn la tawh rawh se,’ tih hi ka ngenna a ni. Ka lawm e.

DEPUTY SPEAKER : Member zahawm tak Dr. ZR Thiamsanga ka sawm e.

DR. ZR. THIAM SANGA : Pu Dy. Speaker, ka lawm e. Chair i luah lai ngeia han sawi hi ka chak a, ka nang chiah che hi ka lawm lawm khawp mai. Ka ding lamah i thu reiin, kum 4 zet i thu bawk a, vawiin hian, ka duhsak rual rual chein, ka ngai khawp mai che.

Vawiinah hian Member zahawm tak, Pu Zothantluanga, MLA zahawm takin, “*Mizoram Sorkar kal meka Sports Infrasrtucture din kawngah hmasawmna nasa tak kan nei hi lawmawm kan ti*” tih a rawn pulut hi a lawmawm khawp mai, sawi pawh a chakawm khawp mai a, darkar khat sawi hial te pawh hi a chakawm a ni. He sorkar tharin thalaite hmakhua ngaia, thalaite’n eizawmna thar an neih theihna tur leh international level-a Mizoram kan pho-chhuah theihna hmanrua pawimawh tak mai, hetiang khawpa he kan sorkara kan Chief Minister leh kan Sport Minister ten theihtawpa hma la a, hetiang khawpa hma kan sawn hi a lawmawm ka ti hle a.

Member tam takin an rawn sawi tawh a. Sport policy 2019 kan neih ta te, sorkar hna group ‘B’ leh a hnuai lam laknaah 5% Sportperson tan reserve a ni te, department lam atanga agreement siam thar ngai, tunah kan la nei loh te pawh a ni mai thei a, kan neih chho zel turah te pawh ngai ila, a lawmawm khawpin ka hria a. Sports ‘Industry’ nihna han pek te, MSSC technical authority-a han dah te leh incentive chungchangah te pawh tunah hian Sportperson-te tan Gas Agency Scheme kan nei chhoh zel te pawh hi a lawmawm khawpin ka hria a.

Kan sawi tawh ang khan Jeremy Lalrinnunga chuan Youth Olympic Games-ah gold medal a la a, Nula Lalremsiami pawhin hockey, Tokyo Olympic-ah India hmeichhia team-ah telin medal a la bawk a, sorkar hmasa hun chhungah khan international level-ah chawimawina han la phah te hi kan awm em aw, tih te ka ngaihtuah a. An awm a nih pawhin, sawi tham an awm pawh ka ring lova. He sorkarin thalaite tan hian sports hi eizawna tlak a nihzia te hriaa, sports promotion atana sum tam tak an han haichhuak hi a ropui khawp mai a. Ka chhut a, cheng nuai 5,54,004.3 lai mai scheme hrang hrang atanga kan han hmuh theih hi a lawmawm a.

Sport promotion tur chuan infrastructure a ngai hmasa a. He sum hi sorkarin a hmang chho a, a hmang mek a, infrastructure a tha ang a, field te, khelmual te engkim mai kan nei tha ang a, stadium tha te kan neih chhoh hunah ‘thalai ten hma an sawn chho dawn a ni’ tih kha a chiang a. Chung atan chuan hmalakna tam tak member zahawm tak takte khan an rawn sawi tawh a. ‘He sorkar hianin thalaite hmakhua a ngai a ni tih hi kan hriat a pawimawh a. Chhungah chuan hmasawna ropui tak central scheme atanga sum tam tak an han lachhuak te hi engatinge Pu Speaker, kan la lawm thei loh le? A mak ka ti. Sorkar hmasaah khan Zotlang, Champhai-ah Sport Stadium min siamsak a, kan lawm khawp asin. Tuna kan sorkar hian sum tam tak thalaite tana hmasawna tur a hailut a kan la lawm thei lo hi chu a lungchhiat thlak khawpin ka hria. Mi thil tha tih te lawmpui lova, a engemaw zawnga kan inbei thin hi chu ‘a dik emaw ni chu aw,’ ka ti a ni.

PMJVK hnuaiah hianin keini Champhai leh district thenkhat te pawh min la cover loh avangin kan la dawng hlawm lova. Tunah erawh chuan min cover ve tawh a, tun kumtharah te hi chuan he scheme atanga la dawng lo district te pawh khan kan dawn ngei ka beisei a. District dangah tam tak a lut a, ‘kan district-ah a awm lo ve’, in lo ti mai thei. Amaherawhchu, ‘a scheme-in a cover loh vang a ni’ tih te pawh kha kan hriat a thain ka hria. Tichuan, Zotlang Sport Stadium kan nei kha ‘kan lawm hle’ ka tih rual khan, running track meter 400 lane a siam tur si kha, a inner lane kha a lo tling lo der mai a, record tha tak kan siam kha a ni a, hmana Mizo State Games record pawh kha kan khum viau a ni. Amaherawhchu, heta a taka kan han tih khan kan hnung ta em em mai si a. Kan Sport Minister chak tak hian he Zotlang Sport Stadium hi Champhai District-a kan neih chhun a ni a, churang chuan, running track min siam that sak ngei turin ka rawn ngen a. Football field pawh khi standard-field a tling lova, kan lawm em em rualin ‘standard field min rawn siam sak se tiin ka ngen bawk a ni.

Tichuan, Champhai-ah khian New Sport Complex, Champhai Distrcet-in kan nei ve a, khing te pawh khi tun kumtharah hi chuan beiseina sang tak kan nei a, master-plan te siama Sport Complex mumal tak nei chhoh te pawh kan beisei a ni.

Tichuan, Champhai hi combat games lamah hian sulhnu neitha leh talent tamna, khawchhak tlang dung tunhma atang tawha mithiam leh michak tak-tak leh talent nei

tha tak-takte lo chhuah tawhna a ni a. Chuvang chuan, Champhai District tan hian SAI Centre emaw dah tura hmalakna awm ruak tawh hi hlawhtlin te pawh kan inbeisei ve tawh a. Chuvang chuan, hei hi ka rawn sawilang a ni.

Tichuan, mahni district-a thil dang dang te pawh han sawi ve ka duh a. Champhai District-a Hmunhmeltha-ah khian Sport lama muthlu mekte kaitho tur Hockey training Centre te pawh khi han dah ve ta ila; a hmun tur tha tak kan nei a. Tihah te chuan hei, kan bial chhung Rabung-ah te khian karate trainer te pawh kan lo nei tawh a ni. Chuvang chuan, sorkar hian hma min lakpui sela ka duh khawp mai. Tin, hei *Khelo India* te pawh kan hriat angin central sorkarin Sports tih hmasawna atan district tinte tan Sports discipline hrang hrangah centre an nei a, chungah te pawh chuan Badminton-Khelo India Centre-ah Champhai District hi min siamsak turin kan Sport Minister hi ka ngen duh bawka a ni.

Chubakah chuan, Champhai hi tunhmain boxing-ah te pawh record lo siam ve zak zak kan ni a, khing te pawh khi kumtharah chuan han tihchangtlun te pawh khi kan duh a. Amaherawhchu, kan hria a, hun harsa ani a, sum leh pai a harsa a, State Sports budget atangin thiltih a harsa a. Amaherawhchu, chuti chung chung pawhin kan department te leh kan Sport Minister te pawhin theihtawpin hma min han lak pui tawh a, a tak ram te pawh hi kan thleng ve mai turah kan ngai a ni.

Pu Dy. Speaker, mahni bial han sawi kha a nuamin a inthlahrunawm viau lai in, khing Hnahlan-ah te khian Mizoram State level football-a inkhel pha kan nei tha khawp mai a, kan field te pawh khi tlema han thuam that a, phullem han phah te pawh hi tun financial session tharah te chuan kan neih ve ngei pawh kan inbeisei a ni. Sawlam ang bawkin keini pawhin, he sorkar hian sports mite tan thahnemngai tak leh vision tha tak neiin hma min lo lak sak se. (Pu Dy. Speaker, hun ka hmang dik dawn a nia.) Tunah chuan, ‘Act South’ kha ‘Act East’ ah a rawn thleng ve tawh turah te pawh ka han ngai a. A project-in min huam ve tawh bawka a. ‘Look East’ hi kan ni reng a, ‘Act East’ niturin Champhai District pawh hian beiseina sang tak kan nei a ni. Pu Dy. Speaker, ka lawm e.

DEPUTY SPEAKER : Member zahawm tak Pu BD Chakma ka sawm e.

PU B.D. CHAKMA : Pu Dy. Speaker, ka lawm e. I chair-na hnuaiyah vawiinniah thu ka sawi thei hi ka lawm a, kan bial mite aiawhin, kan Autonomous District Council lam atangin Dy. Speaker kan nei hi lawmawm ka ti khawp mai a. Hun lokal leh zel turah pawh Speaker-a kai sang turin ‘ka lo tawngtai pui ang che’ tih kha ka sawi duh a ni e. Pu Dy. Speaker, lawmthusawinaa ka hun hman kha discussion hun atangin min paihsak turin ka ngen a ni.

Private Member Resolution Pu Zothantluanga putluh “*Mizoram sorkar kal meka sports infrastructure din kawnga hmasawna nasa tak kan nei hi lawmawm kan ti*” tih hi, kei pawh lawmawm ka ti khawp mai, Pu Dy. Speaker. A hmasain Chawngte ‘C’ ah artificial football ground min petu Sports Minister chak tak kan nei hi lawmawm ka ti khawp mai a, ani pawhin min lawmpui a. First-timer member mah ni se official dawr lamah a expert em em a, chuvangin Sports lamah pawh hian nasa takin hma kan sawn a ni.

DEPUTY SPEAKER : Member zahawm tak kha lo chawl lawk la, chair kan han inthlak lawk ange aw.

(*Chairman Pu. L. Thangmawia’n Chair a la a..*)

PU B.D. CHAKMA : Minute khat hun min pek belh a ngai a dawn a ni.

Tin, ‘*development gelatine*’ Chawngte ‘C’ ah artificial grass football ground hmangin a puak a, a hnaivai bialah te *side-effect* a nasa hle mai a, Pu Chairman. Chutiang chuan Pu Dr. K. Pachhunga bialah te, Lawngtlai West bialah te, Tlabung bialah te leh Pu Mama bial te pawh a ni a. Amaherawh chu Mizoram chhungah BJP bial awmchhun ka bialah chuan hma lakna tur a lang ve lova, ka bial mipuite pawhin mak an ti a. A bik takin Pu K. Pachhunga bialah hian *side-effect* a dawng hnem bikin ka hria a. Chawngte ‘L’ hi a biala *last-village* a ni a. Chutih laiin Chawngte ‘C’ ah ringawt development a kal a, Chawngte ‘L’ helipad te pawh hlui tawh tak, repair ngai em emin a awm a ni. A bialtu Dr. K. Pachhunga hi ruling member te a nih avangin inthlahrun gin a sawi hreh te pawh a ni thei a, chuvangin, Pu Chairman, amah aiawhin hei hi ka sawi duh a, “Chawngte ‘L’ ah hian artificial grass football ground pakhat tal chu siam ni ve se” tih hi. Kan Minister chak tak khan khawngaih takin hei hi min lo chhin chhiah sak sela.

Tin, Chawngte ‘P’ hi khawpui a ni a, Pu Ngunlianchunga member zahawm tak bial a ni a. Ani hi kan senior member a ni a, a bial Chawngte ‘P’ a football ground-ah helicopter landing atan pawh a hman tlak lova, khawngaih hei hi artificial grass-a thawm that ve ni se kan lawm tlang ngawt ang a. Chuti rualin keima bial Lawngpuighat leh Borapansuri-ah te hian artificial football ground hi min siamsak ve thei se, ‘lawmthu han sawi ve te pawh kan chak tawh a ni’ tih kha min lo hriatsak sela.

Tin, a bialtu Pu Nihara pawh khan tap lek lekin a sawi thin a. Tlabung *Kum 150-na* lawm a ni tawh a, mahse, tun thleng hian artificial grass playground a nei lo pawlah an la awm a, an khawngaihthlak em em a ni. Tlabung-ah tal hi chuan khawngaih takin kan Minister chak tak hian daksak thei se tih ka sawi duh baw k a.

A tawpna tan chuan, Pu Zodintluanga bialah pawh hian amah ngei Sports Minister a nih lai khan a ngaihsak lo deuh nge ka hre lova, Marpara South hi khaw lian tak a ni na a, he khua hi by-pass in a piah khawi khuaah em maw ni a pe a, pawh kan ti khawp mai a. Chuvangin, Marpara South khu khawngaih takin kan Minister chak tak hian *red-ink* ngeiin min lo chhinchhiah sak se ka duh khawp mai.

Pu Chairman, tan lam nei lem lova thudik sawi mai thin ka ni a, Sports lamah hi chuan hma kan sawn a ni. Chutih laiin PMJVK Scheme hnuaiah hian sum tam tak a luang ral tawh a. Hei hi Tribal Ministry lam scheme a ni a, Social Welfare Department atang te, DM&R Minister chak tak leh senior tak hnen atangin tein Sports Department hian engtingge a hijack theih aw ka ti a. Duhthusam chuan Social Welfare Department hnuaiah emaw, DC&MA Department hnuaiah emaw implement ni se a duhawm khawp a. Kan senior Minister ani a, hun lo kal zel atan hei hi ngaihtuah that ni thei se. Sorkar ‘hidden policy’ te pawh a ni mai thei a. sawichhuah vek a rem lo ve thei bawk a.

Tin, Education leh Sports hi han compare ta i la – hei, *Starred* leh *Unstarred* question te pawh ka han chhiar a. Primary School-ah hian zirlai sing tel an awm a, High School hi a sang telin a tlahniam thung a, dropped-out hi an tam hle tih a lang a. Sports Industry hi tih hmasawn zel niin, ‘department’ ang ni tawh lovin ‘industry’ angin kan kal tan a. Chutih lain Sports lam chauh hi ngaihtuah lova education lam pawh hi ngaihtuah a ngai a ni. Chuvangin, PMJVK Scheme first priority chu ‘education’ a ni a, second priority hi ‘health’ a ni a. Mahse first leh second priority by-pass in Sports lama a kal dan hi tlema in enchian kan ngaiin ka hria a ni.

Sports infrastructure develop turin Union Minister chak tak, Pu Anurag Thakur pawh hi mi fel tak leh thiam tak a ni a, Sports atana sum lakchhuah dan kawng dang a awm lo em ni aw ka ti a ni; Sports Ministry atangin emaw, Urban Ministry lam atangin emaw pawisa hi lakchhuah dan kawng a awm ka ring tlat a ni. Chuvangin, PMJVK hnuai pawisa awm ho kha Sports lamah priority pe lovin, Education leh Health lamah priority pek ni thei zawk se a lawmawm khawp ang. Chu chu ka sawi theih tawk ni se. Ka lawm e.

CHAIRMAN : Member zahawm tak Pu Lawmawma Tochwawng kan sawm e.

PU LAWMAWMA TOCHHAWNG: Pu Chairman, vawiinah member zahawm tak Pu Zothantluanga Resolution putluh - “*Mizoram sorkar kal meka sports infrastructure dinna kawngah hmasawanna nasa tak kan nei hi lawmawm kan ti*”, tih kan han sawi ho thei hi a lawmawm ka ti a. A lawmawm ang hu hian ka sawichhuak thiam lo ang tih erawh chu ka hlau khawp mai.

Kan zawlneite thusawi angin chhim a eng a, hmar a eng a, khaw thlang leh khaw chhak te la eng leh zel tura ngaih a ni a. Sports hmalakna chungchangah hian a bik takin chhim lam chu kan lawm tak zet a ni. A bik takin keini Lunglei District chhunga mi phei chu kan lawmna a nasa leh zual a. Bial tinah sports hnuhma hmuh tur a awm a. Lunglei South, East, West leh North-ah te pawh ‘hei hi MNF sorkar hruai chhunga din leh tih a ni’ tia sawi tur leh, nakin thlenga sawi tur eng emaw zat kan nei a, kan nei mek zel bawk a. Tih hlawhtlin leh tih hlawhtlin zel tur kan nei te pawh saw a lawmawm kan ti tak meuh a ni.

Sports infrastructure-a chak taka hmalakna kan lawmna chhan chu, a rah chhuahna tur Mizoram hi Mizote ta anih reng theihna tura rahbi pawimawh em em zinga pakhat anih vang a ni. Chu chuan hma lam thlir min tih en sak a. Kan duh emaw, duh lo emaw keini ho hi chu nakin lawkah mual kan liam mai dawn; mual kan liam hnua Mizoramrawn luahlumtu turte chu kan Mizo thalaite, tleirawlte, naupangte hi anni a. Chutiang hun lo la kal tura kan thlahte mihring puitling leh mi tak ni tura kan chherchhuahna hmun pawimawh leh a lai lum luahtu chu ‘sports’ hi a ni.

Ram leh hnam leh Pathian tana mi hman tlak chher-nahawm ni tura kan chher chhuahna pum pawimawh tak chu ‘sports’ a ni. Senso a lo tam deuh anih pawhin India taka aia hlu mihring puitling kan nei dawna lawm le. Chutiang mihring tak tak inchherchhuahna tura tan sports hmanrua kan han in chhawpchhuak mawlh mawlh mai hi chu lawm loh rual a ni em aw ka ti. Tung chhoa mihring piangte hi chu siam kan nih chhan ang taka kan khawsak a, kan nun theihna turin thlarau, rilru leh taksaa kan puitlin a ngai a. Mi famkim erawh kan ni kher lo vang; chutianga puitling ni tur chuan inpuahchah a, inbuatsaih a, inzir a ngai a ni. Chutiang tur chuan sports hi kan inzirna tura tangkai a ni. Tun dinhmunah chuan zirna leh thiamna te min petu chu sports anih avangin, sports lama hma kan sawn theihna tur a he sorkarin chak taka hma a la hi a lawmawm thlawt a ni.

Khawvel a changkang ang zelin kan hmanrua leh kan thil neih te pawh a changkang tur a ni a. Sports-ah pawh hmanlaia in suk-nawrna leh in suk-hawlhna ang chi chauha kan awm anih chuan a fel lo ang a. Chuvang chuan, kan hmanraw neihte pawh a tul dan ang zela kan tih changkan te pawh a tul a. Chutiang tura he sorkarin hma a la mek hi chu hmuh theih, hriat theih, khawih theihin a awm bawk si a, “kan lawm thei lo em ni?” tih hi zawhna lian-pui a ni a. Sports hi mihring chherchhuahna, mihring tana inzirna hmunpui anih ve avangin education pakhat, zirna peng pawimawh tak pakhat chhiar a ni ta mek reng anih hi.

Chutiang taka pawimawh leh tangkai a nihzia hria a, Mizoram sorkar MNF hruaiin thalai leh infiam mite tana hmanraw tha zawk, changkang zawk, international standard min chhawpchhuahsak ta mawlh mawlh mai hi ‘a va lawmawm em’ kan ti a ni. Sports hmasawna atana central fund kan hmuh leh kan hman thin te pawh hi

Mizoram sum tihek zawng ni lova State sum dinhmun siam-tha zawnga hman leh neih a la ni mek zel a la ni nghal vei nen; lawmna ‘thuah-hnih, thuah-thum, ‘kan chhiar peih pheih chuan ‘thuah-li, thuah-nga’ thleng pawhin sawi tur a awm niin a lang.

Chutiang taka tangkai leh chhawr nahawm chu ‘*benga hre ngai lo ten an hria ang a, mita hmu ngai lo ten a takin an hmu ang*’ tih ang maiin Zoram hmun tinah ‘the greatest show on earth’ an tih mai thin, football khelhna Astro-turf phul lem pawh hi a hring ta dep dup mai a ni. Hei hian kan thalai infiam mite rilru leh taksa a tiphur a, a ti thatho a, mimal, chhungkua leh ram ti hming-tha chungin sum an rawn hailut a, an intodelh ta mek a ni. Heng zawng zawngte hi ‘sorkarin hun harsa tak leh hun khirh tak chung pawha an hmanrua tur leh an infiamna tur te a buatsaih sak a, a pek a, a siamsak vang a ni’ kan ti lo thei lo ang. Phul lem phah chungchanga

Lunglei hmun hrang hrangah kan neih lai hian rilru tina em em mai pakhat a awm a - Hman atanga kan lo thlir ngawih ngawih mai Zobawk Sports Academy kan zo dawn tawh emaw kan tih mek laiin harsatna, sukukna kan han nei a, kan bial, Lunglei East-ah a ni lehngal a. Ka kal pelh a piangin ka rilru a tinain, ka hnuk a ti-ullh fo a ni. “Saw saw han puitlin the ila chu aw, Lunglei tana ro-ting, thalaite tana chhenfakawm a nih dawn tehlu nen” ka ti thin. Sut kian thuai thuai ka chak khawp mai.

Sports lama chak taka sorkar hmalak mekna hi a lawmawm em emna dang leh, chu khawvel ramdang mite tih theih ang chu ‘ka ti ve thei a ni’ tih chona leh hmachhawn ngamna, rilru lama harh zelna leh taksa chak leh hrisel zawk kan thalaite’n an nei ta mek hi a ni. International level-ah gold kan la - Lalremsiami te, Jeremy Lalrinnunga te, football-ah chuan Lallianzuala Chhangte te pawh India-ah chuan a langsar leh hlawh tam-tam an lo ni ta a. A aia tha lehzual kan neih pheih chuan, heng aia tam lehzual hi khawvelah hian, Mizoram zim te hian ‘kan chhawp-chhuakin kan chher-chhuak ngei ang’ tih ka beisei tlat a ni.

Tin, a huho a kalnaah pawh tunhma ai chuan kan infiam mite’n kut ruaka lo haw lovin, hum-haw an rawn nei ta ziah a, ‘hei hi a tawk e’ kan tihna chu a ni lo, hmasawn zel tur chu kan ni. Hma kan sawn zel theihna tur atana he sorkar-in thalai infiam mite ngaihtuhsaka, an infiamna tur hmanrua leh thil dang dang infrastructure chak taka a kalpui hi lawmna chang hriat a tul tak meuh a ni. Hmuh theih, khawih theih leh sum sen tam ringawt hi kan lawman a ni mai bik lova, kan sorkar chhunga tunah leh Zoram khawvel hmalam hun lo la awm tur atan ro tling kan siam mek hi kan lawmna tizualtu a ni.

2019-2022 inkara he MNF hruai sorlarin thalai infiam mite tana a lo tih tawh leh, tih tura a chhawp-chhuah mekte hi sawi vek dawn ila sawi sen a ni lova. Kan ngaihtlak tawh ang khan a lar zualpui chauh han tarlang ta ila –

Thil tih dawn reng reng chuan ruahmanna mumal, tum mumal, ke pen tumna mumal a ngai thin a, chutiang tur atan chuan policy zam a ngai a ni tih hriaa ‘Sports Policy, 2019’ han siam te hian, ‘hmathlir thui tak Zofate tan he sorkar hian a nei a ni’ tih tilang chiangtu a ni. Sorkar hnaah a mamawh leh a phute tana pek tura 5% han hauh pawh hi infiam mite tiphurtu leh hmalam pen tirtu a ni a, thil tha a ni. A aia tam pawh a tul dan ang zelin la tih a ni ang chu.

Sports *industry*-a hman hian sports mite tana hamthatna leh sports ti mite tana phurna leh chakna a pe a. Tin, sport atana thil tangkai em em, sum hailuhna tur atana kawng sialna tha tak a ni bawk a. MFSC technical authority pek a ni ta te hian infiamna hmunhma, khelmual, race track-te tling tawk lova siam thin kha tunah chuan a tling ngei a siam turin he authority hian mahni kutah mawhphurhna lain hma a la ta mek a ni. Mahni leh mahni tana thil tha tih theihna tur atan leh ram mipuite tana thil tha pek chhuah theihna tur atana thil tha tak a ni.

Tin, “Revision of Cash Incentive Award Scheme for Sportsperson,” 5th September, 2022 hnuai Jeremy Lalrinnunga, Weight Lifting-a Gold Medalist cheng nuai 40 kan han pe te, Lalremsiami, India Hockey Team hnena cheng nuai 17.50 pek a ni te hian infiam mi thalaite a tiphurin, sports hlutna leh tangkai zia a phochhuak chiang hle a ni. Pu Chairman ka zo dawn ang e.

Tichuan, ‘engnge kan la sawi cheu ang’ kan tih chuan, hmun 108-ah infiamna ruhrel - football, volleyball, motor sports, outdoor and indoor gym, futsal etc. cheng vaibelchhe 55.04 hmanga kalpui mek a ni te hi thalai infiam mite hmakhua ngaia he sorkar hmalakna a ni a, a chhuanawm a ni. Nichina kan ngaihthlak tak Tlabung lam, West Tuipui bial atana tun sorkar thara kan khek khal pawh hi hai-chhuaha pek thuai a chakawm khawpin ka hria.

Pu Chairman, heng thil zawng zawng hi mizo infiam mite, thangthar lo awm zel tur leh Mizoram mipuite tan a ni a, hetiang hmasawmna ruhrel min chhawpchhuah saktu Sports Deptt. te, Sports Minister te, kan Chief Minister te leh Mizoram sorkar chungah heng thil, tih takzeta an thil tihte avang hian, tih takzeta lawmthu sawi hi kan tih makmawh a ni; Lawm chungin hna i thawk zel ang u.

COVID hripui khan kum 2 leh a chanve zet min tlakbuak lo pheise chuan kum 2 che che chauh hnathawhna hun a awm a, Pathian zarah he sorkar hian “infiam mite tan thil-tha leh tangkai min chhawp-chhuah sak a lawm maw” tiin, he Resolution hi lawm taka thlawp turin ka sawmin, ka ngen che u a ni e. Ka lawm e.

CHAIRMAN : Member zahawm tak, Dr. Vanlalhlana i sawm ang.

DR. VANLALTHLANA : Pu Chairman, ka lawm e. I thut laia din ka han chak ve deuh bawk a. Kan hmaa thil awm hi, heta tanga thu han sawi, han inchiar pawh a lo theih reng a, lehkha ziak lovin ka han hmang ve a ni.

Vawiin chu a number lam ka sawi vak lo ang a, Demand lama sawia tan khek ta ila. Pu Zothantluanga, MLA zahawm takin Resolution a putlulh – “*Mizoram sorkar kal meka sports infrastructure din kawngah hmasawwna nasa tak kan nei hi a lawmawm kan ti*” tih hi ruling lam tarmit atang chuan a awm hle mai; ‘a va tha em’ tih a ni a.

Kan Sports Minister zahawm tak hi 2019-2020 budget-ah khan ‘a budget a va tlem ve’ kan ti a, kan han vuipui luai luai a, a lo ngaihtuah awm lo khawp mai. Supplementary Demand lamah, SEDP lam atang te leh department hrang hrang, UD&PA atang te pawhin cheng vaibelchhe 120 chuang a pawtchhuak thei a, ‘a lo ngaihtuahawm lo hle a ni’ tih a lang a. Ei leh bara intodelh kan tum laiin Sports Deptt. lamah a let te kan han dah thei a, a ngaihtuahawm lo viau mai. Amaherawhchu “hmasawwna khairual zawngin a kal em” tih kan rilruah a rawn lang tel a. Sports ngainatute tan hetiangin sports infrastructure kan neih chuan “engtin nge a kal zel dan tur ni ang” tih ngaihtuahna kan nei a. Chutiang ngaihtuahna neih chuan he Resolution hi chu ‘a fuh chiah lo a ni’ tih rilruah a awm a. Kan minister a chak, thil pawh a haichhuak hnem; amaherawhchu a fuh tawk lohnate han sawi ka duh a.

Pakhatna-ah chuan, sports ngainatu tarmit vuah erawh chuan, kan Resolution leh kan ram dinhmun hi thil inawm lo tak a ni. Sports infrastructure kan neih tam belh phah teh meuh a, mahse, ruhrel kan neih tam avang hian “kan infiam mite chawisanin an awm em, an that phah em, medal kan lak tam phah em” tih kan ngaihtuah tel a ngai a. Member zahawm tak Pu VL Zaithanzama’n a rawn sawi tawh a, ka sawi tawh lo mai ang a.

Sports promotion fund-ah hian luh tel ka duh a, a chhan chu, Sports & Youth Services Deptt. te, Mizoram State Sports Council te hian engkim an ti thei lova, kut ke an mamawh a, infiam mite han huikhawma thil tam tak hma han lakpui turin, khalamah khan sports association te an mamawh a ni. Chutah chuan association 33 kan awm a, kum khatah cheng nuai 211 hi sports promotion fund-ah hman a ni. Hei hi phullem pakhat phahna senso chanve vel a ni a, “a vaiin sorkarin a tum hlei nem, central atangin kan dawng tho a lawm” tih nimah sela, “PMJVK-ah state matching share-ah engzatnge kan sen, SEDP-ah sum engzatnge kan laklulh” tih te kan ngaihtuah tel a ngai a. Chumi ngaihtuah chuan promotional fund-ah hian sum hi a tlem hle a ni tih a hriat theih awm e. Tin, sports association-te hian sum an han dil a, sum an hmu tlai, tunah hian nuaih chuang fe ba an awm teuh a ni. Chung ho chu engtinng e kan khaichhuah dawn? Infrastructure-ah chak mah ila, a hnuai lama lo dawm-kang tute kan ngaihthah leh si chuan, ‘hmasawwna a khai rual theilo a ni’ tih kha ka han tarlang tel duh bawk a.

Kum 2019-2020 atanga tun thlenga promotion-a kan hman kan ngaihtuah a ngai, chu chu kan infrastructure-a kan sum hman tawh nen hian ‘a inkhai rual em; a inhen em’ tih te hi kan ngaihtuah a ngai a ni. Tute emawina hlawhtlinna an hmuha lawmpuina thu an thawn te an han ti-darh leh chiam ai hian, association-te ngaihtuah tel hi a tul a, association anmahni lo dawm kangtu, anmahni lo chher-chho tute ngaihtuah tela, anni tana pek ve hi kan tih tur a ni a sorkar atang chuan.

Tin, medal dawng hnem ber contact sport lampang te hi ngaihthah an niin hriat a ni a, anniho tan hian (football field kan siam tam ang hian) engzat nge kan sen ve tawh? Anniho an inenkawl na tur te bakah training an neihna tur atan hian “engangin nge hma kan lak; a rual khai em” tih te hi kan ngaihtuah a ngaiin ka hria a. Infrastructure ringawt kan ngaihtuah chuan thil a dik theilo a ni, ‘infrastructure neih ringawt hi a tawk em’ tihah hian.

Pahnihna-ah chuan, tunhnaiah hian international standard swimming pool kan nei kan ti a, North East Games-ah khan medal engmah kan la lo a ni. A chhan chu, association lamin sum an nei tlat lo. Inchher a ngai, buaipui a ngai, thil tam tak tih a ngai a. Ka sawi ang khan a ruhrel lam leh infiam mite dawm kanna lam hi a kal kawp a ngai. Contract kan atchilh a, consultancy kan siam chawp a, an DPR te pawh inang thup thupin a kal a. Tunah hian ‘restricted tender hian Competition Commission Dan a kalh em’ tih te hi kan en a, nakinah tu-tute hmaah emaw chuan insawifiah pawh a ngai mai thei; chutiang chu kan kalphung a ni.

Kan Minister zahawm tak hi kum 2019-a MLA ka nih tirh khan “Ramhlun Sports Complex-a infiam mite ho tan hmalak ka duh e; state matching share-ah pawh 10% hi MLA fund atangin pek dan a awm a, chu pawh chu ka phal e” tiin amah pawh ka va hmu a ni. Aniin 2019-a min lo hrilh dan chuan, “E, a ngai lo e; hma kan la dawn, keimahniin kan lo ti ang e” tiin thlamuang takin min thlah a ni; tun thlengin kan la nghak. Basketball court chhuat MLA fund-a chei that nan kan hmang a, tunah boxing hall-ah gym a chhia a, ‘a tihna tur rawn ti rawh u’ kan inti a, ‘punching bag pawh a khawng lutuk; a hrehawm lutuk’ an ti a, pahnih a thar tih dan tur kan ngaihtuah a. Tennis court a chhuat rawng hnawihna tur kan pe a, wrestling hovin mat-ah harsatna an nei a, chutah pawh chuan pawisa kan pe a, tunah weightlifting hovin harsatna an rawn sawi leh a, chu chu kan dinhmun a ni.

Tuna kan neih sa pawh kan enkawl theihloh lain, ‘engtingge tuna kan tihbelh ho hi kan enkawl ang’ tih te hi ngaihtuah tel a ngaiin ka hria a. A maintenance lam hi ngaihtuaha, sum kan sen dan turte kan ngaihtuah tel a ngai. Ramhlun Sports Complex, Mizoram-a sports complex kan neihah chuan a lian ber anih ka ring; kan enkawl dan ngaihtuah hi chuan “engtin nge hma kan lak ang; tuna kan neih sa te hi engtin nge kan enkawl ang” tih hi kan ngaih-tithalotu a ni. Hmanni lawkah engineer-ho kan ko a, kawr te pawh a lo relh ru a ni, a thlang lampangah leimin tuar reng thin veng an awm a,

Ramhlun Sports Complex Veng, sawngho tan pawh sawn a hlauhawm thei a, building pawh a khi tem-tuam a, saw-saw “engtin nge kan enkawl; engtin nge hma kan lak zui” tih hi kan ngaihtuah a ngaiin ka hria a.

Tin, Ramhlun Indoor Stadium-ah sawn Mizoram Badminton Association leh TATA Trust-ten a hmain hmalakna an lo nei a, tunah pawn an nei tho a. Academy an din a, chu academy-ah chuan Siaha lam atang te, Champhai lam atang te pawhin an rawn kal a, Aizawl mi tam tak an awm bawk a, hmun hrang hrang atangin an lo kal a, school kal thulh thakin chhunah academy-ah an in zir thin a. Tunah sawn allotment mumal pawh an nei tawh lova, phai lampanga academy kal chhunzawm thei annih laiin an rawn kal thlawn fo mai a, heng te pawh hi kan ngaihtuah a ngaiin ka hria. “A promotion kan ngaituah nge, a sak chauh kan ti dawn” tih te pawh rilru sen a thain ka hria a.

Pu Chairman, hun tlemte ka han dil belh che ang a, ka hmaa mi khan minute 12 a hmang a khita tang khian ka lo en a, tlem a zawng chu ka han tihbelh lawk ang e. ‘PMJVK’ leh ‘Smart City Project’ kan hria, PMJVK Dan-ah chuan, a hma 2020-2023-ah ruahmanna guidelines thar a awm a. A hma chuan sports a tel miah lova, kan hre theuh awm e, chhiar chhuah pheih chu a chi tawh lo ang a, nakinah kan sawi dawn nia. A tharah chuan ‘sports’ tih kha a hranin a rawn ziak a ni, (Minister-in a rawn sawifiah tho ang a, keinih chuan hun kan nei tlem a) PMJVK 1.2.5-ah khan, a hranin ‘sports-ah pawh a hman theih’ a rawn ti tawh a ni. A hma khan a awmlo chu a ni lova, kan inzep tawt-tawt a, Smart City-ah pawh guidelines awm lovin theih ang angin kan inzep lut a, hmasawnaah kan mamawh em em laiin kan in zep lui hi chu a paw ka ti tak zet a. He sorkarah hian zirna a langsar ber lova, mipuite intodelhna a langsar ber lova, mipuite hriselna buaipuina a langsar ber lova, skill development entrepreneurship a langsar ber lova, sports infrastructure a langsar ber hi chu kan inennawn a ngaiin ka hria a.

A concern minister-in thusawina hun a nei dawn a, a rawn react atan thil sawi lawk duh ka nei a. Promotional fund hi ‘tihpun tumna a awm em’ tih hi sawi tel a ngaiin ka hria a. ‘Kan residential school te enkawl na atan ruahmanna a awm em; hna lak tawhte a ni em’ tih te, ‘Ramhlun Sports Complex hi eng anga enkawl nge a nih dawn; DPR te kha kan nei tawh em’ tih te leh, Ni 20.8.2021 khan Lalremsiami leh Jeremy te hmuah annih khan kan Chief Minister zahawm tak khan, “Aizawl-ah hian hockey ground pakhat mai nilo, pahnih te, pathum te kan siam dawn a ni” a ti a, ‘khami atan khan hma lak a ni tawh em’ tih te kha ka han zawt tel zawk a nih chu. Ka lawm e.

CHAIRMAN : A tlai tulh tulh a, kan luangliam tawlh tawlh dawn a ang e. Hun hman dik hram hram tum ila a tha ang e. Tunah member zahawm tak Er. H. Lalzirliana ka sawm e.

ER. H. LALZIRLIANA : Pu Chairman, ka lawm e.

Khati laia I han thu vung mai kha i inhmeah ka ti hle mai a, i chair kha a uk khur mai a, i kap eng viau pawhin ka hria a ni. Vawiina kan sawi tur hi kan member zahawm tak Pu Zothantluanga resolution “*Mizoram sorkar kal meka, sports infrastructure din kawngah hmasawna nasa tak kan nei hi lawmawm kan ti*” tih a ni a. Vawiina kan sawi tur hi ‘lawmthu sawina’ a ni a, demand sawina a la ni chiah lova; lawmthu ngawr ngawr ka han sawi ang a.

Vawiina kan sawi hi a hardware part kan sawi a, *infrastructure*, hemi a hardware part sawi tur hian a software a tel a ngai a, an incomplement a ngai a ni. Vawiina kan sawi zawng zawng hlawhtlinna, physical structure kan han hmuh hi a rawn awmna tur hian a software design hmasak a ngai a, chuta tang chuan hardware vawiina kan sawi hi a lo piang ta a ni. Chu a software-a chu - Mizoram Sports Policy, 2019 han duan-chhuah a ni te, Sports ‘industry’ nihna ...

CHAIRMAN : Thutna thlak lawk ang aw.

(Dy. Speaker-in Chair a la a.)

DEPUTY PEAKER : Aw le, sawi chhonzawm rawh le.

ER. H. LALZIRLIANA : Pu Dy. Speaker, ka han sawi chhonzawm ang a. Sports policy kan neih te, sports hi *industry* a kan puan avangin vawiina ‘infrastructure’ kan tih hi a kaih-chhuahna pawimawh tak, ‘*A-nghakuai*’ a ni ta a ni. Central-a kan project EAP anga kan han dil te, heng zawng zawng lo consider tur hian a software an neih thatloh chuan Central atanga hnuh chhuah hi a har khawp mai. Vawiina ‘PMJVK’ kan tih te he through a, he scheme atanga an hmuh hi PMJVK dan kalh pakhatmah a awm lova, ‘Mizoram-in dan ang thlapin sum hi a hmuh chhuah a ni’ tih hi ka sawi duh a ni a.

Tin, PMJVK-ah hian, ka hriat dan chuan sum limit hi a awm chuang lova, education a ni emaw, health sector a ni emaw he PMJVK hnuaiah hian hnuhchhuah theih tam tak a la awmin ka hria a ni. Chungte pawh chu department ten an project an han submit a, l hlawhtling chiah lo te pawh a awm a. Keini aspirational district atang pawhin eng emaw zah pipeline ah a awm a. He PMJVK hnuai Ministry of Minorities-ah hian school leh health sector-ah pawh tam tak thehluh kan nei a ni. Tunah hian a hardware kan buaipui mek a. Nichin a kan member zahawm tak tena an sawi ‘Sports Promotional Programme’ tih kha ngaihthah theih chi chu a ni miah lo. Kha pawh software a lo ni leh a. Tikhan vawinawh pawh kan han inteh a, Assam te, Manipur te, anni hian infrastructure an lo neih thatna hi a rei tawh em em a ni. SAI, stadium puitling an neihna te a rei tawh em em a ni. Chuvang chuan, vawinawh a infrastructure kan din hi nakina kan tu leh fate’n an la hman tangkai tur leh Mizoram mipui, vawiina kan *target group* thalaite ina an la hmasawnpui tur thil a ni.

1993 kha Arunachal-a lehkhah kan zir hun lai a ni a. Arunachal State represent-in Santosh Trophy, Kerela-ah ka khel ve a ni. Chutah chuan zanah kan khel a, floodlight hnuaiah. Kan haw a, kan thiante, kan chhungte, Mizoram-ah te pawh a ni ang, ‘zanah kan inkhel’ ka han ti chu an awih mang lo a ni. Hriatthiam a la harsa lutuk a ni, zana inkhelh theih kha kan la ring tlat lo. Tin, kan district capital phei chu 1988 vel bawrah electric kan nei ve chauh a, anni tan phei chuan rin-ngaihna a awm lova.

Vawiinah ‘phullem’ kan tih te sawrkar hmasaah eng emaw zat tih a ni a. A nei ho te kan awt em em a, a chhunga kala, kelawnga han rah ve tawh pawh kha kan chak a ni; kuta han tawh te pawh kha kan chak, khatih lai chuan. Amaherawhchu, tunah chuan Pathian zarah common takin keini hote, mi vantlangin kan enjoy theihah te, ngaia kan han nei ve thei ta ringawt pawh hi ‘malsawmna’ a niin ka hria a. Chuvang chuan, kan thalaite leh hmun tinah, kan thian thenkhatte pawhin an sawi ang khan, Pu Dy. Speaker, kan bial fannaah pawh an lo sawi leh min dil thin ber chu sports infrastructure tho-tho hi a ni. Khelmual te leh thil chi hrang hrang, Sports Deptt. chauh pawh ni lo, department hrang hrang UD&PA hnuaiah te, RD te, SEDP hnuaiah te sports infrastructure atan hian heta rawn lang ringawt pawh hi tam tak - PMJVK, Khelo India, CSR, SASCI, Smart City, NEC, NLCPR te a awm a ni. Chumi piahah chuan he sports infrastructure mitinin kan duh si hi MLA fund te thleng pawhin kan tih a lo ngai ta a.

Chutiang chuan mipuite mamawh leh duh anih si avangin vawiinah hian nasa takin a hardware hi kan han ti a. A software ah te pawh kan luh leh hun pawh a awm ang a. Chuvangin, vawiinah hian he sorkarin sports infrastructure din chungchanga thalaite hmakhua ena kut a lo thlak hi kan tisual lo hlein kan hria. Kan bial leh Zoram hmuntina mipuite kan lawm hlein ka hria a ni.

2019 khan Sports Department hmalaknain State Games kan han nei a, hun rei tak neih tawh loh a ni a. Chuta kan han nei chu rualawh a na em em a ni. Bial tin te MLA constituency-wise in kan han in el a, khatah khan engkim mai thil thar hawh chawp, leichawp ngai te kha kan ni a. Heng te hi kan tih leh hunah chuan, vawiina kan kut hnathawh rah hi a lo lang ang a, hmasawmna tam tak constituency tin ten kan nei turah ka ngai a ni. Sports infrastructure chungchanga lawmthu sawi hi lawmthu sawina tur awm tak a niin ka hria a ni.

Tin, he policy a lo din avang te, industry-a kan puan avang te hian hlawkna tam tak a awm a. Resolution rawn puluttu in a rawn sawi ang khan, kan sportsman te tan incentive han siamsak te; Group-B leh a hnuailam ho tana reservation kan han nei thar te; chu mai ni lovin hemi in a kaihnawih siamthat ngai rules te leh dan tesep hrang hrang kan han nei thar ringawt pawh hi ‘sportsperson tan chuan thil lawmawm tak a ni’ tih hi ka sawi duh a. Sum leh pai kan hmuh te leh kan infrastructure siam te chu kan sawi tawh a, han sawi nawn vek pawh a ngaiin lova. Hemi piah lamah hian hmabak tam tak te pawh kan la neiin ka ring.

Tin, New Education Policy hian sports hi a ngaipawimawh khawp mai a, curricular activities ah a telh hial a ni. Hemi policy in a duhdanah chuan, school tin te hian playground/playfield hi nei thei se an duh a ni. Amaherawhchu, Mizoram te angah hi chuan thil harsa a ni a. School pali, panga tea intawm theih playfield nei turin a duh a. Chutiang tur chuan nasa zawkin kan education improve nan te pawh la hman a ngai a ni.

Tichuan, Pu Dy. Speaker, Member zahawm tak Pu Zothantluanga rawn putluh resolution hi, 'ka thlawp a ni' tih ka rawn sawi duh a ni e. Ka lawm e.

DEPUTY SPEAKER : Member zahawm tak Pu Lalchhuanthanga ka sawm e.

PU LALCHHUANTHANGA: Pu Dy. Speaker, ka lawm e.

Hei, resolution te kan sawikhawm leh a, rawn puluttu hian June Ni 21, 2019-ah khan resolution a nei bawh a, chuta a resolution chu - "*MNF ministry in hun reilote chhunga Zoram dung leh vanga kawngchhe tak a siamtha mai hi lawmawm kan ti hle*" tih a ni. Kan sawiho a, tha kan ti a, kan lawm viau a. Amaherawhchu, thla khat pawh a tlin hma khan kan kawng kha a chhe ta vek mai a, tun thleng hian kawngtha kan la nei ta lo a ni.

Nimin piah mai khan PWD changtu kan Chief Minister zahawm tak khan "tun thal chhung hi chuan kan kawngchhe zual hi chu kan thawm thei turah kan ngai" tih ang zawng khan a rawn sawi a. Kan resolution hian '*a tak-ram* te hi a thleng pha ang em' tih kha rilruah a lo lang a ni. (...*interruption* ...) Kawng chu a tha loa lawm; a tha lova, a thatloh avangin kan Chief Minister, kan House Leader ngei pawhin a thatloh zia pawh a zep loh kha. A zep lova, 'siamtha hman turah kan inngai' a ti chauh reng a ni.

Hei, infiamna hmunhma chu kan nei tha khawp mai a. Amaherawhchu, kan sorkar kal tawh te leh kan sorkar hrawn mek te hi artificial turf phah ah hian 'kan intihsiak em maw ni' tih tur a ni a, kan phah mawlh mawlh mai a. Amaherawhchu, national a ni emaw, international a ni emaw kan Mizo sportsmen ten medal an lak tamna ber chu combat emaw, contact sports emaw atangin a ni a, mahse heng atan hian vawiin ni thleng hian an pual hianin contact sports centre puitling hi kan la nei tlat lo mai a, a pawh khawp mai.

Tin, kan artificial turf kan phah reng reng hi, 'warranty a awm em' tih te, 'contractor te nen hianin maintenance agreement te hi kan nei em' tih te hi ngaihtuah ngaiin ka hria a. Kan phah leh ringawt ang a, enkawltu mumal an awmluh chuan heng thil man tam tak te hi hote a chhe leh thei a ni. Tin, Sports lam atang te hian enkawltu tur bik te hi kan indah em? A nih loh chuan sum tam tak kan senna hi ho tein a luangral

mai thei a ni. Nichinah khan kan member-pui Dr. Vanlalhlana khan a rawn sawi a, “PMJVK hnuaiah pawisa tam tak lak-then a ni” tih a ni a. PMJVK hnuaiah hian project 70 a awm a, chung 70 zinga 63 te chu sports lamah a kal vek mai a ni. He scheme hi kan thenawm state-te chuan zirna ah te, hriselna atan te, tui thianghlim pekna atan te an hmang tangkai em em a, keini erawh chu sports lamah chuan kan thang viau a ni maithei, amaherawhchu kan khawsakna dinhmunah hian heng hmanrua te hi a hman ve theih lawm ni.

Tin, UD & PA hnuai atang hianin Sports-in ₹3,174 lakhs lai mai a lo pawt hek a, chutiang chuan, Aizawl khawpui chhunga kan veng development tur hi nasa taka pawh-pen a ni a. Tin, Aizawl Smart City atang hian ₹9,801 lakhs lai sports atan pawh-pen a ni bawk a ni. Hetiang khawp hian sports atan hian pawisa kan seng hnem a, kan budget-ah khan ₹14,000 crore vel anih lai khan, Sports-ah chuan ₹24.22 crore vel a ni. Chumi awmzia chu za zelah .07% a ni a. Amaherawhchu chutiang zah lek sports budget-a kan sen lai hian department lian pui-pui aiin sports rul-rel siamna atan hian pawisa kan hmang tam zawk a ni. Hei hi engnge ni awm zia? ‘Thil dang atanga kan pawh pen vak vak mai hi engnge a thatna ni ang’ tih hi ngaihtuah tham a awmin ka hria a.

Tin, ka bial chhung Lawibual, ITI-ah khuan *international-standard* swimming pool Congress sorkar hun lai khan cheng vaibelchhe 4-a siam a ni a, a sei zawngah te, a thuk zawngah te international standard a tling a ni. Amaherawhchu a hmun-hma te chei leh thawm that a nihloh avangin tunah khuan hluihlawn mek a ni a, hengte hi kan bul tan a nihloh vang nge ni a, kan chhunzawm duh lo hi mak ka ti a. Sum tam tak cheng vaibelchhe 4 sen tawhna khutianga kan hluihlawn mai mai te hi thalo ka ti a, hei hi thil pawl tak niin ka hria.

Tin, tunlaiin futsal atan sorkar hian sum tam tak a seng leh mek a, futsal hi ‘a tha lo’ kan ti a ni lova, amaherawhchu futsal-ah hian medal a awm lo a ni. Hetiang medal awm lem lovah hian sum te hi seng vak vak lo thei ta ila a thain ka hria. Kan sorkar kal tawh leh kal mekte hian ‘thalaite hmakhua kan ngai’ kan ti a, sports lamah kan intlansiak vak vak a, phullem te hi ‘kan in phah tam siak em maw ni’ tih mai tur hi a ni a. Amaherawhchu, ti hian han sawi ve tai la - Kan thalai sports lama inhmangte hi veng tinah, khaw tinah hian 10% pawh an tling lo a ni. Khang a bak zawng zawngte kha engtin nge kan tih ang? Khang ho khan hnathawh tur te, eizawna tur te an duh ve a. *Intodelhna programme* atan hian eng angin nge kan sorkar hian hma a lak? ‘Kan thalaite hmakhua kan ngai’ kan ti anih chuan, sports lama tui kher lote pawh kha an tui zawng te, an eizawna tur ang chi te, training lampang te pawh kha kan buaipui sak ve thei lawm ni?

Tun dinhmunah chuan sports hmun-hma te chu kan nei tha tawh khawp mai a, a lawmawm. Amaherawhchu hetiang ang hian tehkhin ta ila – ‘*Choka changkang tak neiha a chhunga fairel bel ruak si*’ ang hi kan niin ka hria a. Kan thalaite kan enkawlina

kawngah hian kan sportsman te kan promote hi a tul tawhin ka hria a, a hmun-hma lo nei tha pawh ni ila, kan inkhel mite, kan infiam mite, a mimala hi kan chher hriam hi a tul tawh tak meuh meuhin ka hria a ni. Chuvang chuan, sports hi kan sawisel ngawr ngawr a ni lova, amaherawhchu thil dang kan thalaite tana eizawna tur ang chi te pawh hi kan ngaituah tela, a tam zawk hian kawng hrang hrang, sports-a tui kher lote tan pawh hian an tuina ang chi te pawh hriatsaka, an tan hian sum te pawh sena, dah ve te pawh a tul tawhin ka hria.

Chu chu ka sawi theih tawk ni mai sela. Pu Dy. Speaker, ka lawm e.

DEPUTY SPEAKER : Pu Lalrintluanga Sailo, Member zahawm tak sawi turin kan sawm e.

PU LALRINTLUANGA SAILO: Pu Dy. Speaker ka lawm e. hei kan member zahawm tak Pu Zothantluanga Aizawl West-I bialtuin - “*Mizoram sorkar kal meka sports infrastructure dinna kawngah hmasawna nasa tak kan nei hi lawmawm kan ti,*” tih private resolution a rawn pulut hi a lawmawm ka ti a. Amaherawhchu ka lu a nat deuh avangin nachhawka te ka ei a, ‘ka sawi lo mai ang’ ka ti a. Amaherawhchu hei nachhawka te’n min chhawk ta a, kan hriat ang chin te leh lawmthu sawina nia ka ngaihte Pu Dy. Speaker, han tarlan ve duh ka nei a.

A hmasa bera ka han sawi duh chu - thil hi kan hre sual zauh zauh mai awm mang e aw ka ti a. A chhan chu, nichinah member zahawm tak Pu Zodintluanga khan a chhuah hma khan “*Catch-them-Young* hi sorkar hmasaa kan din a ni” a ti a, a hre sual deuh a ni maithei a. *Catch them Young* hi 2005-ah daih, Dr R. Lalthangliana Education Minister a nih lai leh, tuna kan Sports Minister zahawm tak hi Education Deptt-a a thawh laia an launch kha a ni tih ka sawi fiah duh a.

Tin, Member zahawm tak Pu Lalchhuanthanga khan “futsal-ah hian medal a awm lo” a ti a, hei hi Futsal Association of Mizoram te khan in lo ngaihdam ka duh a, thil a hriatsual palh a nih ka ring a, ngaihdam ka han dil sak a ni.

Vawiina Member zahawm tak Pu Zothantluanga Private Resolution hi sports-lovers ho tan chuan an ngaihlala ngun hlein ka ring a. Chuvang chuan, keini ram rorel tura thlanchhuah mi 40 awmte hian sports-lovers te ngaihdan ni lo deuh hlek tein kan kalpui ang tih ka hlau a. Kan resolution-ah hian, ‘lawmawm kan ti’ tih a ni a. Member zahawm tak Pu Zaithanzama’n huai tak maia, ‘kan lawm lo’ a ti kha, a-pa hlein ka hria a, khatah khan lawm leh lawm-lo kan awm turah ka ngai mai a. A nilo zawnga thil han sawi chiam kha ni turah kan ngai lo a ni.

Tin, kei hi kum 20 chuang kal taah khan Mizoram-a sports-discipline lian ber football enkawltu MFA-ah hian hun rei tak ka lo tal ve tawh thin a. Khatih lai hunah

khan infrastructure tha te kan nei lova, lammual-ah hian national-level a ni emaw, North East-level a ni emaw, State-level a ni emaw sports tournament kan thlenin kan buai em em a. Kan thlen dawnah Sairang-a balu te phurin, mimal thahnemngaite'n pawisa thawhkhawmin a khu lutuk te kan veng thin a ni a. Chutiang chu hriaa vawiina he sorkar, Pu Zoramthanga kaihhruaiin kan thalaite mamawh leh tuihalna te hriaa sports infrastructure lamah hma nasa taka a la hi a lawmawm hlein ka hria a.

Chutih rualin he sorkar-ah hian kan member-puite nen pawh kan thawk ho thain ka hria a. Kan Sports Minister hmalakna tam tak bakah Smart City atang te, Rural Development atang te leh member't'n mahni bialah thahnemngaiin he infrastructure lama tan laknaah hian theih tawp kan chhuah a, a rah kan hmu mek a, a lawmawm hlein ka hria a ni. Hei, Pu Dy. Speaker, I remtih'nain RD-ah hian sports infrastructure lama hmalakna, *Entirnan*: Construction of Field at Vengthar, Champhai te, Construction of Playground at S. Chawngtui te ah hian cheng nuai ₹1,618.7 ngawt mai Rural Development Department pawhin a lo seng a ni a. Tin, keini BADP cover area pawh lian tham lo te-te buatsaih te pawh a awm a ni. Chutiang chuan, kan tang tlang a, kei ngei pawhin ka bial chhunga PMJVK cover ve loh Reiek RD Block hnuai Ailawng te, Kanghmun te leh Darlung-ah te futsal ground ka buatsaih sak a. Tin, Bawngthah-ah volleyball ground buatsaih sak a ni bawk a. Khatieng khan kawng hrang hrangin hna kan thawk a.

Tin, PMJVK dinhmun hi Pu Dy. Speaker, i veilama mite khan a guideline an hresualin ka hria a. Hei hi kum 10 kal ta sorkar hmasaah khan Central-in a hming dang 'MSDP' (Multi-Sector of Development Project) tia a lo kalpui a ni a. Chutahchuan sports lama kha a theih vek a ni. Amaherawhchu, Central lama mite nen kan interpretation a lo inan loh avang khan, he sorkar-a kan Sports Minister zahawm tak hian tan lain, hetah hian 'minority' tih hrilhfiagna engnge tih te a zawtfiah a. Chutah chuan, "*religious minority* tih a ni e," a ti a. Chumi anih avang chuan, tunhma khan Mamit District-a kan bial Dampa Bial-ah chuan W. Phaileng RD Block huam chiahah kan hmang thei a, Reiek-ah erawh chuan kan hmang thei lo a ni.

Chutiang chiah chuan, Lunglei-ah te, Lawngtlai-ah te introduce a ni a, amaherawhchu a hrilhfiagna a lo danglam takah chuan tunhnai mai atangin Mizoram pumah he MSDP hi hman vek theih a ni ta chauh a. Chuvang chuan, helaiah hian kan inzirchiang lo deuh a, a paw ka ti khawp mai a. Tunhma zawng zawnga thil theihloh kha a ni a, tunah erawh chuan a lo theih ta a, a lawmawm hle in ka hria. Bial dang tam tak PMJVK-in a cover ve loh nia kan hriat thin hma lak lohnaah khan a theih vek tawh a ni. Hetah hian 'project siam vek theih a ni' tih he House zahawm takah hian ka tarlang duh a ni.

Tin, Pu Dy. Speaker, sport lam tea tan kan lo lak ve laiin kan Sports Ministry bika budget chhe te kha sports-discipline hrang hrangin kan inchuh thin a ni,

infrastructure tha kan nei lova. Khang harsatna zawng zawng kha sukiangin vawiinah hian thahnemngai takin he sorkar hian sport infrastructure dinna turin tan a la a. Entirnan: Member thenkhat te'n kan sawi ang khan, a thenah chuan football artificial turf ringawt te kan buaipui a. Ka biala Vaipuanpho, Ailawng thlangah khuan 'State Training Centre for Adventure Sports' kan buatsaih a ni. Hei hi State dang pawhin an rawn hmang tangkai em em a, chutiang chuan sorkarin a kalpui a. Tin, Mizoram sorkar chuan vawiinah hian Adventure Sports Festival huaihawt a tum a, hemi atan hian Central atangin cheng nuai ₹40 sanction fel tawh a ni nghe nghe a. Chutiang chuan, he sorkar hian kan thalaite tuihalna hriain hma chak takin a la a, vawiinah hian lawm lo chi kan ni lo a, 'lawm loh pawh tum ila, lawm loh chi a ni lo' tih laia hi kan ngaihtuahnaah awm se a thain ka hria a.

Tin, kan thusawi hrang hrangte han ngaihtuahin infrastructure tha nei miah lova world champion leh Asian champion te nih tumna ang zawnga kha kan ngaihtuahin ka hria a. Hei hi chu pa-thei fal bik te kan nih ngawt loh chuan thil awm ngai lo a ni. Mi State-in, nichina member zahawm takte sawi ang khan infrastructure tha kum 100 kal ta a an lo neih tawhna atang te pawhin Asian Games-ah te pawh gold medal an lo la la ngai lova ni. Chutih rual rual chuan sportperson-te kan han sawi thin a, 'hetah hian tlemin kan hnufum ta deuh a ni lo maw' tih te kan sawi a ni. A dikna chen Pu Dy. Speaker, a awm ang. Amaherawhchu, kan hriat tura chu - Kohhran, kan chatuan in panna tur kawng min kawhhuhtu pawh kum 2 ngawt a inkhawm theih loh lai khan, "he sorkar hian Sports lamah hma a la thei bik lo a ni" tih erawh chu kan hriat a tha. Khami theihngihlil khan thil kan sawi thin a, 'hei hi chu a diklo ang' tih ka ngaihtuahnaah a lian hle a ni. Chuvang chuan, helama hi kan ngaihtuahnaah awm se la a thain ka ring a. Khang kan sawi laia ka ngaihtuahnaa lo lut chu - '*Thil tha kan hmuh ang hi tuma'n an hmu thei lo; kan Pa ram thil a ni, khawvelin an hre lo*' tih kha a ni. Chuvang chuan, '*kan Pa ram thil* hi veilam a mite'n an hrechiang lo deuh a ni awm mang e' ka ti a. 'Futsal-ah medal a awm lo' te kan han ti ngawt a, 'Mizoram kawng a chhia' te kan han ti ngawt a, 'a chhe vek' te kan han ti ngawt a, kan zin tlem deuh a ni. Helai House atang hian i hawi zau deuh ang u.

Kum khati zozai Covid-in khawvel a run a, Kohhran pawh kan inkhawm thei lova, kan zirna sikul zawng zawng kan chawlhlan a. Chutianga hun kan hman lain leh khati chung chung khan he sorkar hian eng nge ni a tih? Development program sorkar duh angin kalpui theih ni lo mah se la, he sorkar a lo din hnuah hian mipuite mamawh, kan nitin ei leh bar leh essential commodities, kan nitin mamawh lakluhna kawngpui te, Power & Electricity kan mamawh chungchangah te, tui thianghlim mipuite hnena pekna tur PHE kaltlanga hna kan thawh te; zirna kawngah te, hriselna kawngah te, ram mipuite ei leh bara kan intodelhna atana hmalakna kawngah te; ram venhimna leh ramri issue-ah te he sorkar hian 'hmuh theihin hma a la a ni' tih hi he House-ah hian tlang takin ka sawi duh a. Chutiang ni lova, 'sport-ah chauh hma in la a ni, helam kawng hi in hlamchhiaah a ni; han tih ang chi kha chu, a ni lo a ni. Chuvang chuan, sports

infrastructure kan dinnaah pawh hian rorelna dik chu he sorkar hian a kalpuiin ka hria a. Mahni member-te, ruling member bial chauh en lovin, Entirnan: Hmanni lawkah pawh Tuidam-ah te, Kawrthah-ah te artificial turf kan phah a, kan hawng a. Vawiinah hian volleyball leh basketball pavilion te siamna tur pawh Zawlnuam-ah te buatsaih a la ni zel a ni.

Chuvang chuan, “*Rorelna dik hi luipui angin kan sorkarin a luan tir a ni*” tih kha kan hriat chian thain ka hria a, ‘a hrechiang apiang an lawm a ni’ tih hi vawiinah hian ka tar lang duh a ni. ‘Pathian leh kan ram tan’ tih hi a va lo hlu em! He thu hian ka ngaihtuahna a tikal thui hle a ni, Pu Dy. Speaker. A chhan chu, leh lamte hmuhfiah theihloh ‘kan pa ram thil’ hi kan hmu fiah tlat a ni. Chuvang chuan, hei hi kan ngaihtuahnaah awm tlang thei se ka duh khawp mai.

Tin, ‘MSDP’ anih atanga vawiin thlenga kan practice-ah hian ram hruaitute pawhin thil kan lo hmu fiah lova. Vawiinah hian a inthupa kha, a hruaitu dik tak a lo thlen hunah chuan pho-lanin a lo awm ta mek hi a lawmawm hlein ka hria a. Central guidelines kum sawm tam an lo hman tawh su danglam theiin, kan ram pumpui develop-na atan limit awm miah lo anga member thenkhatte’na an han sawi, ‘he lamah an lo pawt hek a, a fund an lo transfer a ni ang,’ tih ang te kha a guidelines a tang pawhin thil theihloh tawp a ni a. Thu dik hi i sawi tlang ang u; ram mipuite’n min thlir reng si a. Ram aiawha an thlan chhuah mi 40 te rorelnaah hian, *Dikna* hi kan sawi huai a ngai khawp mai.

Chuvang chuan, vawiina Member zahawm tak Pu Zothantluanga resolution, “*Mizoram sorkar kal meka sports infrastructure dinna kawngah hmasawwnna nasa tak kan nei hi lawmawm kan ti,*” hi ka thlawp a. Hei hian ‘kan thalaite hmakhua a su kiang ngei ang’ tih ka ring tlat a ni. Ka lawm e.

PU K.T. ROKHAW : Pu Dy. Speaker, ka lawm e.

Pu Dy. Speaker, i chair-na hnuaiah vawiinah thu sawina hun tha ka nei hi lawmawm ka ti a, ‘Dy. Speaker’ i ni hi ka lawmpui tak zet che a ni.

Pu Dy. Speaker, vawiina Pu Zothantluanga resolution hi, “*Mizoram sorkar kal meka sports infrastucture dinna kawngah hmasawwnna nasa tak kan nei hi lawmawm kan ti,*” tih a ni a, tunah khan i ding lama mite khan vei lam hi lawm lo viau anga min chhuah hi a dikin ka hre lova. A dik tak chuan vei lama mite pawh hian hei hi chu a tha kan ti lo; ‘kan lawm lo’ an tih ka hre lo; an duhthu samlohna te kha an sawi mai niin ka hria. Chuvangin, Kei pawhin he resolution hi tha ka ti a, lawmawm pawh ka ti a ni. Tin, ka thiante ho pawh an lawm vek thoin ka hria.

Helai hi ka han en a, *“Mizoram sorkar kal meka sports infrastructure din kawngah hmasawwna nasa tak kan nei hi lawmawm kan ti,”* a tih hi ka ngaihtuah a, Sports infrastucture din kawngah hmasawwna nasa tak kan neihna chhan hi Mizoram sorkar kal ta Congress sorkar khan infrastructure tam tak a rawn din a ni. Chumi a din hnuah he MNF sorkar-a kan minister chak tak hian theihtawp a chhuah a, wawiinniah sports-ah hian Pathian zarah hma kan sawn em em mai a ni. Chu hma kan sawnna chhan chu - Congress sorkarin 2008 leh 2018 inkarah theihtawp a lo chhuaha, infrastructure tam tak a rawn din vang a ni. Chuvang chuan, i ding lama mite hian rem ti sela chuan, leh, Pu Zothantluanga hian rem ti thei sela chuan, he resolution hi hetiang hian ti ta zawk ila - *“Mizoram sorkar kal mek leh sorkar kal taa sports infrastructure din kawngah hmasawwna nasa tak kan nei hi lawmawm kan ti”* ti ta zawk ila ‘a mawi awm mang e’ ka ti a ni. Kal mek leh kal ta te, ‘kal ta’ tih pawh kha titel ta ila ‘a tha awm mang e’ te ka lo ti a. Chu chu resolution neitu thu thu a ni a.

Chuvang chuan, wawiinah hian Pu Dy. Speaker, a dik tak chuan Congress sorkar khan infrastucture tam tak a lo din a ni. Tichuan, sports discipline hlei bik nei lovin training centre hrang hrang a lo siam sak nasa a, infiam mite pawhin nasa takin hma an sawn reng a ni. Tin, han sawi lan ve thaa ka hriat chu - Rajiv Gandhi Stadium-Mualpui te, Zotlang Sports Stadium-Champhai te, Lena Sports Stadium-Lunglei te, Sports Stadium-Kolasib te, Sports Stadium-Serchhip te, Hockey Astro Turf-Thenzawl te stadium lian tak-takte kha a rawn din a ni; a vaia sawisen a ni lova. Chutiingin Lawngtlai-ah te, Siaha-ah te pawh a din a. Tin, articial grass Lammuala min han siam sak te, Thuamluaia Mual-Lunglei-ah te, Chhangphut Field-Champhai-a min siam sakte kha thalai pawhin an lawm a, an phur em em a, tuna kan Sports Minister hian theihtawp a chhuah zui a, a lawmawm a.

Tin, football playground phei chu kha tih laia Congress sorkar khan hmun 125 laiah a laih sak a ni. Chu chang a ni lo - MSMSS hnuaiah sports discipline hrang hrang tan a hun bik leh training-na tur siam sak anni a, a vai chuan ka sawi hman dawn lova - Boxing Hall-Ramhlun Sports Complex te, TT Hall-Mission veng te, Taekwondo and Power Lifting Hall,-Republic veng te, Judo Hall-Zemabawk te, Hockey Astro Turf-Kawnpui te, Outdoor Artificial Climbing Ground II-Lunglei te, Outdoor Artificial Climbing-Hawla Indoor Stadium-Republic Veng te, Semi Indoor Stadium-Aizawl te leh Aizawl Cricket Stadium-Sihhmui te a ni.

Chu lo ah chuan, Pu Dy. Speaker - Indoor Stadium Hostel leh Mini Sports Centre Complex te, Dengthuama Indoor Stadium-Mualpui te, Regional Sports Training Centre & Sports Hostel-Saidan, Kolasib te, Ramhlun Indoor Stadium te, Sports Centre-Saron Veng, Aizawl te, Multi-Purpose Hall-Lunglei te, Multi-Sports Centre-Muallungthu te, Sports Centre-Phulpui te, Multi-Purpose Centre for Nothern Region-Darlawn te, Mini-Sports Complex-Lengpui te, Sports Hostel-Mualpui te, a dang pawh a la tam a.

Khangte kha ka han sawi duhna chhan chu - Sports ah hi chuan Congress sorkar kal ta khan theih tawp a chhuah a ni. Kan CLP Leader Pu Zodintluanga Sports Minister anih lai a ni a. khati laia kan hotute theihtawpa hma an lakna kha kan chhuang hle a ni. Chuvang chuan, wawiin niah sorkar thar, MNF sorkar a lo ding a, kan Minister pawh hi kei chuan ka fak khawp mai. Hma a la nasa a, pawisa pawh a hmu tam a, hna pawh a thawk tam a ni. Amaherawh chu, wawiin niah hian sorkar hmasa hma lo lakna kha kan theihngihl mai tur a ni lo. Wawiin niah MNF sorkarin hetiang tak hian hma a la a, December 2023-ah kan inthlang leh dawn a, tun MNF sorkar hi lo tlain, party dangin sorkarna lo siam ta sela, an hma lak hi kha sorkar thar khan engah mah lo ngai ta lo sela, na an tih ve ka ring.

Chuvang chuan, Congress sorkarin hma a lo lak tawhna te kha in thusawi atangin engah mah in ngai lo deuhin ka hria a ni. Ka lo ngaithla a, nichina ka propose and deuh khan “Sorkar kal ta kha,’ tih kha telh ve ila chuan ‘kan tan a va lawmawm dawn em,’ tih ka sawi duh a.

July Ni 15, 2011 khan Kolosib-ah *Catch-them-Young* program hawnna neih a ni a. Hei hian naupang talent nei tha tak tak ten sport discipline hrang hrang an kalna turah nasa takin a pui a ni. *Catch-them-Young* hnuaiiah hian naupang talent nei tha tak takte zawnchhuah anni a, naupang te sports lama thui zawka an kal theihna atan training pek anni. A diktak chuan kha Catch-them-Young atang khan tuna Jeremy Lalrinnunga, weight-lifter te pawh hi zawnchhuah a ni. Kum 2022 Common Wealth Games-ah gold medal a rawn la a, chumi mai pawh ni lovin Lalremsiami pawh kum 2018-ah khan Hockey World Cup-ah India aiawh theiin a lo awm bawka a. Hemi hnu hian India ram tan Asian Games-ah bronze medal a lo hawn bawka a. A diktak chuan Mizo mipuite leh Mizoram min ti hmingthatute pawh hi he *Catch-them-Young* hnuaiiah hmalakna zar hi a ni ve tak meuhin ka hria a. Chuvang chuan, hei hi kan theihngihl mai tha ka ti lo a ni.

A tawpna atan tlemte han sawilan ka duh chu - PMJVK Scheme hi Pu Lalrintluanga, kan MLA zahawm takin a rawn sawi kha a dik viau a, “Scheme for Implementation of Project in Minority Concentration Area in the State” tih lai taka kha, dik tak chuan Siaha kan tel lo kha kan rilru a na a ni. Minority kan nih avanga autonomous district council nei kan ni a, tel ngei pawh kan lo inring kha a ni a. Kan tel ta lova, a pawh kan ti takzet a ni. Chutilaiin PMJVK hnuaiiah khan Lawngtlai te, Lunglei te, Mamit te an tel si a. Futsal te, volleyball court te, artificial grass field te, community hall te, sports complex te, tam tak 87 lai niin ka hria a, kan awt ve khawp mai a, a leh pekah chuan Siaha te pawh kan tel ve thei dawn tawh a.

Chuvang chuan, kan sorkar hian Sports, Health leh Education-ah hian rualkhai takin hma min laksak turin ka ngen a ni e. Ka lawm e.

DEPUTY SPEAKER : Member zahawm tak Pu K. Laldawngliana ka sawm e.

PU K. LALDAWNGLIANA: Pu Dy. Speaker, ka lawm e.

Aizawl West-I bialtu MLA zahawm tak resolution “*Mizorm Sawrkar kal meka sports infrastructure din kawngah hmasawna nasa tak kan nei hi lawmawm kan ti*” tih sawihona hunah thu sawina hun ka nei ve hi ka lawm hle a ni.

Mizoram district 11 awmna ram te takte-ah ‘Thalai Khawvel’ kan ti a, tuna vote nei 60% vel hi thalai rual kan ni a. Chuvang chuan, kan sorkar zahawm takin department-te nen thalai mamawh hriaa Infrastructure kawnga kan hmasawna kawnga thudik awmsa lawmawm tak sawihona hun kan nei hi a ropui ka ti a. A sawi tawh zawng zawng thusawi kha ka ngaithla zel a, ‘a tha’ kan ti a. Sorkar kal lai mek anih avangin, a kal tawh te hmalakna kha ‘tha lo’ kan ti a ni lova, a kal mek te resolution anih avang leh, infrastructure din kawng anih avang khan a behbawm tlemin kan sawi belh bawk a.

A nihna takah chuan, ‘tha’ kan ti tlang a, hmasawna tam tak kan hmuin, kan chhiar a. Zawhna pawh a tam a, a chhanna pawh kan keng fur a, kan sawi teuh tawh a ni. Chuvang chuan, khang zawng zawng kha ‘tha’ kan tiin, kan pawm tlang a ni. Amaherawh chu, chutih rual chuan kan lawm tlang a, infrastructure-ah hma kan sawn a, ‘contact sports-ah hian hei ai hian hma lo lak belh deuh hlek sela, Sportpersons training lam te pawh han tih belh deuh hlek se,’ tia thahnemngaihnaa an sawi belh chauhah ka ngai a. Chuvang chuan, ‘sorkar hmalakna a tha kan ti tlang hle a ni,’ tih kha ka han sawilang tel duh bawk a ni.

Kan hriat angin Tuirial bialah Pathian leh mipui zarah thlan-tlin ka ni a, thalai leh mipui min hmu zawng zawng hian kan mamawh chu ‘Khelmual’ a ni deuh zel a ni. Nichin khan football playground ringawt kan sawi deuhin ka hria a, futsal pawh hma sawna tamtak a awm a. Basketball court leh volleyball court lamah pawh hma lakna tur tam tak a awm a ni. Chutiang chuan, keini bialah pawh an han sawi ang khan, Kawnpui Field No-II ah hma lak mek a ni a, thalai rual kan lawm dan hi ka sawi thiam tawh lova, thalai zawng zawng hian kan en deuh reng mai a, zo thuai se kan duh em em a ni.

Tin, hmabak futsal ground-Kawnpui Chhim Veng te, Hortoki volley ball court te, a vaia sawi vek sen a ni lova, hma lakna tamtak a awm a. Hengte pawh hi helai hmunah ziahlan vek a la ni lova, kan hotute thahnemngaihna atangin tih hlawhtlin tur tamtak kan la nei a. Sports infrastructure atang pawhin kan dah a, ‘keini pawhin hma kan la mek a ni,’ tih ka han sawi belh duhna chhan chu - Thalai rual hian sports infrastructure hi kan mamawh a, ‘kan duh a ni’ tih kha ka sawi belh duh hrim hrim bawk

a ni. Thalai rual sports-lovers te leh sportperson-te hi chuan ‘hei aia tam la tihbelh zel ni se,’ tih kan duh a. Kan hmasawna tur, kan thanna tur, tunah sak lai mek, hma lak mek (on-going project) tam tak awm lai mek hian, hlawhtlin, nghal gold medal lak nghal mai te hi kan tum thin a. A hlawhtlinna chu nakinah, ‘he infrastructure hmasawna kan hmuh hian a la hril zel ang’ tih kha ka sawi lang tel duh bawk a ni. Chuvangin, he infrastructure atang hian ‘lawmthu i sawi teh ang u,’ tih ka sawi tel duh bawk a ni.

Kan budget kan hria a, kan budget piah lama hetiang central atanga sum hailuta tamtak kan hmu hi lawmna chang i hria ang u. Kei chu ka lawm a, hetiang ti theia kan Sports Minister te, kan Chief Minister zahawm tak te hmalakna hi lawmawm ka ti a ni. sports policy te kan sawi a, policy angin la success lo mah sela, hei pawh hi ngaih pawimawha kalpui mek zel a ni a. Tin, promotional fund te pawh hi infrastructure thil anih avangin kan hotute’n an ngaihtuah viau a ni. Jeremy Lalrinnunga leh Lalremsiami hlawhtlinna ropui tak kan hmuh avangin thinlung takin ka lawmpui a, an kal zelna turah pawh duh tawk mai lovin, a aia sanga hlawhtlinna an hmuh ngei theihna turin hma la zel turin duhsakna ka hlan bawk a ni.

Vawiina thalaite hamthatna sport infrastructure din kawnga hmasawna nasa lutuk kan neiha kan hmuh, thudik awmsa hi lawmawm ka ti a, he resolution hi ka support-in, pass ngei turin ka rawn thlawp a ni e. Ka lawm e.

DEPUTY SPEAKER : Dar 4:00 PM a ni a, Member zahawm tak thu sawitu khan hun a vawng dik khawp mai.

Dar 4 hi kan ban hun a ni a, sawi duh ban kha phar in la awm nual mai a, wind-up turin han inti ringawt dawn ila, sawi duh in la awm niin a lang a. Engnge House ngaihdan le? Kan sawi chhonzawm tir dawn nge, kan wind up tir mai dawn?

PU LALCHAMLIANA, MINISTER: Private Member Resolutions hi a tul zual a nihloh chuan dar 4 thleng hian kan chai thin a. Chumi tur chuan a hma deuh tangin a concern minister, a wind-up tute, tin Opposition Leader te nen pawha arrangement siam thin a ni a, pelh fo hi chu tha ka ti lo khawp mai. Kan tihdan phung, kan practice-ah hian, tun hnuah chuan dar 4 a bang thei tur hian ruahmanna siam theih tawh ni se tha ka ti khawp mai. Vawiin bikah erawh chuan laklawh riau te kan awm a nihloh chuan, House-in tha a tih chuan kal zel pawh a tul mahna. Amaherawhchu, tun hnuah chuan Private Member Resolution sawi ni-ah hi chuan dar 4 a bang thei turin ruahmanna siam thiam a tha ka ti khawp mai.

DEPUTY SPEAKER : Sawi chhonzawm leh kan duh tihna em ni? Chuti anih chuan, Member zahawm tak Pu Lalrindika Ralte ka sawm e.

PU LALRINDIKA RALTE: Pu Dy. Speaker, ka lawm e.

Vawiin hian kei chuan lawmthu ka sawi dawn lova, tin vawiin nia i dinglama mite pawh hian lo ngaihtuah se ka duh chu - Kei hi sorkar lamah awm ta ila, Sport Minister hi ni bawk ila, tin, NECS te hi kan chhungkua hnaivai takin enkawl bawk se. Tin, a hnathawktu thlan danah pawh hian thil kaldan zawng zawng hi hria se, vawiina lawmthusawi tute hian ‘min sawipui ang em’ tih hi ka ngaihtuah a. Chuvang chuan, lawmthu min sawi pui theih bik ka ringlo a ni.

Tin, kan bialah khuan hmalakna eng-eng emaw a awm ve a. Tin, kan bial ah khuan ka hriatchian em em chu, he sorkar sum hmanga hmasawna kal hi MNF party, MNF VC siam tura thlemnan an hmang a ni. Chu chu a pawl ka ti a, kei chuan. Chungte chu ka thlawp theihlohna chhan a ni. Ram hruaitute’n mipui pawisa hmanga party pakhat chakna tur a tan leh party pakhat len zelna tur atana mipui sum hman tum hi a dik lovin ka hria a, chu chu kan rilru put-hmang tur ni pawh hian ka hre lova kei chuan. Tin, chutiang ang ram hruaitute kan awm anih chuan kan rilru kan thlak pawh ka duh bawk a ni.

Tin, kan ram pumpui hi a ngaihtuah loh theih lova, Bial pakhat pawh kan ngaihtuah thei lova. Tin, party pakhat chauh pawh kan ngaihtuah tur a ni bawk lova, chung ngaihtuahna hrang hrang kan ram, kan hnam, kan mipuite ngaihtuah chungin kei chuan vawiina Private Members Resolution hi ‘ka thlawp ve theilo’ tih thu ka rawn sawi ve duh a ni e. Ka lawm e.

DEPUTY SPEAKER : Member zahawm tak Dr. Vanlaltanpuia kan sawm e.

DR. VANLALTANPUIA : Pu Dy. Speaker, ka lawm e. Dar 4:05 a ni a, vawiina Member zahawm tak Pu Zothantluanga Private Members Resolutions a rawn putlul, “*Mizoram sorkar kal meka sports infrastructure din kawngah hmasawna nasa tak ken nei hi lawmawm kan ti*” tih hi han thlawp ve ka duh a. Tin, he hunah hian mimal leh pawl aiawha lawmthu han sawi hmasak ka duh a.

A hmasa berah chuan he sorkar enkawltu kan sorkar hotupa ber Pu Zoramthanga, Chief Minister hi a fakawmin ka hria a. Tin, Pu Robert Romawia Royte, Sports & Youth Services changtu hi a fakawm tak zet zetin ka hria a, Mizoram mamawh minister kan nei niin ka hria a ni.

A bik takin North East State-ah te hian capital expenditure hi kumtin hian hna thar thawhna tur kan nei chau hle thin a. Mizoram ang State retheite angin hetiang zat pawisa kan han neia, hna thar kan han thawk thei hi a lawmawm ka ti a, kan State fund a tang pheih chuan pawisa kan hmu tlem a. Amaherawhchu, an thahnemngaihna te a vang leh a kawng an hriat avangin hetiang hi a lo thleng ta a ni. Pu Robert Romawia, kan Minister zahawm tak hi fak a phu hlein ka hria a ni.

Tin, thalaite enkawltu Mizoram Youth Commission Chairman ka nihna angin thalaite aiawhin lawmthu ka sawi duh bawk a. Thalaite'n world-class facilities kan han nei ve ta hi a lawmawm tak zetin ka hria a ni. Tin, ka bial Lunglei North aiawh pawhin lawmthu ka sawi duh a. Lunglei North-ah hian hmasawna eng emaw zat min dah sak ve a, Laldenga Futsal Ground te Pukupui-ah min dahsak a, Semi-Indoor Stadium pahnih - Serkawn leh Zotlang-ah min dahsak bawk a, ka bial aiawhin lawmthu ka sawi a ni.

Tin, he resolutions kan sawilai hian department fakawm bik (an hming lam loh theihloh) te an awm a, chung zingah chuan Sports & Youth Services Deptt. hi a ni Chiang a. A dawt lehah chuan, UD&PA-Smart City Project a tang hian eng emaw zat siam a ni a, RD-material component atangin eng emaw zat siam a ni bawk a. Tin, District Council & Minorities Affairs pawh hi lam loh theihloh a niin ka hre bawk a ni.

Hei, Pu Dy. Speaker, kan pawisa hmuhchhuah hi a tam hle mai a, a vai hian cheng vaibelchhe 800 deuhthawh thalaite hmasawna tur Infrastructure dinna atan hman a ni. 'Infrastructure' tih hi mahni tawng ang mai hian kan hmang tawh a, 'ruhrel' tihna a ni mai awm e. Heng thalaite tan hian cheng vaibelchhe 800 deuhthaw hi kan hmang tlat a ni; hei hi chhinchhiahtlak tak niin ka hria. Nichinah khan an sawi tawh a, PMJVK, *Khelo India*, NEC, SASCI, CSR, SEDP leh GIA atang te hian heti zat pawisa kan khawn-khawm thei hi a lawmawm ka ti a, a department enkawltu Minister-te chungah lawmthu ka sawi a ni.

Tin, 'infrastructure' kan tih hi ka sawi tak ang khan, 'ruhrel' a ni a, chungah te chuan 'physical' leh 'non-physical' tih zawng pawhin a sawi theih a. A *physical* lam hi kan hmuh theih tlangpui a ni deuh a, chu chu kan zavaia kan zu target deuh pawh hi a ni. Han sawinawn leh hrim hrim pawh tha ka ti a, kan lo ti tam em em mai a. *Physical* (a lang thei) ah hian - Khelmual thar laih te, stadium thar sak te, pavilion thar sak te, viewing gallery siam te, volleyball court te, basketball court thar siam te, Motor Sports-racing track siam te, futsal ground te, multi-purpose hall/complex siam te, recreation centre tih te, Sports Residential School din te, District Sports Complex siam te, community service centre siam te, 'Girls Hostel for Sports School' tih te, hockey ground te, tennis centre te, outdoor gym hmun eng emaw zatah siam te leh, kan sawi lar ber 'artificial turf' tih te pawh khang game hrang hrang - football ground, hockey ground leh futsal ground-ah te phah a ni a, hei hi a pui em emin ka hria a. Mizo thalaite la neihloh heti zat mai thil thar kan han din hi sawiloh theihloh niin ka hria a, a physical lam hi ka han sawilang duh bawk a.

A dawt lehah chuan 'non-physical' lam hi han tarlang leh ila. Khawvela thil sawifiahnaah hian *pahnih* hian a sawifiah theih tlangpui a. Thing pawh hi chunglam atanga a lan danah hian a rah te, a hnah te, a tangte a ni a, mahse, thing nih tirtu tak chu lang thei lo, lei hnuailam Atanga a chaw lak chhoh hi a ni a. Chutiang deuh bawk chuan tuna kan physical assets zawng zawng tuna ka rawn sawichhuah tak te leh a dang pawh

a awm maithei a, khami rawn awm chhuah tirtu *non-physical* lam hi sawiloh theihloh a ni. Chuvang chuan, Mizoram Sports Policy, 2019 siamthar a ni a, sorkar hna Goup B chin hnuai lampang lak apiangah chuan sports thei mite tan 5% reservation pek a ni a, sports hi *industry*-ah eizawna tak taka miin an hman theihna tur atana siam a ni bawk a, he sorkarah hian. Tin, Mizoram State Sports Council te technical authority status pek a ni a. Miin contract a lo hmu a, khelmual a lo siam te a dik/tling tawklo thei a, chumi va hremtu emaw, va endik theitu tur emaw dinhmuna kan dah te hi thil tha tak a ni a. Tin, infiam mite tana incentive, an mahni tiphur theitu tur lawmman kan pek te pawh rate siam thar a lo ni a, khatiang khan thil hrang hrang an rawn ti teuh mai a, a thu lamah hian. Chungte avang chuan central sorkar ngaihthlak hi kan hlawh em em mai a ni. Chutiang kawng atan chuan kan Sports Minister enkawlna hnuai hian a department-in chutiang insiamthatna tha deuh mai a siam hi a lawmawm ka ti takzet a ni. Heng bakah hian thil tamtak a la awm a. District Sports Committee regulation siamthat te, Aero-sports rules neih te, river rafting rules neih te, khatiang khan a lo awm chho zel a, heng hi thil hlu tak niin ka hria a, sawi loh theihloh a ni a. Mizoram Sports Department hian ‘hmasawn a tum hle a ni’ tih hi kan sawi duh bawk a ni.

(Hon. Speaker-in Chair a la a..)

Tichuan, Pu Speaker, hmasawna hrang kan han neih tak physical leh non-physical zawnga kan inruahmanna thar hian rah duhawm deuh deuh mai hi a rawn chhuah tan ta a. Kan sawi leh kan hriat theuh angin Jeremy Lalrinnunga chuan Commonwealth Games-ah gold medal a la a, Lalremsiami’n hockey-ah bronze medal leh Asian Games-ah silver medal a la bawk a. Tin, thalai infiam mi duhawm tak tak an rawn chhuak chho ta zel a - Jeho Himnakulhpuia, TT player te, Boxing lamah – Lalrinsanga, NT Lalbiakkima, John Kenty leh Lalawmpuia, professional fighter-te kan lo nei chho ta reng mai te hi, hengho hrin-chhuah vek hi niin ka hria a, lawmawm ka ti a ni.

Football lam te pawh en ta ila - ISL India rama football inelna sang bera player hot ber zinga mi, Lallianzuala Chhangte, (ka bial Zohnuui khaw tlangval a ni nghe nghe a) Mumbai FC-ah tunah hian a khel a, a hlawh tam em em a ni. Tin, Pu Jeje Lalpekhlua te, Jerry - East Bengal-a khel, (hmanni Bengaluru nena an inkhelh khan Bangalore-ah ka zuk en ve nghe nghe a, ka zuk tan chak nghe nghe a ni), chutiang chuan kan tlangval rual hote pawh an ti tha em em a, Pu Speaker. Tin, Pu David Zohmangaiha chuan Himalaya tlang a lawn-chhuak bawk a, Arm-wrestling-*Champion of the Champions*-ah Lalruattluanga, ITI Veng hmanni khan a champion bawk a ni. Chuvang chuan, kan thalaite hmasawn dan ngaihtuah hian, ‘*kha mah mah kan veilam*’ tih ang deuh a ni a. Infrastructure nei mang lo pawha khatiang kan tih theih chuan, kan tlangval bike khalh chak hote hi race-track kan pek hunah chuan, ‘India rama bike leh motor khalh chak ber kan ni thuai dawn’ tih hi a chiang reng mai a ni. Chuvang chuan, Sports-ina *immense*

contribution a neih hi fak a phu hlein ka hria a, he resolution hi ka rawn thlawp a ni e. Ka lawm e.

SPEAKER : Hei, Private Members Resolution sawihona hi dar 4-a tihtawp a ni thin a, tunhma zawng zawng khan. Tun hnaiah hian engtizia emaw ni, a tu-tu emaw pawh hian in whip lo reng reng hian ka hria a, chu chu ka han sawilang duh a. Ruling pawhin in whip lo, opposition pawhin in whip lo emaw ni; hei hi chu tih tawh loh a tha khawp mai.

Tin, mi thusawi sa sawi hi a ngaihthlaknawm miah lo; a ropui bawk lo. MLA ve reng ruangin mi thusawi sa rawn repeat-rawn repeat hi a ropui vak lo a ni. Chuvang chuanin, nidangah chuan kan in whip tha tawh dawn nia.

Awle, Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka lawm e.

Vawiina kan Private Members Resolution hi “*Mizoram Sawrkar kal meka sports infrastructure din kawngah hmasawwnna nasa tak kan nei hi lawmawm kan ti*” tih a ni a. Pu Speaker, hei hi kan ram rorelna sang a ni a, ‘helai House-ina kan practice dan hi a dik tawh lo emaw ni aw,’ tih ka ngaihtuah ve nasa a, keima phak tawkah. Ruling lam resolution hi han chhiar thla ila, mahni leh mahni infakna leh inchawimawina ni maiin a lang a. He House-ah hian kan ram leh mipuite tan rorela, he ram leh hnam thatna tura hmalaka resolution te pawh siam awm tak anih lain, keimahni leh keimahni inchawimawia infakna tur kan buaipui hi, hei hi kan kalphung anih chuan, a fuhlo khawpin ka hria.

Helaiah hian kan chhiar zel chuan, i veilama thute resolution-ah hi chuan, ‘kan ram leh hnam tana tha tur zawngin he sorkar hian hma la se a tha ang a’ tih ka ngaihtuahna kha ka rawn thawh ve a ni. Amaherawhchu, ruling bench lam atang erawh chuan, he sorkar kal lai meka, a rem emaw, remlo emaw han infak vak vak a, mahni leh mahnia lawmthu han sawi vak vak lam kha kan kalphung ni hian a lang a. Hmalam hun zelah pawh Pu Speaker, ‘hei hi kan kal dan tur ni tawh lo se a tha awm mang e’ tih ka ngaihtuahnaa awm ve ka han sawi hmasa lawk a ni.

Tichuan, Pu Speaker, hei, sports infrastructure lama hmalakna a tam khawp mai a, kan bialah pawh a awm ve a. Sap-thufingin, “*I mamawh lei la, i duhzawng lei suh*” a ti a, chu chu chhungkaw pangngai leh mi pangngai chuan an maintain a, an nunpui a ni. Mahni mamawh nilo, duhzawng lei pur pur mihring reng reng chu chhungkaw ropui tak an awm lo a ni.

Vawiinniah hian Mizo mipuite hian sports infrastructure hi kan mamawh ber a ni em, heti em ema kan kalpui ta hi? Chawhma lamah khan, he sorkar lo din tirh khan, ‘zo-buh keimahni thar-chhuah kan ei ang, kan lei ang,’ an tih, mahse, engzat mah lei tur an hmuhloh thu supply minister khan a sawi a. Vawiin hian kan bial min cover ve pha PMJVK atang te hian Agriculture & Allied-ah te hian sum dah ta ila; Lawngtlai West-ah sawn potential area, leilet siamna tur tha tak tak - Tuichawng te, Balesora te, a tam a ni. Tin, Tlabung leh Chawngte lamah pawh a tam. Mahse, infrastructure-ah Lawngtlai khawpui ringawtah rapa-rapthlak a awm a, hei hi ‘*kan mamawh chhanna*’ niin ka hre lo.

Tun tumah hian zawhna pawh ka siam a, a chhuak ang em ka hre lo; zawhna hi a tam a, a chhuak leh lo mai thei bawh a. Sports Infrastructure Lawngtlai (ka bial) a dah a ni chung hian, ‘a lawmawm’ ti dawn ila, min peka hi enkawl-zuitu an awm dawn chuanloh chuan a hnawh lian ringawt dawn. Tunah hian Lawngtlai college vengah hmalak mek a ni a, Residential School at Lawngtlai’ tiin cheng nuai 3,461.07 a ni. College Veng, Congress party sorkar laia field kan lo laih vek tawhah khan, a sir pangah rem leh rem lovin hma an la a. Hei hian a ken tel tur chu basketball leh volleyball court te a ni a, khilai hmunah khian a dahna a awm lo hrim hrim a ni. Tichuan, a khaw hnai lawk - Chawnhu-ah a hranpain volleyball court dah a ni leh a, residential school khalai complex-ah khan khatiang dahna kha a awm lo a ni.

Tin, a building tur vawiin hian an sa a, a thawktute ka han zawh chuan, ‘a viltute hi NECS hnuaiia thawk anni em aw’ an ti a. Khatiang khan keini chuan a thawktute saw ‘chu mite chu an ni e’ chu kan ti lova, kan naute hoin an lo ngaihven ve a, building te pawh saw mi hrang hrangin an vil a niawm e. Sawng te saw tunah hian a thawktu tur instructor te, principal te, coach te, khatiang quarter an sak ang chi tea thawktu tur manpower kha post create a awm tawh em? A awm lo anih chuan, hei, Professor Lalnunmawia bial Lungleng-ah sawn congress party sorkar lai khan sport complex sak a ni a, keipawh ka va kal tawh a. Building lian pui a ding a, luahtu pakhat mah an awm lova, a enkawltu pawh an awm lova; khatiang khan a chhuah ve a hlauhawm a.

Tin, tunah hian Mampui-ah ‘District Sports Complex at Mampui’ cheng nuai 5,019.43 man a awm a, tunah hian bul an tan leih-leih mek a, Mampui khaw thlen dawnah a ni. A ruahmanna (scheme) chu a tha, mahse a takin kan kalpui thei dawn em? Congress sorkar lai khan Polytechnic district hrang hrangah building kan sa a, mahse, manpower kan pek theihloh avangin vawinah chuan khang building te kha a pamhmai a ni; luahtu awm lovin hnim buk nen ramhnuaiah a chang zo lek lek a ni. Vawinah hian heng project lian pui-pui awm hi enkawltu an awm chuan siloh chuan, ‘hengte hi vawiina Zoram-in kan mamawh a ni em’ tih hi Pu Speaker, ka sawi duh lai tak chu a ni.

Tin, a hna inpek dan hrim hrimah hian, basketball leh volleyball court te hi ‘MS Junior Consultancy Service’ kan tih hian hna 55 ngawt mai a thawk tur te hi, hetah hian

hnung-thak inhiah tawwna te hi a awm a ni lo maw? Hei hi House Committee dina chhui tir emaw, ACB chhui tir hial emaw a fuh zawkin ka hria a ni. Chubakah chuan, ‘M/S Decor India, GS Road, Guwahati’ kan tih hi hna lian reng-rengah a tel vek mai te hi Pu Speaker, he sports infrastructure kan lawm viau lai hian, ‘hemi phenah hian thil inthup lian tak hi a awm a ni lo maw’ tih hi, an hna inpek dan en hian, a rinhlelhawm ka ti a ni.

Tin, chubakah heng ang zawng zawng hi Agriculture & Allied-ah dah ila, ei leh barah pawh kan intodelh ang; wawiin hian ei leh bara intodelh kan mamawh a ni. Sports infrastructure chu congress hunah khan ‘kan thalaite changkan nan leh hmasawn nan aw’ tiin ‘district headquarters tinah artificial turf te hi phah ve ila’ ka ti a; district headquarters hrang hrangah kan han phah chho a, kan la zawh loh chin te pawh a awm. Hetianga Lawngtlai Central YLA field-ah artificial turf phah a ni a, kan kawmthlang lawk, Lawngtlai Vengpui-ah congress hunlaia field kan laih tawh sa-ah cheng nuai 1054-in phul lem an phah leh ang a, chutiingin College Veng-ah; Lawngtlai khawpuiah chuan mihring 20,000 pawh kan awm lo. Malsawmtluanga te, Jeje te hi artificial grass atanga inkhela national player ni hi an ni lo; National player an nih chhan chu, mi-bik an nih vang a ni; ‘phul lem phah atangin a ni lo’ tih hi a chiang a ni.

Chuvang chuan, wawiin nia phul lem kan phah vak vak hi, kan ram hi changkang tawhin, ei leh barah te intodelh tawh ila, kal kawngah te lo hmasawn tawh ni ila chuan, a tha. Mahse, wawiina kan dinhmun hi, sorkar hnathawk hlawh leh an DA pung pawh kan pe thei lova, pension-ho pawh kum 30-40 dawn an thawk a, ‘pension huna tan’ tia an GP lo indah ve tang-tangte pawh chu kan pe thei lova.

Chutih lai mek chuan, he project hi a thlawna 100% kan hmuh a ni lo, 10% state-in kan tum ve zel tur a ni. Tin, he project hi MSDP-in hna a lo thawh tawh laklawh chhunzawmna tur a ni. PMJVK guidelines-ah khan, keini Lawngtlai, Lunglei leh Mamit District-te min thlan chhan chu - ‘minority concentration area’ a tih, (Governor speech-ah khan a awm kha) ‘Minority concentration’ tiha ‘minority’ a tih chu ‘religious minority’ a ni. (**Speaker:** I pel thui mah mah tawh) Pu Speaker, a pawimawh em a ni.

Vawiinah khan Member zahawm tak Pu KT Rokhaw khan dilna te a siam a; term lehah chuan kan sorkar mai dawn a, chutih hunah chuan Tlabung te Siaha te chu kan dah ve ngei ngei dawn; ‘kan siamsak dawn che u’ tih kha ka han sawi a ni e. Ka lawm e.

SPEAKER : Tunge vei lam atangin la sawi lo? Awle, Member zahawm tak Pu Vanlalhlana ka sawm e.

PU VANLALHLANA : Pu Speaker, ka lawm e.

Kan resolution Pu Zothantluanga putluh hi, “*Mizoram Sawrkar kal meka sports infrastucture din kawngah hmasawwna nasa tak kan nei hi a lawmawm kan ti*” tih a ni a. A changtu minister chu Pu Robert Romawia Royte a ni tih kan hria a. He ‘relative precedence of private members resolution’ hi kan en chuan, sports infrastructure chungchanga resolution hi member pali-in an pu-lut a ni. Chuvangin, a ngaipawimawh chuan he department an ngai pawimawh hle tih hi a lang a. Department pawimawha a minister hi ngaituah tham a awmin ka hria a. A changtu minister hi mi thil-tithei tak, mi chhuanawm tak a ni a, term hmasa lam khan kan House leader khan a sawi tawh a, “A ni kan nei hi kan la inchhir lo; kan kawl rei tawlh tawlh a, kan inchhir lo tawlh tawlh a ni’ a tih tawh kha a ni a. Chuvangin, ‘minister chhuanawm tak a ni ang’ tih pawh a rinawm a.

‘Mizoram sorkar-ah pawisa a harsa hle’ tih hi kan hriat dan tlangpui a ni a. Chutih rual chuan a tamna mualah chuan a tam hle niin hian a hriat bawh a. Sport Department-ah 2019-2020 chhung hian crore 609; kan figure hi kan han sawi ang khan, inang lo neuh-neuh a awm a, amaherawhchu, crore 500 chin chunglam vek kha a ni a, ka figure-ah hian crore 609 a ni a. Chu chu source hrang hrang - Khelo India te, State fund te, PMJVK scheme te, UDPA-Aizawl Smart City atang te leh hmun dang atanga hnukhawm te a ni ta a. Chung chu MNF workers te tan chuan *chil-thli tla diah-diah* khawpa thlir tham hi a ni ve reng reng a ni.

Unstarred Question kan en chuan - PMJVK atang hian hna 184 a awm a, volleyball court siamna tur ringawt pawh hna 29 a awm a, basketball court siamna tur 29. Volleyball court siam nan hian court pakhtah cheng nuai 31.2 a ni a, basketball siam nan cheng nuai 102.59 a ni. Hei hi chu Mizopa-Unit President te, Block President te, Headquarters President te pawhin an thawh ve thei a ni. Kan ui deuh anih chuan pahnih te pawhin lo intawm ta se, nuai 50 ve-ve te emaw, nuai 10 ve-ve te emaw pawhin lo insem theih a ni; hna tam tak hi a insem theih a ni. Amaherawhchu, chutiang chu kalpui lova, hna 58 lai mai Junior Consultancy Service hian a vaihma ta vek mai a. ‘Junior Consultancy Service, Aizawl’ tih hi kan hriat dan a ni a. Kan la hmu chhuak zo lova, tute nge an nih, anni hi. Kan Minister hian a hrechiang turah ngai ila, min hrilh ka beisei bawh a ni.

Tin, Unstarred Question chhanna kan en chuan, (ka bialah han lut ta ila). Chaltlang Sports Multi-purpose Hall, chu chu Aizawl-Smart City hnuaia sak tur a ni, Chhanna kan hmuh dan chuan Thawhtan (September Ni 22, 2022) hi hnathawh an tan ni a ni. Amaherawhchu, Pu Speaker, ‘hna hi la tan loh a ni’ tih House-ah ka sawi duh a ni. Tin, Durtlang North-ah Local Council Court inthlan dawnah kan minister zahawm tak kha a lo kal a, futsal ground min tiam a, mahse, vawiin thleng hian siam a la ni lo. Chu chu tun hunah hian ka remind duh bawh a ni.

A dawt leh a ka sawi duh chu - Kan Minister hi a chhuanawm ka ti a, a chak a, hmangchang pawh a hria. PMJKY guidelines kan en chuan - Education te, Health te scheme development-ah te 80% hman tur a ni a, 30% vel chu hmeichhiate chawikannaa hman tur a ni leh a. Amaherawhchu, Mizoram-ah chuan sports infrastructure siam nan kan pawtlut nasa a, hei hi engtin nge a tih theih zawk hi ka ti a, a mak ka ti. Tin, Health leh department dang-dang sum indaih lo tam tak kan awm a, engatinge Sport Department chauh hian a pawhchhuah theih ni?

Tin, Social Department concern te pawh niin a lang a. State dangah chuan Social Department hnuai te pawh a ni a, keiniah hi chuan a ni lem lova. Chuvangin, keini ang te tan chuan hriat a har viau a ni. A tha zawngin han thlir leh ta ila, Sports Minister chak tak kan neiha zarah Sports Policy mumal tak kan han nei ta a, sport infrastructure pawh kan nei tha a, lawmthu sawina resolution hian a rawn move ta a ni. A lawmawm lo lai ve thung erawh chu - Infrastructure neih ringawt kha a tawk lova, sports promotion a pawimawh a, sports infrastructure neih sa ang te pawh a maintenance hi kan tih a ngai a ni; infrastructure tluka a pawimawh a ni. Sports promotion-ah kan chau em em a, sports discipline hrang hrangah pawisa an hmuh tur angin an hmuh lova, coach tha an nei lova, chu chuan harsatna a thlen a ni.

Tin, Jeremy Lalrinnunga te, Lalremsiami te kan sawi a. Sports promotion-ah hian Mizoram sorkar hian *importance* a pe tawk lo; 'a ngai pawimawh tawk lo' tih a lang Chiang em em a ni. Kan Governor zahawm tak chuan Jeremy Lalrinnunga chu DSP hna pe turin Chief Minister hnenah a ziah a ni. Engatinge Governor-in a ziah a ngaih? Sport kan ngai pawimawh a nih chuan hetiang mi hlawhtling te chawimawina pek chu sorkar tih tur a ni; Governor phutchhuah kher tur ni pawhin a lang lo. Lalremsiami te pawh a chanvo tur chu, chanchinbuah te kan hria a, kan sawi kur ngiai nguai a, a tak taka a phu tawk lawmman leh chawimawina a hmuh hi chu phutchhuah ang deuhin a kal tlat a ni. Chu chu kan nihphung a ni a.

Sport infrsastructure kan neih te hi a lawmawm. Amaherawhchu, kan maintain a tha, a hmang tangkai turte pawh sportsman (inflammite) an ni. Chuti chuan khawvel thil te kan thlirpui a, Olympic te kan thlirpui a, amaherawhchu, an training petu tur coach tha te, in enkawl na tha te an mamawh em em a ni. Tuna kan kal dan hi chu a tawk lo. Infrastructure tha kan neih rualin training - sports promotional te pawh kan ngaipawimawh tur a ni. Ka lawm e.

SPEAKER : Member zahawm tak Pu Lalduhoma ka sawm e.

PU LALDUHOMA : Pu Speaker, kumtir Budget Session-ah khan Sports & Youth Service Deptt. atana budget kan dah chu 0.17% a ni a, cheng vaibelchhia 24 leh tlem a ni. Vawiina Sport atana a neih takte hi chu, nichina member zahawm tak Dr. Vanlaltanpuia a rawn sawi ang khan cheng vaibelchhia 800 dawn lai a ni a. Agriculture

& Allied-ah te, Power-ah te, Health-ah te, Education-ah te sum tam tak kan mamawh laiin, chung aia tam hetah hian a kal ta a. Police TA, DA kan pek theih loh lai leh sorkar hnathawkte pawh an lungawi loh em em lai te leh, ASHA te leh wild-life Preservation-a hnathawkte pawh hlawh kan bat sak lai te, tar pension hlawh kan pek theihloh lai te leh damlo pawisa kan bat lai tein tun laia sports lama heti zat kan sum a kalpeng hi, a balance hi a ‘dik lo e’ kan ti a ni. A sport infrastructure hi kan lawm lo a ni lo; kan sawichhia a ni miah lo, priority kan set dan hi ‘a dik lo’ kan ti a ni. NEC scheme atang te, State fund atang te, PMJVK atang te, Article 2.75(1) Ministry of Tribal Affairs atang te, UD&PA atang te, Aizawl-Smart City atang tein heti zat hi a pawtkhawm a ni. Kum 2019-2020 chhunga SYS achievement anmahni Department ngeiin an siam atanga he data hi ka lak a ni.

Tichuan, 2019-2020 State fund atanga an hmuh hi SEDP atang hian crore 7 vel a ni a, a chang tam *pangana* a ni. Tin, nimitah Member zahawm tak Pu Ramthanmawia’n zawhna a rawn zawt a, ‘PMJVK atanga Sports-a sum lut hi engzat nge’ tih a ni a. PMJVK hnuaiah hian hna 84 an pe a, PMJVK atang ringawt pawhin crore 436.22 Sports-ah hian a lut a ni. 2020-2021 SEDP Capital atangin cheng nuai 963 a chang bawh a, a chang tam ber *pathumna* a ni. SEDP cheng nuai 3 an beisei lain, vawiiinah cheng 25,000/- pek anni a, tawh an ti lova. heti khawp hian Sports lamah kan lo pawt peng a. Heng avang te hian mipui hnenah SEDP kan pe tam thei lo a ni mai lo maw? Chutiang chu kan dinhmun a lo ni ta a.

SASCI atang pawhin a lo nei teuh mai a, cheng vaibelchhia 37 tunah hian an hmang mek a, CSR, REC atangin cheng vaibelchhia 7.5, Mizoram sorkar atangin 8 tih a ni leh ta a. PMJVK guidelines kan en chuan - “80% hi Health, Education leh Skill Development-ah hman tur” tih hi a chuang kuau a ni. Hei hi *top-3 priority* chu a ni. An ngaih pawimawh loh zawkah hian a kal ta teuh a, Central-in a guideline an siam ang ni lo hian helaiah pawh-penin a lo awm ta a.

Tichuan, rem leh rem lovin ‘Sports hi hriselna atan a pawimawh tho’ tiin DPR an siamah te chuan health nena in relevant turin an ti hram hram a. Khatia kan ti dawn a nih chuan chaw hi a lawm hriselna atan pawimawh; Supply ah hian pe ve ang hmiang. Tui tel lovin kan nung thei hlei nem; PHE ah te pawh pe ve ang hmiang. Chuvangin rem leh rem lovin hetia tih tawh tawh mai hi PMJVK Empowered Committee meeting 36-na kha kan en chuan, he thil hi skill development lamah an hmang tlem lutuk a, “Skill Development lamah rawn hmang tam rawh u” tiin advised pawh Empowered Committee hian a pe a, a chhawr ber turte chu LESDE a ni. Education lamah te pawh kan school chhiat zia te pawh kan hria a, health-ah pawh kan mamawh lutuk. Top-priority a dah te pawhin engmah an chan si loh laia, a dah ve loh ten heti zat-zat an chang hi ‘a dik lo e’ kan tihna a ni a.

Nichin lawk khan member zahawm tak Pu Thangmawia khan, “Sports renaissance a thleng a ni ber e; phul lem phah chungchang PR-a chhuah te phehi hi chu kan zak lek lek tawh a ni ber e” a tih kha, ruling MLA te leh Minister dang te pawh hian ‘em ema’ an ti deuh a ang khawp mai.

Tin, PMJVK agreement hi NECS nena sign a ni. NECS hnuaiiah hian contractor leh consultative firm thar kan hriat ngai mang lohte an rawn chhuak a, mi sawi dan hi dik lo se ka ti khawp mai. “5% an la” te an ti a, cheng vaibelchhe 800 atanga 5% chu a tam duh ngawt ang. Development lam leh ram mamawh lam ni lo, Sports lamah kan hmang a ni a. DPR leh a format pawh hi ‘mi pakhat kutchhuak a ang khawp mai’ an ti a ni; chutiang chu a ni a. Chuvangin, tuna kan kal dan hi chu *kutdawhin suit lei se*, chutiang vel chu kan ni. Thlam tha deuh sa sela, lo kha hnim bur si sela, chu ang vel chu kan priority set dan hi a ni.

Tin, Kawrtethawveng basketball court kha hei Pu Lalrindika Ralte, kan MLA zahawm takin zawhna a pe a, ‘nuaih 15-a sak zawh a ni’ tia chhan a ni a. Estimate kan en chuan, cheng nuai 102.15 a ni. ‘A bak zawng sum hi khawng a kal tak’ tih te hi ka han zawt duh bawk a. Tin, promotional fund pawimawh-zia an sawi theuh a, ka han sawi ve duh a ni.

Cheng nuai 211.7 hi dah a ni a, a pumpuia promotional fund atana kan dah hian Sports a project pakhat sum pawh hi a zat lo a ni. Kum 2019-2020 leh 2020-2021 ah te an dawng kim lova, kuminah phehi chuan financial year a tawp dawn a, cheng khatmah an la dawng lo. Chuvangin, Association 33 kan neih te hian kut an dawh kual a, eng emaw tournament a awm dawn chuan MLA te hnenah an kal a, mi Hausa deuh hnenah an kal a, chuti reng reng chuan sponsor tu an zawng a, an khawngaih thlak em em a ni. Aizawlah an lo kal a, MLA ten kan thleng a, kal lam haw lam, helaia an cham chhunga an ei tur te lamin kan buaipui an ngai reng a, MLA fund pawhin a tuar viau thin tih kan hre vekin ka ring.

Tin, North East Olympic Womens’ team inkhelhnaah khan Miriam Lalnunsiami a inhliam tih kan hria a. Damdawi-Inah an zai a, chutah chuan MFA in cheng singhnih an thawh sak a, a thian ten a dang an thawh sak a, ₹60,119 hi a bill a ni a, tichuan an khul-chhuak thei tawk a ni. Lehlamah pawisa a tam em em lain, a infrastructure lam chauh kan ngaihtuah a, a Sports tak kan ngaihtah si lai hi, ‘hei hi a dik lo e, a fel tawk lo e,’ kan ti a ni. Tunah hian kits leh equipment – jersey te, football te kan tlachham a. Entirnan ka bial Serchhip-ah chuan District Sports & Youth Service Officer pawh kan la nei lova, staff pakhatmah kan nei bawk lova. Kan Sports Complex-ah chowkidar pawh min la pe thei lo a ni. Taekwando te, karate khelhna carpet phah tur takngial pawh an nei lova, Contact Sports lam pawhin hmunhna mumal pawh an la nei lo hlawm a ni. Tin coach te hi tunhna chuan an vak chhuak thin a, vawiinah chuan kan coach te hian engnge an tih? Thingtlang lamah training pea an kal pawh hi a vang ta a, Academy 60

vel kan hawng thar a, ‘a quality nge pawimawh zawk, a quantity’ tih te hi i en ang u. Engtingnge kan maintain leh dawn? School building tha tak nei si ila, zirtirtu chhe deuh deuh nei ila, engnge a sawtna awm? Nichinah an sawi tawh a, Lawipu-ah international standard swimming pool kan nei a, a mihring - a swimmer te chu international standard an ni si lo a ni. Kha zawk kha, a mihringa kha kan promote ngaia chu a ni a.

Tin, Sports Association te hi tun kan sorkar hian a ngaipawimawh lo hlein ka hria. Lalremsiami medal lawmna *Vanapa Hall* a an neih lai khan a neitu Hockey Association te chu chanvo pawimawh engmah pek an ni lova. Tin, Lunglei *Thuamluaia Muat* phullem phah a nih dawn khan MFA hotute chu *Khual-Zahawm*-ah sawm an ni a. ‘Sorkar function-ah tih tur an nei lo’ tih a ni a, programme atangin paih anni. Haw tauh an tum a, Lunglei lamin an chelh hram hram a nih kha. Chutiang chu kan awmdan a ni a. Ka bialah Para-gliding ah World Cup kan thleng a MASA hovin engkim an buaipui a. A ni alo thlen chuan, Sports Minister leh a thiante hlir kan hmu a, a thawk-hah tute chu program-ah pawh an tel lo. Chutiang chuan Association hi kan hrut lutuk a, kan thawhpui thiam lo ni hian ka hria. A enkawltu anni a, association kutah hian MSSC pawh hian thuneihna leh mawhphurhna pawh hi pe tam ve deuh rawh se. Tin, TATA Trust leh MSSC hi tunah an thawk-tlang a, TATA Trust hian cheng nuai 50 a thawh a, MSSC in nuai 30 a thawh a; tunhmaa MFA kan pek thin let dawna tam an pe a ni. Tichuan, MSSC hian grassroot football hi a rawn khawih ta tlat mai a ni; tun hmaa Association-in an khawih thin a kha.

Kum 2018 Congress sorkar lai ka han fak ve ang a. TATA Trust nen an tangkawp a, Muatpui Police 3rd Bn Complex-ah *Centre of Excellence* India rama a tha ber pawl an siam a ni. Hei hi engatinge a lo tawp tak? Hengte pawh hi chhui tham a ni. Mahni lansarhna lampang anih dawn loh avanga tuipei theih loh tlat te hi a pawiin ka hria a. Heng zawng zawng avang hian kan Sports hian hniam lam a pan a. November, nikumah Shillong Olympic ah khan State 8 zingah *parukna* kan ni; kan hniam khawp ta mai. Kan hnuaiah pahnih chauh an awm a ni. Chuti khawp chuan kan hniam thla ta a ni.

Tin, District Sports Committee pawh hi siamthat a ni ta a, tunhma Congress hun laia mi kha paihin ‘Sports Policy, 2019’ duan a lo ni a. Tichuan, hei hi an duh lova, District Sports Associations tam ber hian an duh lova, resolution te pawh an passed a ni. Chu chu ngaithla duh lovin hrut luih an ni a, Chairman ah DC dah an lo ni leh ta a. DC te hian Chair-na an ngah lutuk, sports lama tui mi annih loh chuan Association te hian an hniam phah niin an inhria. Secretary hi a ruata ruat a ni a, Treasurer hi a ruata ruat a ni a. Member pakhat ruat tur a ni bawk a, hmun thenkhatah te chuan an block hruaitute pawh an ruat mai mai niin an sawi a ni. Chutiang chu a nih tak zel avangin kan District Sports Committee pawh hi tunhmaa a kal ang khan kal leh se a that hmel hle a ni.

Tin, Lunglei-ah ka han pakai ang a. Lunglei-ah kan Sports Minister zahawm tak hian nikum July thlaah khan “Lungphum tawh zawng zawng hi July thlaah hna kan rawn tan vek ang” a ti a ni. Chu chu Chawmzil official channel-in a video a rawn upload a, in lo hmuh ve tho ka ring. Rahsi Veng-ah District Sports Complex tur VC-te hnenah an dil a, ui chung-chunga pek anni a, “kum thum chhunga kut inthlak loh chuan, kan la let leh ang” an ti a, mahse a hunah kutthlak a awm lova. Ramthar Veng-futsal te, Electric Veng-football ground grass phah te, Salem Veng-Leitlangpui-hockey field tih te pawh an VC member khan engtingge a video-ah khan a rawn sawi kha – “Hockey khelh tak tak pawh hi kan awm lo, khawtlang pawhin kan tuipui vak lo; min dil a, min nawr a..” a ti anih kha. Chutiang chu a ni a. Heng te hi ‘July thlaah kan tan dawn’ in ti chuan, tan mai tur a ni a. A hnuah in lo thawk leh pawh a ni maithei. Mahse hun tiamah, mipui beisei huna thil a thlen loh hian, *Assam Rifles Lammual Sawn* ang deuhah khan a chang zel a ni. Heng hi a tha lo ka ti a.

Chuvang chuan, ka hmawr bawknaah chuan - He resolution hi kan sorkar hian in hmuhchhuah nan hmang se la, heta tang hian priority rawn set tha se la. He resolution hi sorkar ben-harhna atana thil tha tak niin ka hria a. “Chumi atan chuan hman ni rawh se” tiin tidanglam i la, chutiang chuan i pass ang u. A ngai ang-ang hi chuan kan pass pui thei lo a ni.

SPEAKER : Dy. Chief Minister zahawm tak Pu Tawnluia ka sawm e.

PU TAWNLUIA, DEPUTY CHIEF MINISTER: Pu Speaker, vawiinah kan House Leader zahawm tak hi committee pawimawh dangah a tel a ngai a. A tawp lam te a lo nih takah chuan, kan resolution chungchangah hian tlema zawng han sawi thain ka hria a.

Kan Resolution hi kan tui tlang a, kan hlim tlangin ka hria a. “*Mizoram sorkar kal meka sports infrastructure din kawngah hmasawwna nasa tak kan neih hi lawmawm kan ti*”, tih hi kan zavaiin tha kan ti tlang niin ka hria a.

Thahnemngaihna avangin duhthawhna tawngkam te chu a awm chungin, vawiina resolution hi put-luh awm tak leh sawi-phu tak a ni a. Mizoram sorkarin tuna thalaite hmakhaw ngaia kawng hrang hrang hma a lakna te kan ngaithla a. A bikin sports chungchanga sorkar hmalaknaah lawmthu sawi a ni a. Han ngaihtlak khan, lawmthu han sawi loh ziazang chi niin ka hre lova. Vawiina kan resolution hi tha ka ti a ni.

Kan hriat theuh angin, Mizoram-ah hian nidanga kan neih ngai hauh loh, *Sports Policy, 2019* kan han nei te hi a lawmawm a. India ramah pawh a hmahruaitu zingah kan tel niin a lang a, ‘chung te chu lawmluh tur a ni dawn em ni aw’ tih zawng te pawhin ngaihtuah ta ila.

Sorkar hna Group B chinah sportsperson ti tha zualte, category hrang hrangah 5% reservation han siam te pawh hi a inhmehin, tih-awm tak a ni a. Chu bakah, ‘Sports hi *industry* a ni e’ tiin sorkarin thalaite hmasawna leh changkanna zawnga hma laa ruahmanna hrang hrang a han nei chho te hi a lawmawm hlein ka hria. Sports lamah thalaite tana Mizoram sorkarin hma a lakna hrang hrang hi kan ngaihthlak tak ang khan a lawmawm tak zetin ka han hria a.

Tin, Sports Department mai ni lovin RD leh UD&PA lam atang te pawhin kan thalaite tan hmalakna tam tak a awm a. Tunlai thalaite khawvelah hian hetiang khawpa infiamna sports lamah te mi hlawhtling siam kan uar chho hi a lawmawm hlein ka hria a ni.

Mizo tawng chuan ‘phul lem phah’ kan tih mai, artificial turf- international level football-a an hman thin ang te Mizoram hmun hrang hrangah, ni danga kan neih ngai loh kha tun sorkar hun chhung ngawt pawh hian kan nei tam a ni tih kha a chiang hle mai. Tin, hun rei tak chhunga kan neih tawhloh, sports lama hmasawna tura State Games kan han nei te kha a ropuin, ‘a tha lo’ han tih chi a ni dawn em ni le?

Kan thalai sportspersons ten State, national leh international level-ah hmasawna nasa tak an nei hi a lawmawm a. Tin, international level-a ram hrang hrangte inelna team-ah team member te ni phain hmasawna chak tak kan nei chho te leh kan Sports Minister-in hma an la chho te hi a lawmawm ka ti a. A bik takin, kan House leader, kan Chief Minister, he sorkar-a min uaptu berin kan thalaite hmakhua ngaia, finance minister a nihna anga State share pawh a lo ruahman thin hi a lawmawm ka ti a.

Ka sawi ve duh chu - UD&PA atangin sports lamah, a bik takin playground leh indoor stadium lamah te hma kan han laknaah hian department malin kan ngaihtuahna a kal ngai lova. Sports Department nen DPR buatsaih atanga in hrepawhin, kan department chu kan sum neih te a thawhtu mai kan nihna hriain a technicality leh standard kan hman tur zawng zawngah hian Sports Department nen hian hma kan la tlang thin a. Smart City lam atanga hmalakna hrang hrangah te pawh hian anmahni concern-ah chuan Sports Department te rawn zel a ni. Thalaite concern thil tam tak, sports lam ni kher lo te pawh a awm a, chungah te pawh a department concern te nen engkim tih thin a ni.

Vawiinah hian a nodal changtu ber chu Sports Department leh a enkawltu Minister chu ni bawk mah se, heng infrastructure hrang hrang kan han buatsaihnaah hian department hrang hrangte leh a changtu minister te kan tang tlangin, thawhhona tha tak kan nei a. Heng avang te hian heng achievement hi kan nei thei niin ka hria a ni.

Vawiinah hian hetiangna kan zavaia lawmthu sawina hun tha tak mai resolution kan han nei hi, a rawn puluttu pawh hian a pulut thiam hlein ka hria. Vawiinah hian

“Mizoram sorkar kal meka sports infrastructure din kawngah hmasawna nasa tak kan nei hi lawmawm kan ti” tih hi hlim takin, lawm takin leh lungual takin tha kan tih thu hi nemnghetin pawm tlang ila, pass tlang ila tiin ka han ngen a ni e. Ka lawm e.

SPEAKER : Hon. Sports Minister, Pu Robert Romawia, sawi duh a neihte sawi turin i lo sawm ang u.

PU ROBERT ROMAWIA ROYTE, MINISTER: Pu Speaker, ka lawm e.

Vawiinah ka department chan, sports infrastructure-a hmasawna chungchang Private Member Resolution move a ni a, sawihona tha tak kan nei hi a lawmawm ka ti a, Resolution move-tu Pu Zothantluanga, Aizawl West-I bialtu MLA zahawm tak chungah lawmthu ka sawi a. Tin, keiniho Resolution rawn duang chhuaktute, sponsor-tu MNF party chungah pawh lawmthu ka sawi duh bawka ni.

A hmasa berah chuan - Sports chungchang kan sportsperson hlawhtling ten hlawhtlinna an neih hnua kan session leh vawikhatna a niin ka hria a. Jeremy Lalrinnunga, Common Wealth Games-a kan gold medalist, India mipui pawhin kan chhuan em em; tin, Lalremsiami, kan hockey star-te leh midang tam tak pawh sawi chak deuh deuh ka nei a. Tunhnaiah khawvel huap pawha hmingtha tak tak Mizo kan nei a, boxing lamah pawh world champion te, kan la dai ngailoh professional boxing-ah te kan han nei chho a, an hming ka lam vek lo ang a, vawiinah hian tihrik ve erawh chu ka duh a. Anmahni avang hian heng sports chungchanga resolution ngaihtuahna te pawh hi lo chhuak a ni thei ang em aw tih te rilruah a awm a. Vawiinah hian chawimawina ka hlan duh a ni.

He House-ah hian mithar kan ni a, kan luh vawikhatnaah kan Chief Minister zahawm tak leh Pathian zarah minister nihna te ka han chang ve a ni. He House ngeiah hian 2019 Budget Session, session kan neih hmasak ber khan ka chanvo tetzia te, sports atana sum dah tlem anih zia te, “engtinngemaw hetiang chuan hna a thawh ve ang le’ inhmuhsitna a ni lo em ni” tih te; member thenkhat fiamthu duh deuh phei chuan, “NECS-a construction building pakhat a sakna zah pawh a ni hlei nem maw le” tite pawh an awm a. A video pawh a awm a, ka en leh a, ka nui kur-kur thin a ni. Ka tihngaihna hre lo khan (House-a la chetla thang lo ni bawka nen), kan thu mai mai bik lo ang; kan Chief Minister te nen theihtawpin kan tangho ang a, kan thuthluang reng bik lo ang” ka han ti kha a ni a. Vawiinah chuan, “in ti bik lutuk deuh a ni lo maw... heti vak vak te chu a dik dawn em ni?” tih te a ni ta hi, a lehlamah chuan kan sorkar hlawhtlinna, Sports Deptt. atana hma rawn la vetu kan Dy. Chief Minister zahawm tak Pu Tawnluia, a department enkawl UD&PA leh Aizawl Smart City atanga an contribution te, kan RD Minister zahawm tak Pu Lalruatkima department atanga an hmun tam takah sports infrastructure siam a ni te, kan Chief Minister kaihhruainaa kan tanhona that vang te pawh niin ka hria a, an chungah pawh lawmthu ka sawi duh a ni.

Chutiang ka sawi mek lai chuan, “Mizoram Annual Plan-a sports budget chu a la tlem zual zel a ni” tih ka sawi ve hrim hrim duh a. Opposition MLA lamte, ruling MLA ngeite pawhin sports promotion chungchanga Mizoram budget hman ngai si ang chia kan duh khawp lohna te, Mizoram sorkar chet-lakna kan kham khawp lohna te kha ka hrethiam khawp mai a. Mahse, Mizoram budget atanga sum tihpun hi chu a awl-ai lo khawp mai a, COVID hri lo leng mek nen, uluk tak erawh chuan ka lo chhinchhiah a, ka department officer-te pawh helai hmunah te pawh an awm a. Tin, hmun dang atanga lo chhinchhiahtute pawh an awm a, wawiiin a kan member zahawm tak ten a an sawi zawng zawng kha “kan lo chhinchhiah vek a ni” tih ka sawi duh bawk a ni.

A hnunung ber - Pu Lalduhoma, Opposition Group Leader zahawm takin a sawi thenkhat kha ka theihngihl hmaa react a thain ka hria.

“PMJVK guidelines kalhin sports-ah sum lak vak a ni a, education-ah te, skill development-ah te sum hman tur a nih laiin” tih kha hriatsual palh a nih ka ring a. Guidelines kha kan chhiar chiang lo emaw ni aw ka ti a. PMJVK atanga resource te ‘atleast 80%’ hi education te, skill development te leh a dangte pawh a sawi a, ‘chungah chuan hman tangkai tur’ a tihna zawk a ni a. Chumi awmzia chu - Field kan siamte hi education hnuai college zirlai naupangte pawhin an hmang tangkai ve ang; hall kan siamte pawh skill develop nan; taekwondo zir nan te leh thil dangah te pawh ‘*hman tangkai ngei tur a ni*’ tih a kawka a ni’ tih ka sawi duh a. **(Pu Lalduhoma:** Pu Speaker, a inziak chiang a lawm; “80% chu education, health leh skill development” a ti a ni. “Sports-ah pek phal loh” a ti lo, mahse “a tam ber hi education, health leh skill development-ah a kal tur a ni” a tih laiin, a tihloh zawk Sports-ah a tam ber a kal ta hi “a dik lo e” kan ti mai a ni.)

Ka han sawifiah law law teh ang. He thil hi kan hriat tlan a thain ka hria. ‘Sum 80% kha education, skill development leh health-ah te hman tur’ tih lam kha a nih rualin, a *mean* tak zawk chu, hei hi chu meeting-a ka sawifiahnaah pawh ka sawi a, ‘a hrechiang ber ka ni ang em aw’ ka ti, helai thu ho zingah chuan. Chuvang chuan a resource kha “atleast 80%’ kha education-ah te, sports-ah te, health atan te hman tangkai tur, utilize tur a ni” tih zawk kha a ni a. Engpawh nise, in *mean* kha chu ka hre reng a. A resource chu - hall te, football field te a ni vek ang chu.

He House-ah hian chiang taka kan hriat hlen atan pawh a thain ka hria a, khatiang kha a scheme-in chiang taka a ziah dan a ni a, kha kha a scheme hlui zawk kha a ni. A scheme thar zawkah chuan “Sports te hi rawn telh ve rawh u a pawimawh a nia, North East tan phei chuan a pawimawh” tiin kei ngei pawhin ka rawt a. Tunah chuan sports te pawh an telh a, tourism te pawh an telh a. Chu mai ni lo, state priorities te pawh tunah chuan a tihtheih vek tawh a, a hrelote tan chuan, ‘dan kalh deuh hlek leh sawi deuh hlek te hian an lo kal emaw ni le’ tih mai tur hian kan sawi deuh thinin ka hria a, a ni reng-reng lo a ni.

Tin, PMJVK hi, ‘a dan kalha sanction theihin Govt. of India hian a siam lo ang’ tih hi ring ngam ila, ‘a dan kalhin appraisal team te hian an ti lo ang a, a dan kalhin screening committee, ministry-ina a ruat committee te hian an ti reng reng lo ang’ tih hi ring ngam ila. ‘Engtingge maw Sports Department hian heti zah-zah hi an zuk pawh-chhuah theih le’ ti zawng hian ngaihtuahna thianghlim deuh hmang ila a van tha dawn em!

PU LALDUHOMA : Pu Speaker, Empowered Committee 36-na meeting-ah khan ‘Mizoram hian IT-3 kan nei’ in ti a, ‘seat 1000 an nei’ in ti a. Amaherawhchu, IT related hi in scheme-ah a tlem si a, “tun atang chuan LESDE lam hawi te leh ITI related hawi zawng hian proposal te pawh hi rawn uar rawh u” tiin an rawn advise hial che u a ni. Chuvangin, in proposal hnukung ber pawh kha kan nei ve vek; in uar ta deuh tih pawh kan hria, a hma ai chuan.

PU ROBERT ROMAWIA ROYTE, MINISTER: Ni e. Khati chin chauh hria kha chuan, “peace bonus-ah sum a awm lo.. cheng khat mah an rawn ti chhuak lo.. NLCPR fund mai mai a lawm.. North East State dang ten peace bonus-ah sum an hmu tam zawk” titu tho sawi kha a ni a. He House hi zah ila, eng emaw a chanve te-tea thil sawi hi chu ti tawh lo teh ang u. Kha minutes te kha ka han chhiar Chiang a, keipawhin hei ka kawl reng.. (**Pu Lalduhoma:** Chutianga phuah chawpa min ngai dawn anih chuan..)

PU ROBERT ROMAWIA ROYTE, MINISTER: A bawp-lawka eng emaw lai te la lovin... (**Pu Lalduhoma:** A minutes hi ka chhiar dawn em ni? Pu Speaker, ka phuah chawp a ni lo, heta inziak hi a ni)

I phuahchawp ka ti lo a, a inziak dang tam tak a awm a, chumai piah lamah chuan. 36th Executive Committee minutes kha a neitu department ni na-na chuan; a implementing department chuan kan hre ve a ... (**Pu Lalduhoma:** Aw, 37th meeting minute copy pawh ka nei ve tho, implementing board meeting pawh) Kan nei vek ang chu, a awm vek, a duh duhin en theihin website-ah a awm a.. (**Speaker:** In inhnial khan Chair kha rawn address zel rawh u aw, va in direct suh u.)

Chuvang chuan, Pu Speaker, a then te sawia, a then sawi kim loh hi engthar zia nge an tih kha? *Kalphung-thar* zia a ni chho ang tih hi ka hlau khawp mai a. *Kalphung-thar* zia hi, mipuiin thudik chanve an hriat hian ngaihndan dik lo leh ngaihndan hrisel lo/rilru hrisel lo pawh an neih phah thei a. 36th meeting minutes kha, a meeting ni te pawh kha Chiang takin ka hria a, an sawiho dan te pawh ka hre vek a, an minute lo thlen hlan te pawh kha phur lo zetin ka lo nghak ve tho. A chhan chu - Covid avangin engmah a tih theih loh a, finance lamin sum min pek theih loh avangin Mizoram-ah chuan engmah kan ti thei lo a, ‘khatiang thil kha a ni’ tih kha ka sawi duh a.

A tawp nan chuan tawi tein - PMJVK a ni emaw, Aizawl-Smart City a ni emaw, hetiangah hian ‘a guidelines kalhin sum a hman theih loh, sum sanction a hmuh ngawt theih loh’ tih hi kan hriat a pawimawh. Official pawhin an duh lo ang a, minister te pawhin kan duh chuang lo. Chuvang chuan, guidelines ang thlapin kan thuneih vena chinah State sorkar kan ni a, India Constitution 7th schedule-ah Govt. of India, ‘central sorkar’ kan tih nen thuneihna nei ve ve kan ni. *Lal-Hmei* ang maia central sorkar thu thua kal tur kan ni bik lo. PMJVK a ni emaw, Aizawl-Smart City a ni emaw, *Khelo India* a ni emaw, hengah hian a appraisal system te, a verification system te, a screening system te, a sanctioning system te hi ‘very rigorous,’ a saptawngin han sawi ila, uluk taka thlir, department pakhat mai emaw, ministry pakhat mai pawhin a thlir pawh a ni lo a. ‘Empower committee’ tih chu a awmzia kan hriain ka ring. ministry hrang hrang aiawh tel khawmna a ni a, khamite khan tuna kan project zawng zawng 84 hi ‘dan thlap a ni e’ tia an pawm a ni a, helaia lo chin-pawr kan tum thin hi a fuh lo deuhin ka hria a, chung chu ka han sawi duh bawk a. A tawi zawngin - “tuna kan resource siam 100% hi education te, skill development pawhin an hmang ve thei vek a ni, PMJVK atanga kan siam hi,” tih kha ka han sawi duh bawk a.

Tin, eng emaw ‘NECS’ tih te hi sawichhuah kan chak deuh thinin ka hria a, han sawi law law a thain ka hria a. ‘NECS’ tih hi duh taka keimahin a hming te ka phuah a ni a, sorkar hna ka thawh lai daih tawha ka din a ni. A chhan chu - conduct rules te kan lo zir ve thin a, pawl din kha khatih lai chuan NGO mai a la ni a, NGO pawl hming sak hi dan in a khap lo a. Chuvang chuan, keima sak thlap a ni a, a hming te pawh hi. Harsatna tam tak tawkin a kal chho ve thin. Ka han sawi duh zawk erawh chu - thawka phita eng emaw nena mi rinhlelh tawk vel tura thil sawi ang chi hi tun hma chuan a awm ngai lo a sin maw le! House-ah lehzal kan ti hi chu a pawl khawpin ka hria. Lawngtlai lama ‘NECS’ han sawi tel talh ang chi te, a contractor te rilru pawh a na ang a, a monitoring team rilru te pawh a na ang tih te pawh hi a hlauhawmin ka hria. Tin, NECS leh PMJVK agreement tih te pawh kha sawifiah a thain ka hria a, zawhna te pawh kha a awm a... (**Pu C. Ngunlianchunga:** Ngawi teh; a hria ten an sawi a, a viltute pawhin an hre ve a lawm maw le. Kha kha ka sawi zawk a lawm; phuahchawpa sawi kan ni lo.) He project PMJVK-a NECS leh DCMA-in agreement an sign hi kum 2022 a ni; a background hi kan hriat tel a thain ka hria. Department hrang hrang hian PMJVK-ah State dangin cheng vaibelchhe 500 te, vaibelchhe 600 te vawi khata an hmuh ang hian hmu ila tih hi ka duh dan a ni a. Chutiang chuan DCMA pawhin theitawp an chhuah a, mahni department atanga DPR siam ve chak lo leh siam hleithei lo chi pawh awm ve a ni a, ‘chungte ina an rawih atan chuan’ tiin agreement an sign a, chu chu kum 2022 kha a ni a, a ni tak ka hre ta lova. A fee pawh Finance Department-in rate a tihchhuah ang khan an ti a, 1%, 1.5% tih vel, a amount a zir khan a ni a. A sum kha an tichhuak lo anih chuan hlawh pawh kha an la tur a ni lo; “consultant dang nen an rawih dan a inang lo” tih hi kan hriat a tha hrim hrim a. Kan fapa te firm a ni a, ka tan hrim hrim a ni lova.

Tin, vawiinah hian eng emaw ti takin ka sentimental deuh a, min lo hrethiam ula. NECS hi tun kum hnih khatah phei chuan an motor pawh a tlan tawh mang lova. Hmanni zing, nimin piah zingah an dahkhawmna a ka va kal phei chu ka rilru a na angreng a. Chuti khawp chuan tripper 20 chuang vel, JCB pawh 7 vel emaw ni, hnathawk lovin rei tak a awm tawh a ni. Hnathawh te chu an chak ve ang, inhlawh te pawh an chak ve ang, mahse hna an hmu rih lova, keini department-ah hi chuan an thawh ve hi kei chuan tha ka ti lova. Chuvang chuan, “JCB pawh hi inhlawh tir reng reng suh u, Sports, Tourism leh ICT hnuaiyah chuan; miin eng emaw angin an sawi ang a, a tha lovang” tia inkhap tlat te pawh kan nei a. Anmahni pawhin tha an ti lova.

An agreement signed-ah khan hnathawhna tur pakhatmah a tel lo; central atanga sum tichhuak turin DCMA-in a duh a, a sign pui mai a ni. Sum a lo chhuah hunah pawh engmah khawih tur an nei lo; Nagaland te nena kan agreement ang chi kha a ni. Chuvang chuan, khang te pawh kha hria ila a thain ka hria a. Khalai te kha sawi chu a nuam chiah lo na a, ka han sawi a. (*..interruption..*)

SPEAKER : Ngawi rawh aw. Demand te pawh kan la sawi ang a, kan sawi dawn nia. Lo tibuai vak lo ula.

PU ROBERT ROMAWIA ROYTE, MINISTER: Ni e, *kalphung thar* hi a phen leh a rinhlelhna vela buai anih chuan thuhra ni sela.

Tin, MASA chungchang kha ka han sawi leh lawk ang a. A mimal dang kha chu ka react seng lo mai thei a. MASA para-gliding tih vel chungchangah khan, ‘kan tel lo tawpa thil tih’ tih hi a ri fo thin a, bye-election dawn te pawh khan issue a awm deuh a, member zahawm takte pawh hian kan hriat ve a tha a, khatah khan a pawisa pawh Mizoram sorkarin kan thawh tam khawp mai. Tin, association hrang hrang hi kan thawhpui fo a, ‘an intithu em mai’ ti pawh hi an awm vak lo. A phena hiattu hi an nei tha deuh nge ni, ka hre chiah lova. (*..interruption..*)

PU LALDUHOMA : Pawisa kha, a landing ground tihna tur te pawh kha State sawrkarin an tumsak a, kan hai lova. Kan lawm lo a ni lo.

PU ROBERT ROMAWIA ROYTE, MINISTER: Kan tum sak a ni lo; a landing ground kha Tourism Department-in kan lei a ni. Keimahniin kan lei. NGO te kha kan tumsak ngawt thei lo. (*..interruption..*)

PU LALDUHOMA : In lei avang khan landing ground an neih phah ta renga lawm. Khami kha an lawm lo a ni lova, a program-ah hman atanga lo bei ngar ngartute association kha tlar khat pawh, engmah in dah ve lo kha hrehawm an ti a, ka sawi mai a ni.

Tin, PMJVK pawh hi ‘80% hi education-ah, health-ah, skill development-ah’ tih a ni si a, ‘pe then ve deuh tawh teh’ kan ti mai a ni; huat tur a awm lo.

PU ROBERT ROMAWIA ROYTE, MINISTER: Huat lam a ni lova, ka tih theih a ni lova. Sawi thui ka chak khawp mai he thil hi. Mahse, Education Minister ka ni lo mai ni lovin, education atang pawh hian proposal tam tak a lut ve a, criteria khirh tak an nei a. Ministry of Education ah khuan chuti mai maiin a tlang thei lo. Health atang te pawhin project tam tak a lut; heng te pawh hi an sawi ri duh lova. Health Ministry khuan Minority Ministry scheme hnuiaia project appraisal rawn tia recommendation a lo tih kha; tun thleng hian, he ti khawp hian project pawh a lut thla tam tawh a, an la ti lo a ni. Chuvang chuan, helaiah a lerah ‘tute maw kan bum thei mahna’ tia lo sawi thin hi a dik lo deuh hlekin ka hria a. Chu chu a ruh lang rawtin ka han sawi duh a.

TATA Trust football chungchang hi ka thawh lai a bul tan a ni a. TATA Trust-ah hian Pathian zarah senior consultant-in ka awm ve thin a, ‘tu hnenah mah in report a ngai lo, tumah i pu lovang’ min ti a. Kan building sak ngei duh anga kan zawh hma leh kan handover hmian kan hmantir nghe nghe a, he academy ah hian. Hetah hian football lama eng emaw party affiliation an neih danin a zirloh vang nge, eng emaw sawi chak an awm thin hi a paw ka ti a.

TATA Trust chungchangah hian MNF chuan kan ti tha thlawt, sorkar hmasa pawhin an ti tha. Mahse sawrkar hmasa hunlai khan, kum 2017-a agreement sign tawh si kha 2018-ah a takin a function chauh a. An function rei hman lova, 2019 kha a tawp hun a lo ni leh tawh si a. Keimah ngei pawh Mumbai-ah kalin ka tihzawm tir leh a, an CEO pawh ka hotel ah lo kalin tha takin kan kal a. Tunah chuan centre 60 min rawn sanction thar ta a, tihzawm leh an tum thu te verbal chuan min hrilh a. Kan lawm hle a. Hetianga Mizo naupang ten coach mumal tak hnuiaia training tha tak an neih laia, a sawi-hnawm zawnga sawi thin hi, ‘ramhruaitute tihdan tur a ni lo ang a’ tih hi ka hmuhdan a ni.

Tin, State Association hrang hrangte leh District Sports Committee chungchanga vui anga sawi hi, thudik lo in hria a ni. State Association zawng zawngin District Sports Committee, District tina DC Chairman-na hnuiaia din hi an duh vek a. Eng emaw a lo ni laklawh lai ten eng emaw an sawi pawh khan ‘ngaihtuah tha leh ang u’ tiin keiin ka kokhawm a. Chutah pawh chuan an duh naran mai ni lovin, ‘hming i sign vek ang’ tiin resolution an siam a. State Level Association zawng zawngin tuna District Sports Committee din dan thar kalphung thar hi an duh a, chutah chuan tih ngei-ngei ngai te pawh central scheme kan han implement zelah hian a awm bawk a. Serchhip bialtu zahawm tak Pu Duhoma bialte nen pawh hman zanah kan sawiho a, phur takin, ‘a lo tha em a nih hi; kalphung thar ang hian kan kal dawn nia’ an ti ve ta a ni. (*..interruption..*)

PU C. NGUNLIANCHUNGA: Khami TATA Trust nena an MOU kha kum 2024 thleng a ni lo maw, Congress hun laia an sign kha? Kha kha, ‘2019-ah a zo dawn’ kha a ti mai a, 2017-ah an sign a, 2019-a zawh tur kha chu a ni dawn em ni ka ti a ni. MNF party zawk khan, hei, Congress party Press-release June Ni 29-ah hian, “MNF party-in pawisa a dil thin avangin leh, an ngaihsak loh avangin a tawp a ni” an ti a nih hi.

PU ROBERT ROMAWIA ROYTE, MINISTER: Congress party press release chauh i hria a nih kha. Lawngtlai West bialtu zahawm takin a sawi kha ka han sawifiah law law ang e.

TATA Trust Mizoram sorkar leh MFA agreement hi pakhat chiah a awm a, chu chu 2019-ah a tawp. Mahse, 2018-ah khan Tenancy Act, Tenancy Agreement an sign leh a, chutah chuan TATA Trust an tel tawh lo; Mizoram sorkar a tel tawh lo. Chuvang chuan, kha nen khan an sawi pawlh lui a, tu ten emaw. Tenancy Agreement leh TATA Trust ina *Center of Excellence* run zel tura agreement kha chu thil dang daih a ni. Tenancy agreement kha chu, saw building luah zui zel theihna chauh chu ni, kha erawh kha chu an sign. Kha kha TATA Trust nen an agreement a ni lova, TATA Trust in an sign lo, Mizoram sorkar pawhin a sign ve lo. MFA leh eng firm nge ni kha aw, lehn Police Deptt-in an sign; kha kha chiang deuhin i hre tawh ang u aw.

A tawi zawnga sawi hram hram chu ka tum ang a, zawhna kha in lo nei leh thin a.

Kawrtethawveng basketball court kha Assembly zawhna chhannaah “₹15 lakhs a zawh a ni” an ti a, a sanction “₹100 lakhs leh tih a ni” tih a ni bawk a. Kawrtethawveng-ah hian basketball court kan sorkar tirhin state fund atangin ₹15 lakhs (ka chiang chiah lova) a ni turah ngai ila. Khatianga zawhna-chhanna a awm chuan, an siam a ni ang; chu zawk chu a ni, nichin a in sawi kha. Chu chu PMJVK a kan siam tur kha chu ₹100 lakhs leh tlem a ni a, chu chu anmahni ngenna angin ‘futsal nena hman kawp thei turin siam ang u’ an ti a, futsal ground an lo mamawh bawk a. Pu Ruatkima, kan Minister zahawm tak te nen hman ni lawkah kan zuk kal a, a lawm pawh an lawm viauin ka hria a.

Chuvang chuan, ‘basketball court-cum-futsal ground’ tih te pawh a ni deuh duah dawn anih chu. Chu chu kan ti ang a, a tul chuan sum pawh kan pek belh ang, ‘a tul chuan pek belh dan tur pawh kan zawng thei’ tih kha kan sawi duh a. Chuvang chuan, ‘Kawrtethawveng ₹15 lakh’ tia sawi kha chu State fund atang chuan tennis court bul, tuna an hman mek tawh siamna khu a ni a. Pakhat zawk erawh chu ‘PMJVK atangin bungrua te an han ti vel mek a ni,’ tih kha kan sawi leh duh bawk a.

Tin, Member zahawm tak tak ten in ngaihpawimawh zawng te in sawi a, kan lo chhinchiah thlap a. Pu BD Chakma khan he House ngeiah Astro-turf football ground

kha a sawi-chhuak a, Assembly proceedings-ah pawh record thlap a ni a, kan han tihsak thei te hi kan lawm khawp mai a, a bial sawlai area pawh an lawm khawp a ni. “A ignite a ni, a area zawng zawng pawh” a ti em ni kha? A tak tak pawhin ka va hmu ve a. Mahse, “sum hi in hijack; health-ah te, education-ah te hmang ve ula” tih kha chu, ‘hijack’ tih tawngkam kha chu a dik lo. Pawh-pen hi cheng khat mah a awm lova, PMJVK sum Sports Department-ah cheng khat mah kan pawt peng lo, duh taka a sanction theituin Sports atan an rawn sanction liau liau a ni.

Tin, “Aizawl Smart City sum pawh sport department-ah, Sports-in chumi zah in laksak” tih tawngkam lek lek te kha awmin ka hria a. (...*interruption*...)

PU C. NGUNLIANCHUNGA : A kalphungah chuan, block level-in scheme a siam ang a, district level-ah a thleng chho ang a, screening a ni ang a, chu chuan state level-ah screening recommendation a siam tur a ni a. Tuna kan siam ho hi district level-ah pakhat mah an thu lo, a hnungah hming sign chawp tir an nih kha. Lawngtlai bialtu ka ni a, ka bial chhunga hnathawhna atan, a kalphungah chuan meeting-in an hria ang a, chu chu State-ah a ti tur a ni... (...*interruption*...) a system a dik lo. Pu Speaker, enge maw hnung thak inhiah tawna tur (...*audio failure*..) A guideline pawh kan hria, a kalphung pawh kan hria. Amaherawhchu, tuna mi erawh hi chu a kal dan hi a dik lo a ni. Chu chu, tunah central atanga an rawn sanction-ah hian, kha lai kha chu engtin nge ...?

PU ROBERT ROMAWIA ROYTE, MINISTER: PMJVK guidelines-ah hian lines tam tak a awm a. Tin, a guidelines phenah hian circular te, office memorandum te thil hrang hrang tam tak a awm a. Tin, officers meeting level-ah pawh kuminah chuan, ‘chulai chu rawn ngaipawimawh rawh u,’ tih te pawh a awm a.

Ka han sawi mai mai ang a. Union Sports Minister hmasa, (...*interruption*..) Pu Speaker, i sawi tir law law dawn nge? Hetia tih reng te chu, a hre chiang lo zawk hian...

SPEAKER : Ngawi rawh aw. Nichin a i sawi, Pu Nguna sawi lai kha rawn sawi rawh le, tichuan i ngaithla ang u aw..

PU ROBERT ROMAWIA ROYTE, MINISTER: Ni e, Pu Speaker, sawi hi a ni leh thin a, engnge ni kha lai kha.. “a guidelines lovin....” (**Speaker:** Nangmahni kha in ti tawh suh u, hetah hian rawn ti rawh u. In inkawk thin a, a tha lo.)

PU ROBERT ROMAWIA ROYTE, MINISTER: Chuvang chuan, tun hnaiah pawh an rawn endik dawn a, kan cho em em a, PMJVK bik hi chu. Ka han sawi mai mai ang a, a minister ka nih vang pawh ni lovin – Mizoram-ah hian sum harsatna vanga Finance Department-in sum min pek theih loh lai khan, hma kan la chak thei lova. Mahse, hma kan lak theih hnu hi chuan progress hi a tha em em a, tuna ‘project 84’ han

tih khan, 84-ah khan ‘sub-project’ ti mai ang, nuai tam tak man kha a la awm chhawng leh nghal a, khangah khan khawtlang khawi atang mahin ‘an tichhe lutuk e,’ tih emaw, ‘a hna hi a va chhe em’ tih emaw pawh a la awm lova.

Tin, nichina sawi-rik pakhat, ‘project 84 zinga 2 chauh zawh’ tih kha, a project ah khan component a tam avangin Kawrthah kha sawi ta ila - Kawrthah project kha hmannah kan Chief Minister zahawm takin a hawng tawh a, mahse project zawh pahnih zingah khan kan telh thei lo. A chhan chu, a building ken tel te, a ken tel dang kha ala zawh miao loh avang khan, khatiang kha chu la zawh loh-a kan chhiar zel avangin, complete kha a tam thei rih lova. Mahse Pathian zarah kan dam ang a, kan department Engineer ten an survey dan leh an tum danah chuan, 70-80% chu tun kum kal lai calendar year-ah hian zawh hman an inring a.

Tin, ‘mi pakhat in hna an va hmu tam em em ve’ tih te, ‘kan zawng hmu zo lo’ tih te kha, an zawn dan kha Finance Department-ah empanelled firm list a awm a, ‘tunge proprietor’ emaw, ‘tunge a partner’ tih te chu a lang vek a, kha lamah khan an zawng lo a ni mai thei a, hrih hriat te pawh kha an phut deuh kher ni te hian ka hria a. ‘Junior Consultancy Services’ tih zawhna kha - Pu Lalsangpuia a ni, a proprietor chu. MNF party-a kan Secretary chhuanvawr tak a ni a, an hna pawh a tha em em a, keipawhin nuam ka ti a, ‘MNF nge-nge hi chu’ tih te ka rilruah a awm a ni.

Tin, ‘engatinge hna 58 in pek bik’ tih lai te pawh kha, volleyball court leh basketball court hi sanction-khat a ni a, hmanlai style-a then-darh vaka tih kha kan department lam pawhin a duh lova, tin, a ministry neitu lam pawhin an duh lova. Chuvang chuan, UC-khata kal tur si ang chi kha chu work order-khata tih mai kha, sorkar kalphung thar kalpui mek tute hi chuan tha kan ti a, chutiang chuan kan ti a ni. Tin, thla thum vela zawh kim vek theih te pawh an inring a ni. Khatah khan anmahniin thawhpui tha tak takte pawh an nei turah ngai ila. Hmun hrang hranga mi kha mi pakhatin thawh vek sen a ni lova. Khalai kha chu thiam takin, smart takin kan enkawl ang a.

Pu Speaker, Pu C. Ngunlianchunga bial hi a ni em ka hre lo va, Sihtlangpui thlalak nizanah minrawn thawn a, a light system an han tih vel dan te kha a that hmel khawp mai a, Pu Nguna bial niin ka hria a. A ni em kha? Aw, a awm remchan chuan volleyball han khel ho pawh a chakawm khawp mai. Sihtlangpui-ah pawh zanah volleyball an khel thei tawh a, tuna *completed projects* zingah khan kan lo la report hman lo a ni.

Tin, a lungphum kha i sawi takah chuan, PMJVK guidelines kha in hre-bel tawh bawk a. PMJVK guidelines hluiah khan, “a lung hi phum hram hram tur, project a len deuh pheichuan. A area mipuite pawhin a sanction zat te, transparency a awm theih nan” a ti a. Mahse, kan phum seng ngang lova, phumloh hi 50 chuang kan la nei a ni.

Tichuan, racing track chungchang hi tawitein kan hriattlanah ka sawi duh a, kei pawhin a hmunah ka la zuk hmu bik lova. Kan Chief Minister zahawm takin thalaite mamawhna hriain racing track, hemi car te, bike te intlansiakna tur hi ‘neih ve a tha e,’ a ti a. Delhi-a ka awm laiin min rawn phone a, ‘a ngaihna ka hre miah lo,’ ka ti a. Mahse, engtin tin emaw sum kha, ‘regular funding’ ti mai ila, scheme atang chuan a tih theih loh ang tih ka ring sa a, CSR funding te kan zawng a. Kan Chief Minister Pu Zoramthanga zarah Rural Electrification Corporation ten cheng nuai 750 min han sanction a, ka lawm khawp a, tunah hian hna tha taka tan a ni a. Khu pawh khu a thawktu ten an thawk tha hle tih hmanni a REC atanga an mithiam lokal te pawh in an ti a, dang te pawh min pek-belh an chak hlein ka hria a, chutiang chuan beiseina thar dang te pawh kan nei a. CSR atanga cheng nuai 1000 dawn lai sum han hmuh te hi keini ang la experience lo tan chuan thil thar a ni a, kan lawm ve em em a ni. Member zahawm tak ten min rawn sawichhuah sak te kha ‘ka lawm em em a ni’ tih ka han sawi duh bawka a.

Tin, ‘Mizoram-in cheng nuai 800’ tih chungchang kha Opposition Group Leader zahawm tak Pu Duhoma khan a rawn sawi zauh em aw? Kha kha Mizoram a ni lova, cheng nuai 800 kha. SASCII scheme atangin cheng nuai 800 dang tihbelh duh leh eng emaw te kan neih avangin leh, sum tam zawka hnuhchhuah theih te beiseiin ‘provision kan siam bawka a ni’ tih kan sawi tel duh bawka a ni.

A tawpna lamah chuan, (a inthlahrunawm tawh a) Sports kan thlir hian medal leh championship hi kan ngaihtuah nasa ang reng a, Assembly House meuh-ah pawh. Kha kha chu a ni tur chu a ni tho mai a. Mahse, tunlai khawvel changkang zawk leh ram changkang zawkah chuan sports leh physical education te an ngaihtuahnah hian, rual-ban lo, sports lam ti mi lo te hi a ni an *VIP* te chu. Tunlai tawng takin, sports atana *VIP* te chu -mi in fit lo deuh te emaw, dulkiar deuh te emaw, natna eng emaw nei ang chi te hi ngaih pawimawh a tha khawp mai a. Tuna Mizoram Sports Policy anga Mizoram sorkar, MNF sorkar-in sport kan kalpuinaah hian medal chauh kan tinzawn lo - fitness te, hlimna te, hun-awl hman that te, naupang thlan tihchhuah te thil tam tak kan tinzawn a. Sports level sang deuh meeting ka tel venaah chuan, Japan-in ‘Health for All Movement’ kum 115 kal taa an tan dawn khan an ngaihtuah nasa khawp mai a, Japan sorkar khan. Chutah chuan, an consultation, series of consultation kha level hrang hrangah an nei a, mithiamte pawh an hmang tangkai nasa a. A tawpa an findings leh an hawi-zawng ni ta chu - Japanese te kha khawvela hnam damrei, hnam hrisel, hnam hlima siam tura an policy hlawhtlin nan chuan stadium te, football ground, open gym te, khang ‘sporting activities’ kan tih ang chi uarna tur kha an priority No. 1, an thil-tum tihlawhtling tura an strategy No. 1 a ni e,” tih kan resource person khan a sawi a, ‘a dik hmel mang e aw’ ka ti a.

Tunah Mizoram-ah hian exercise lak te, thlan han tihlak te, fitness activity hrang hranga inhman hi kan kum upa deuh zawk tawh te, pa-valai rual te, nu-valai rual te hian

tun ai hian uar ta ila, kan hospital admissibility rate te leh health-a kan expenditure pawh hi ‘nasa takin a tlahniam mai awm mang e aw’ tih te ka rilruah a awm thin a. Ka sawi tum chu - Hei hi a ni Sports-in artificial grass phah a pawimawh zia kan han sawia, kan han tih mekte hi Santosh Trophy champion nan emaw, I-League champion nan emaw, khata khel pha tur chauhin emawa hman tangkai tur tih lampangin kan ngaihtuah lova. Mi tam zawk sporting activities-ah in hmang se la, National Education Policy, 2020 vision anga naupang tam zawk leh zirlai tam zawk ten thlan tihtlakna te, physical activity leh physical education tih theihna chance an neih kha kan tum a ni tih kha kan sawi duh a. Chutiang anih mek lai chuan, khata tanga team tha lo chhuakte tan kha chuan ‘tan kan la zel tho dawn a ni’ tih kha ka sawi duh baw a.

Tin, a tawpna atan chuan, Sports promotional fund chungchang te minrawn veipui a, ka lawm hle mai a. Khami sawitu zawng zawng - sorkar rawn kheng deuh talhtalh hote chungah pawh khan lawmthu kan sawi teh ang.

A hahthlak khawp mai a. Mizoram sorkar atanga sum ngai ang chi-ah hi chuan kan sak talh mai a. State share te hi chu a tih loh theih loh a, a dang hnuhchhuah leh zelna a ni a. Tuna ka han sawina eng atang hian kan hotute pawhin ngaipawimawh zual turah ngai ila. Chutih mek lai erawh chuan Sports promotional fund pawh lo chhuak se la, Sports Association te khan program mumal tak, pawm tlak program an siama, chumi base-a release chu a ni a. Hmang hman lo leh hmang hleithei lo association te pawh hi a awm ve theih tho a. Association smart deuh leh association chak deuh chuan kar lovah an hmang zo a, kan pe tam theilo zawk a. Association te pawh hi ‘an inang lo khawp mai’ tih ka sawi duh baw a.

Tin, ITI - tuihleuhna chungchang an sawi kha a dik vek lova. Mahse keipawh khulai khu ka vei a, association hruaitute pawh ka sawipui tawh thin a, kan hmang tangkai taw lo a ni. Tuihleuh tur mi kan hmu lo hi a buaithlak ang reng khawp a, North East a champion te chu a la hla lutuk, frank deuhin sawi law law teh ang. Tin, kan tuihleuh dan style te pawh a la dik lova, coach te pawh kan la nei lova, neihloh lam han sawi te kha ka style a ni chiah lova, ka sawi lo ang a. Harsatna tam tak kan taw a, ‘theihtawp erawh chuan tan kan la zel ang’ tih ka sawi duh a.

Tin, district thenkhat kan cover dek dek a, ‘in uar lutuk’ te min ti ta mai a. Hmannia kan meeting-ah khan Assam chuan “stadium chauh siamna tur cheng vaibelchhe 1000 kan state budget atangin kan nei e” an ti a, ‘kan va han inang lo e aw’ ka ti a. Assam kha ‘kan hmu lian e’ tih lam ni lovin. Engpawh nise, Member zahawm tak takte ka han ngen duh che u chu – Sports-ah hian ‘scheme a awm’ tih pawh kan hriat ngai hleih loh CSR a tang te, PMJVK a tang te emaw, thildang a tang te emawa kan hmu leh anih pawhin, ‘in lawmpui teh ang u’ tih hi ka sawi duh a ni. Chuti a nih loh chuan a hahthlak ve tlat.

Tin, chungte a nih mek lai chuan, Pu Nihar Kanti Chakma a bial arawn sawi khan ka rilru a hneh khawp mai a... (*..interruption...*)

PU LALDUHOMA : Heta tang hian i pe ve mai thei lo em ni promotional fund tur hi? SEDP atang hian a awm teuh tho a lawm..

PU ROBERT ROMAWIA ROYTE, MINISTER: SEDP-a department lian, a nuai leh sing bia kal te hi in sawi tha duh lova, Sports a tanga nuai 1600 tih te, a share eng emaw kal kha in sawi thin a. Hetiang zawnga in tih chuan sorkar hi a hla khawp mai. Vawiina kan thusawi te pawh hi ‘Sports Association in a khawmin kan lo en dawn’ an ti a, Sports-power hi bawn ve deuh a nia. Chuvangin, sawichhiat-sawichhiat hi, kei mi sawichhia chu ni ula pawh ka ti miah lova. Duh tawkin min ti ula, sawichhiat than ka ni a, eng vakah ka ngai lo. Mahse, Sports hi chu sawichhe suh u, ‘Sport lovers ten na kan ti tlat’ tih lai kha ka han sawi duh a.

Tin, Pu Lalchhuanthanga, Aizawl South-II bialtu zahawm tak khan ‘sum pawh-pen’ arawn tih bawrh-bawrha kha, ka zawt let duh a - Assembly Proceedings atangin nawhreh zawk i duh em? Kei chuan nawhreh zawk hi ka duh. (**Speaker:** ‘I duh em’ va ti lo la, ‘a duh em’ va ti rawh le. Ti khan inchal-tauh rawh u.) Pu Speaker, Sports hian khawi scheme emaw UD & PA atangin ‘pawt peng’ a ti a, kha kha chu a fate pawh hian tha an tih ka ring lova. Kei hi a nupui ni ta ila, ‘E, Pa-a, khatiang kha i sawi a, nawhreh tir daih rawh’ ka ti ngei ngeiin ka ring a. Chuvang chuan, UD&PA atang hian dere pawh kan pawt-peng lo. UD&PA chu infrastructure siamtu, Urban hmachhawntu a ni a, ‘Urban Infrastructure’ kan tih hian Sports hi component lian an ni zel a, America-ah pawh a ni tho, Asia-ah pawh a ni tho, India ramah pawh a ni tho. Chuvangin UD&PA-in sports infrastructure a siam hi, Sports-ina kan pawh pen a ni lova, a tih tur diktak a ti a, kan lawm em em a. Sportsperson te leh kan infiam mite lakah pawh kan lawm a ni. Chutiang tho chuan Aizawl-Smart City sum te pawh hi pawh-pen leh eng emaw ti zawnga han sawi talh hi kan tum a. Aizawl Smart City chu private company a ni a, UD&PA hi a nodal department a ni. Anmahni in citizen-te mamawh leh an demand-base a khawpui hmasawna ngaihtuah tur te pawh an ni a. Chuvang chuan, tunah hian an duh dan takin keini te pawh min rawn tho a, kan Dy. Chief Minister zahawm hova sports infrastructure an siam te hi keini chu kan lawm em em a, keini Sports Department-ina kan pawh pen lam a ni lo tih kha ka sawi duh a ni.

DR. VANLALTHLANA : Ni e; Smart City chungchangah khan office-ah te pawh kan kal ve a, a guidelines ah khan ‘Sports Infrastructure’ tih kha a awm lova, ‘Youth on Open Spaces’ tih kha a ni a. Gym te an lo siam anih chuan thudang a ni a; “engtinngge khati zat kha sports infrastructure-ah khan a luh theih tak” tih kha department-ah pawh, SDP lamah pawh kan kal a, min hrilh thei bik chuang lo. Amaherawhchu, helam concerned minister ni lo, Sports Minister khan a chhang daih thei mai a, a mak thei khawp mai.

PU ROBERT ROMAWIA ROYTE, MINISTER: Sawitur tam tak ka nei a. Aizawl Smart City chungchanghian kan Dy. CM leh kan CM pawh hi an fakawmin ka hria a. Sports chungchang sawiho dawn hi chuan kei pawh hi engmah ti ve theih va nei dawn lo mah ila, min ko ve thin a, bial hrang hrang mar te pawh an dek ve thin niin ka hria a. Chuvang chuan, Aizawl Smart City atanghian, a nihna takah chuan Delhi tlanga an duh ang-ang emaw, an tih ang-ang emawa tih hi khawi State mahin an ti duh lo tawp a ni. Mizoram pawhin kan ti duh chuang lo.

Tin, sports Infrastructure kha urban infrastructure a ni a...

PU LALDUHOMA : Pu Speaker, khawngaihin *Point of Order* - Member zahawm tak Pu Lalchhuanthanga'n 'pawt-peng' tih a rawn hman kha, hman awm tak niin ka hria a. A chhan chu - Sports Department ngei ina achievement an siam 'during 2019-2020' tih an ziahah khan, UD&PA atanga Sports-a an pawh-pen chu cheng nuai 3,174.66 ani.

PU ROBERT ROMAWIA ROYTE, MINISTER: Khatah khan 'pawh pen' tih a inziak em? Hei hi UD&PA-in sports infrastructure, an mahni ngei siam a ni.

PU LALDUHOMA : In pawhpen loh nakah; sum kha an rawn pe che u a, in lo *chalai* a lawm. 'A sum cheng khat mah min pe lo' te in ti a. School te pawh hi Pu Speaker, Education Minister fel tak kan nei a, rawn buaipui ve mai sela, engatinge nangmahniin in tih vek, school sak te hi?) School sak kan ti em ni? Hei, tam tak a awma lawm, in project-ah hian. School tam tak a awma lawm.

PU ROBERT ROMAWIA ROYTE, MINISTER: Pu Speaker, ka han sawifiah ang e.

Sports school panga kan sak turah hian Pu Lalchhandama Ralte nen pawh hian kan inrawn a, agreement pawh School Education Department nen kan sign thlap a. An mahniin construction agency te an nei chiah lova, chuvang chuan, Kawrthah leh ... (*..interruption..*)

PU LALDUHOMA : Education Minister chuan engatinge Sports Minister chu school sakah a rawn a ngaih?

PU ROBERT ROMAWIA ROYTE, MINISTER: School sakah min rawn a ni lova, sports infrastructure te zinga item tam zawk pawh sports related a ni. Nichinah khan Pu Zothantluanga, resolution move-tu khan a rawn sawi tawh a, a item thenkhat chu Kawrthah field te a ni. Chu chu kan hawng tawh a, mahse kha project kha chu hawn loh angin ala kal a, la zawh loh kan la neih avangin. Tichuan, "school anga lo kal mek ang chi kha chu School Education Department-in enkawl sela, mahse district

headquarters Lawngtlai-a kan sports school te, Lunglei-a kan sports school te, Mamit-a kan sports school te chu Sports department-in enkawl rawh se” tiin agreement department pahnih chhungah a awm thlap a, sorkar level-ah Chief Minister leh central sorkar pawhin kan ruahman dan kha tha an ti a, ziak pawhin communication an rawn siam a ni.

Tin, Member zahawm tak Pu Lalchhuanthanga sawi chungchang kha chu keima sawi theih pawh a ni lova, mahse ‘pawhpen’ tih tawngkam hi chu hmang tawh lo hram ila, puitling the-thaw kan ni baw a. Inthlan leh tura bial tena an awh zawng, an awh tak vek kha kan ni a, kan tih leh lutuk hian kan tih hmingchhiat tum te pawh hi a hmingtha zawkah te pawh hian an tang lel ang tih pawh hi a hlauhawm zel a. Chuvang chuan, educational related a ni emaw khangah khan mi sum tur va pawh pen emaw, eng emaw kha a awm reng reng lova, an tih tur dik tak UD&PA chuan, Allocation of Business Rules pawh kha en ula an mandate a ni; kan department pawhin kan mandate tur dik tak kan ti a, anni department pawhin sports chungchanga an tih hi kan lawm em em a, Minister hnenah pawh lawmthu ka sawi tawh a, an Director hnenah pawh lawmthu ka sawi tawh a. Vawiina ka request chu, “department hrang hrang hian sports infrastructure-ah hian *gap* kan la ngah lutuk avang hian min rawn pui zel rawh u. Keimahnia pawisa rawn pek kher a ngai reng reng lo; in department khan a implementation pawh rawn ti zel rawh u” tih kha kan duh dan a ni.

Tichuan, sports promotion ti lo tawp anga, a sum lai vel ringawt kha kan ngaihtuah chuan, sports promotion hi kan association tha tak takte hian nasa takin an ti a. Covid kan tuar rei bik a. Kan hriat angin, kan state ah ‘indoor chu a hman theih tawh’ emaw, ‘stadium chhung chu a hman theih tawh’ an tih hnu kum khat dawnah Mizoram kan zalen ve chauh a, chu chuan thil tamtakah min ti tuanfum a, chuti chung chung chuan kan association hrang hrang kaihruihu mifel leh smart tak-tak, a bik takin state level association hruaitute phei chu hruaitu tha tak anni. Chung mite zarah chuan kan duh angin ti zung zung thei lo mah ila, “promotional activities hi tha takin, hun hmasa lam ai mahin a kal a ni” tih ka sawi duh baw a ni e.

Tikhan ka duhtaw k mai ang e. Pu Speaker, ka lawm e.

PU TAWNLUIA, DY. CHIEF MINISTER: Pu Speaker, tawitea han sawi leh thain ka hria.

UD&PA hnuai Smart City sum playground siam leh hmalakna tura pawhpen zawnga sawina te kha awmin ka hria a; pawhpen a ni lova, tih tur dik tak tiin central lampang pawhina ‘playground kan siam dawn’ tia kan rawtna te, kan proposal te an rawn approve tawh vek hnuah heng hi hmalak a ni a, ‘pawhpen a awm hauh lo’ tih kha ka sawi duh a ni e. Ka lawm e.

SPEAKER : Awle, tunah chuan resolution neitu member zahawm tak Pu Zothantluanga kan sawm ang a, han wind up sela. Kan Minister leh Dy. CM pawhin an wind-up sak tawh che a, a rei tawh ka ring lova, adopt han dil nghal se, ilo sawm ang u le.

PU ZOTHANTLUANGA: Pu Speaker, ka lawm e.

Vawiina ka resolution - *“Mizoram Sawrkar kal meka Sports Infrastructure din kawngah hmasawwna nasa tak kan nei hi lawmawm kan ti”* tih kha kan sawiho tha khawp mai a, wind-up vak pawh tulin ka hre tawh lova. A tam ber khan kan infrastructure neih thar tam zia te, thalaite tana a tangkai tur zia te leh vawiinah a result lang lo mahsela nakinah chuan national-ah, international-ah te thlenga kan la lanna tur niin a lang a.

A sawitu zingah hian kan Dy. CM leh kan Minister tiamin, mi 23 in an sawi a. A sawitu zawng zawng te'n resolution support zawngin leh ‘hun hmasa lamah sports infrastructure sorkar hmasa lama tan a ni’ tia Palak bialtu ina resolution tihdanglam a rawtna kha – ‘an siam lo’ kan ti lova, kan sawinaah pawh kan sawi a, mahse, hmun thenkhat Saitual te, Hnahthial te erawh chu NEC in a fund a tihtawp avanga chhunzawm theihloh, tuna kan sorkar bawkin chhunzawma a tih hlawhtlin anih thute pawh kha kan sawi tel a.

Lengteng bialtu zahawm tak Dr. L. Thangmawia'n *“Saula'n a sanga sang a that a, Davida'n a singa sing”* a tih ang deuh khan, kan move-na turah hian kan sorkarin tuna infrastructure list hi han siam ve ta ila a thui dawn lutuk a, chhiar zawh sen pawh a ni dawn lova. Chuvang chuan, a tawi zawngin kan sawi a ni a.

Kan resolution hi a hlawhtling hlein ka hria a. Dy. CM leh kan Minister zahawm takte pawhin tha takin an rawn wind-up a, chuvang chuan sawibelh vak tur awmin ka hre lova, a lawmawm takzet zetin ka hria a.

Tichuan, Pu Speaker, he ka resolution *“Mizoram Sawrkar kal meka Sports Infrastructure din kawngah hmasawwna nasa tak kan nei hi lawmawm kan ti”* tih hi he House zahawm tak hian min pass-pui turin ka rawn ngen a ni. Ka lawm e.

SPEAKER : Awle, a resolution neituin adopt a rawn dil a, kan buk ang a -

“Mizoram Sawrkar kal meka Sports Infrastructure din kawngah hmasawwna nasa tak kan nei hi lawmawm kan ti” tih hi adopt remti apiangin, ‘remti’ ti rawh ule. Remtilo kan awm chuan ‘remti lo’ ti ula.

Awle, Pu Zothantluanga resolution “*Mizoram Sorkar kal meka Sports Infrastructure din kawngah hmasawna nasa tak kan nei hi lawmawm kan ti*” tih chu House-in a adopt ta a ni.

PU ZOTHANTLUANGA: Pu Speaker, ka lawm e.

SPEAKER : Vawiina kan business chu kan lo zo leh ta a, kan chawl leh rih ang a kar leh February Ni 13, 2023 thawhtanni chawhma dar 10:30-ah kan thukhawm leh dawn nia.

Sitting is adjourned. (5:54 PM)